




J. G. Smolkin
1211



EEK GENT



Q. Hist.

1900

37272.

Ch. H310.

De Brouckere
C.

8

MANIPULUS
CONFLUENTINARUM
MEMORABILIVM RERVM
EX
HONTHEMIANIS


AC
BROWERIANIS
POTISSIMUM ARVIS
SEDULA ET ATTENTA MANU
CONGESTUS;

AC
DIVINO PRÆPRIMIS NOMINI
TREVERICÆ


DEIN
HISTORIÆ CULTORIBUS
DICATUS ET OBLATUS.

PER F. HIEROTHEUM
à Confluentiâ Minoritam Capucinum.

Superiorum Permissu.



LUXEMBURGI,
Apud JOANNEM BAPTISTAM KLEBER, Typo-
graphum ejusdem Civitatis & Collegii So-
cietatis JESU. Anno 1753.





G Audent Patriâ ipsi quo-
que Dii, ac universas res
humanas, ut par est, inveniuntur,
rati universam terram & mare
suam esse possessionem; in quâ
tamen quisque eorum natus est,
illam reliquis omnibus Urbibus
anteponit: Jam si Patriæ nomen
Diis est in pretio, quî non longè
magis hominibus? *Lucianus apud
Janum Gruterum in Florilegio magno.
v. Patria.*



PRÆFATIO.



*U*MMUS veterum Romanorum Sacerdos res quotannis à Senatu, Populove gestas, aut à foris iisdem allapsas, non tam ornatè, quàm breviter ac limpidè literis mandare, statòque

tempore palam Populo facere, inter præcipua Præfectura sue gerebat; quatenus quæ ad rem publicam fecerant, aut eidem offecerant, in memoria publica cum ad sequelam, tum ad cautelam eò firmitus conservarentur: Politia certè ab ipsis met Diis inventa ac inspirata terrigenis, proindeque digna, quam sacramento colant, quotquot Rempublicam curant! Interim verò cum ætas postera hoc à priscorum more studioque frequenter recedere, ac Virorum præclarissimorum merita, verumque publicarum memorias suis solum in Charophylaciis, ac in Curiarum suarum adytis non tam attollere, quàm tumulare sit visa, Superis

faventibus ac disponentibus accidit, quod quandoque novi Romulides, literati nimirum ac graves, patriamque gloriam, & publicam salutem zelantes viri, diligenter ac operosè in apricum produxerint, qua in secretioribus scriniis inter arrodentes tineas, aut inter operimenta pulverum vel jam consenuerant, vel posthas consenuissent.

Hos verò inter Luciferos, si eos quoad nostra spectemus, Principem sibi vendicant locum Illustrissimus HONTHEMIUS; Episcopus Myriophitanus, & Archi-Episcopi Trevirensis Suffraganeus; ac Christophorus Browerus, non vulgare Societatis JESU, & Orbis literati decus: Hic author est vastissimi, celebratissimi, ac in duos Tomos partiti operis, cui titulus; Antiquitates & Annales Trevirenses: Iste Historiam Trevirensensem Diplomaticam & Pragmaticam in tribus grandioribus Tomis eleganter digessit, ac novissimè juris publici fecit; indeque sicut Browerus in Hemisphærio nostro Sol oriens, ita Ipse meridianus & audit, & est; utpotè qui elaboratissimis Dissertationibus, clarissimis Notis ac Glossis, gravissimis quoque ac copiosè productis Chartarum publicarum, aliorumque insignium monumentorum momentis & auctoritatibus, Reipublica literaria luminis plenitudinem dedit; ambo me-

hercule digni in illorum album referri, de quibus Scriptura Eccli. 44. In generationibus gentis suæ gloriam adepti sunt, & in diebus suis habentur in laudibus.

*Hujus itaque duplicati Solis tum luce perstri-
ctus, tum & ardore succensus amor, quo religiosè
in Patriam feror, faciliter mihi persuasit (: Hon-
themiana profero :) dignum esse Cive facinus,
quæ in natali solo ante nos gesta sunt, studioſo
oculo requirere, & nostris aliorumque uſibus
in unum veluti acervum colligere; talique for-
matus & stimulatus consilio subsecivas quasdam
horas Patriæ Civitati dicare, veteraque cum recen-
tibus, quæ quoquo modo ad ejusdem fundamenta,
incrementa, ornamenta, emolumenta, nocumenta,
& documenta concurrisse notabam, studiosâ manu
colligere, in ordinem redigere, chartæque mandare
constitui, ad eum ferè modum, quo quondam res
Romanorum per Pontificem Maximum in tabulas
referebantur, dilucidè nimirum, breviter, ac sine
ampullantis Rhetoricæ typho: & brevitatem qui-
dem quod attinet, si hæc forsitan minus aptè ad
rem facere, aut prætermiſſorum videatur & ap-
pelleetur hinc inde rea, Liber Paralipomenon, rogo,
conficiatur ab illo, cui plus libertatis, authorita-
tis, ac æris est, quàm pauperi ac humili Mona-*

cho, ceu de quo constat, quod citius & facilius Jovis diphtheram, quàm Secularium Curiarum scrinia inspicere, aut pervestigare sinatur, quòdque insuper, prout vult, semper agere, sive scribere nec possit, nec ausit.

Caterùm, quia Confluentia minor Suburbium majoris à Majoribus nostris est habita; cùmque Arx Ehrenbreitsteiniana ad ipsam ceu præcipuum propugnaculum spectet; splendor quoque Ehrenbreitsteiniana Vallis ultra Rhenum diffusus, situm seu districtum ejus spectabilem magis, ac conspicuum reddat, hinc & de his breviter agendum erat; quatenus singula, quæ Confluentiam non solum in- sed & exterius propioribus modis contingunt, huic nostro Manipulo inserta comperirentur; cujus spica quæ sint, in sequenti Serie, ceu in quopiam antecessu, monstramus: simulque ingenio, quod fecundius ac facilius est nostro, aperimus campum, aliquando de Confluentia rebus, quas hic compendium arctat, & stringit, calamo fusiore tractandi; quo facto, & nostræ Patriæ, quod ejus merita poscunt, & nobis, quod cupimus, obtigisse dicemus, Deum interim enixè rogantes, ut, quidquid in hoc modico Lectoris benevolentia sistimus, ad majorem suam gloriam dirigere, ac elevare dignetur.



SINGULÆ MANIPULI NOSTRISPICÆ.

I.

Confluentia primordia, & accrementa.

II.

Prima & postera ejus Fides.

III.

Saculares illius Principes.

IV.

Ejusdem Principes Ecclesiastici.

V.

Horum apud Confluentes regalia.

A 4

V I.

Leges per hos Confluentibus data.

V I I.

Confluentinorum Privilegia.

V I I I.

Ecclesiastica illorum Curia.

I X.

Ecclesia S. Florini.

X.

Ecclesia S. Castoris.

X I.

Ecclesia B. Mariæ Virginis.

X I I.

Hospitale Pauperum.

X I I I.

Domus Teutonica.

X I V.

Seminarium Clericale.

X V.

Mons S. Beati.

X V I.

Regularium Domus & Ecclesia.

XVII.

Sanctorum Reliquia.

XVIII.

Curia Civica.

XIX.

Gymnasium.

XX.

Confluentia Mœnia & Munimenta.

XXI.

Ambo illius Pontes.

XXII.

Publici in ea celebrati Conventus.

XXIII.

Augusti ac Regii illius Hospites.

XXIV.

Hospites Sancti.

XXV.

Viri illustres ibidem sepulti.

XXVI.

Viri insignes ibidem nati.

XXVII.

Infaufti ejusdem casus.

XXVIII.

Confluentia parva.

XXIX.

Arx Ehrenbreitsteiniana.

XXX.

Vallis Ehrenbreitsteiniana.



CAPUT I.

De Confluentiæ Primordiis, & Accrementis.



CONFLUENTIAM ab incunabulis ad provectam usque ætatem ante oculos curiosi posteri curatius collocaturi, præsignificamus 1^{mo}. quod in Europæ nostræ infantia, prout Tacitus *de Mor. Germ. cap. 28.* refert, quæque gens, ut evaluerat, cæperit deserere veteres, ac inquirere sedes novas; hæ siquidem Regum runc, Regnorumque potentiâ nec divisæ, nec distributæ, sed promiscuæ, indefinitæ, primorumque occupantium, vel viribus prævalentium erant.

2^{do}. Quod trans-Rhenani, sive Magnæ Germaniæ populi gentem suam in dies crescere, terramque patriam alendæ illi minùs parem ex-

perti, exploratâ cis-Rhenensium Regionum pinguedine, in iisdem sibi sedes, Flumine superato, delegerint, teste Julio Cæsare *de Bello Gall. Lib. 2. cap. 4.*

3^{tiò.} Quod ex iis, quæ Tacitus *de Mor. Ger. cap. 28.* refert. *Treviri circa affectationem Germanicæ originis ultro ambitiosi sunt, tanquam per hanc gloriam sanguinis à similitudine & inertia Gallorum separentur.* Item ex iis, quæ apud Strabonem *lib. 4. Geogr.* leguntur. *Treviris coherent Nervii, qui ETIAM natione Germani sunt.* Quod, inquam, ex his liceat prorsus tutò concludere; Treviros ab origine sua Germanos, non Assyrios esse, nec à profugo Trebeta (: *Vide Broverum in Annal. Trevir. Propars. cap. 6. :*) sed ab Alemannis suum nomen sumpsisse: quod & Illustr. Honthemius *in Hist. Diplom. Trevir. 10. 1. pag. 1.* confirmat, dum ait; Germanos nobis, & Urbi ab ipsis conditæ, aut certè insigniter auctæ, nomen Trevirorum dedisse: quibus subdimus, nomen hoc vel ex mero eorundem placito, vel inde suum ortum habere, quod non pauci horum emigrantium, Rhenumque transeuntium Alemanorum populi eo vel corporis vel animi, vel utriusque simul claruerint robore, ut longè antecesserint cæteros, & quivis eorum tres quodammodo viros agere, vincere, vel æquare valuerit, proindeque sicut habiti, ita & dicti sint Treviri, id est, insigniter cæteris animoque corporéque præstantes: olim namque *tre.* ut Bayer in Lexico tradit, idem erat, quod tria; sed & hodiedum libra-

mentum trium ponderum nuncupamus *trepondo*.

Præsignificamus 4^{to}. Quod tempus, quo dictæ trans-Rhenanæ gentes cis Rhenum, Germaniæ tunc Galliæque limitem, primas sibi sedes fixerunt; densissimis involutum sit tenebris, indeque Browerus in *Proparaf. pag. 21. num. 5.* rectissime dixerit: *gentium origines, & commigrationses difficultatibus iis sunt implicata, ut & doctissimi & antiquissimi Scriptores, eas inveniri posse, & velut à capite usque repeti, non sine magna ratione negarint.*

Præsignificamus denique. Quod, si de hac rerum, temporumque caligine diebus nostris sit danda relatio, seu adornanda historia, hæc à gnaro & discreto æstimatore rerum appendi petat ad trutinam pragmaticæ hujus Regulæ. *In antiquis tam exacta probatio non requiritur, sed sufficiunt adminicula, aliæque argumenta, quæ in novis non efficerent probationem plenam. in Arg. cap. 13. X. de Probat. quod & Strabonem tenuisse, liquet ex iis, quæ ex ipso Browerus in Proparaf. pag. 20. num. 5. adducit, prudentem nempe conjecturam de talismodi rebus sufficere. Quibus præmissis, historiæ nostræ hæc initia sunt.*

Germani, qui primi commigrârunt trans Rhenum, Confluentiæ fundamenta locârunt. Ratio est: quia gentes hæ in maximo numero deseruisse solum patrium, ac sedes sibi delegisse cis Rhenum, liquet ex præcitatis gravissimis testibus, nec non ex iis, quæ Browerus in *Proparaf. cap. 8.* ex Seneca refert: at verò nec

verisimile, nec possibile quis dicer, quod omnis hic populus simul confederit, simulque perstiterit in uno Gallicæ regionis loco, sive in unica & sola valle, quam nunc occupat Trevitorum Augusta: ergo tenendum, quod emigrantes hæ gentes ab invicem vel voluntate, vel necessitate fuerint sejunctæ, parsque ibi, pars alibi sibi sedes & habitacula struxerint; ubi nimirum terræ, aërisque benignitas intenta ab ipsis commoda, nutrimenta, & accrementa spondebat: hæc autem cum Confluentinæ Regionis amœnitas, Soli fertilitas, Cœli salubritas, quin & ipse Rheni, Mosellæque confluxus patenter ipsis, & affluenter promiserint, quis ambigat, quin Confluentium ripa à nonnullis earundem gentium vel in primo trans Rhenum itu, vel non longè post fuerit initiata Colonia?

Confirmantur hæc ex Georgii Bruin Agrippinatis *Libro 2. de universis Urbibus*, ubi de Confluentia differens, eam ideo inter antiquissimas Civitates reponit, quod Veteres, ubi fluminum vel amnium reperiebant confluxus, ob confluentia exin commoda, sedes ibi deligere, ac urbes ædificare consueverint.

Confirmantur quoque ex Lucii Annæi Flori *Lib. 4. cap. 12.* ubi dicit; quod Drusus Rheni ripam munierit quinquaginta Castellis; quodque horum unum ad Confluentium ripas extiterit, asseverat Valesius V. *Confluentes*: Drusum autem anno circiter undecimo ante Christum natum circa Rhenum bella gessisse, constat ex Annalibus Browerianis *Lib. 1. num. 139.* Porro de hoc

Drusi castro ea quoque veniunt intelligenda, quæ Ammianus Marcellinus *Lib. 16. cap. 3.* refert; *Per hos tractus nullum Castellum visitur, nisi apud Confluentes, locum ita cognominatum, ubi amnis Mosella infunditur Rheno.* Unde Ill. Honthemius in *Historia Trev. Diplom. tom. 1. pag. 25. num 11.* rectè & meritò de Confluentia scribit; quod *præsidaria olim fuerit Romanorum statio, & arx simul adversus Germaniam magnam speculatoria, in antiquis tabulis geographicis notissima:* Rectè quoque Annales Broweriani *Lib. 11. num. 16.* dicunt, res Confluentinas tum statione Romanâ, tum veteris castrî famâ, tum & alio non ignobili cultu celebres olim & opulenter audisse.

Quibus singulis animo tum attento, tum & neutram in partem inclinante perpensis, nemo non faciliter sentiet, ac inhæsitanter edicet, Confluentiam ante Drusi, quin & ante Cæsaris, aliâque prisca tempora extitisse Germanorum coloniam; quæ labentibus annis tot, & tam insignibus incrementis est aucta, ut, sicut Romani suis ipsam præidiis, & munimentis firmârunt, ita posteri Reges, ac Cæsares suis eam palatiis, placitis quoque, ac conventibus celebrem, nobilémque reddiderint.

Hæc autem ut evidentiora reddantur, præciendum hîc venit; quod Reges Francorum, & Imperatores Romano-Germanici usque ad Ludovicum Bavarum, ob quotidiana Regni negotia, Provincias singulas crebrius obire consueverint; & hinc, quatenus tam ipsis, quàm

corundem Missis commodè in iisdem subsistere, Regnòque eò meliùs consulere, ac invigilare liceret, mansiones sibi, sive palatia in locis magis aptis, magisque opportunis crexerint; quæ dein loca sicut Villæ regiae nuncupabantur, ac erant, ita quoque providebantur redditibus congruis, quatenus Aula regia regiè ibidem stare, ac in omnibus, ut par est, haberi distinguique valeret: porro civitates & oppida, quæ ad talismodi redditus tributarium concursum præbebant, Curtes regiae, seu Fisci regii appellabantur: quibus titulis, regiae nimirum Villæ, regii Pallatii, regiaeque Curtis, quod & Confluentia fuerit quondam condecorata, videre est in *Hist. Trev. Diplom. to. 1. pag. 22. 25. 354.* Cæterum si quæras, quo ergo in loco regia olim Aula constiterit? Respondendum censemus, eminuisse eam in spatiis, quæ nostris adhuc temporibus *der alte Hoff* / id est, Aula vetus dicuntur.

Confluentiâ suo sic in fundamento locatâ, quin & in altum per Reges Cæsaresque levatâ, exigit nunc historiæ series, ut &, quo ipsam nomine prisçi, modernique Scriptores compellent, cum Lectore communicemus: à Dithmaro *Chron. lib. 7. pag. 406.* Cophelenci. in *Corp. Trad. Fuld. pag. 179. num. 447.* Cobolence. in quorundam Archi-Præsulum nostrorum chartis Covelentz; à prisçis Confluentes; à modernis latinè Confluentia, germanicè nuncupatur *Coblenz*; quod nomen inditum quoque est Helvero

Helveto cuidam vico, ibi sito, ubi Arula se Rheno commiscet.

Confluentini veteres, quia Rheni ripam cum cæteris ejusdem accolis adversus hostes custodiendam, ac defendendam habebant, Ripuarii, non sub solo Francico, ut vult Browerus *Lib. 7. pag. 362. num. 104.* sed & sub Romanorum Imperio prout *Hist. Trev. Diplom. to. 1. pag. 12.* verisimilius sentit, appellabantur: quin & ipsos ad pagum Trigorium, cujus à fronte Rhenus, ab utroque autem latere Nava & Mosella limites erant, apud priscam ætatem spectasse, benè tradit mox *cit. Hist. to. 1. pag. 70. §. 20.* dum interim Browerus *Lib. 11. num. 16.* Confluentiam in pago Meisfeldensi, sive Meginensi locat, at minus rectè; cum enim utrumque hunc pagum, Trigorium nimirum & Meginensem, Mosella sejunxerit, hinc Confluentia non in hoc, sed in isto potuit suum situm habere.

Dixi Confluentiam ad pagum Trigorium à priscis fuisse repositam; postquam enim civitates & oppida, plurima quoque jura & regalia ex Cæsarum Regumque munificentia ad Episcopos, ad Milites, nec non ad Monachos devoluta fuerunt, nomen quoque Pagorum ita sensim intercidit, ut, teste Mettinghio *de statu Mil. Germ. Sect. 4. pag 206.* à sæculo duodecimo ad hæc usque tempora in tabulis publicis nulla amplius eorum mentio, seu nominatio fiat: Pagorum itaque numerositati, magnitudini, nominique evenisse conspiciamus, quod terref-

tria quælibet afficere, tum ab experientia, tum ex divino hoc oraculo novimus; *Non est priortum memoria: sed nec eorum quidem, quæ postea futura sunt, erit recordatio apud eos, qui futuri sunt in novissimo.* Eccle. 1.



CAPUT II.

De prima & postera Confluentiæ Religione.

N Atâ nunc, quin & adultâ nonnihil Confluentiâ, ad ejus incunabula sciscitando revertimur, Deûmne à teneris, Deolve coluerit? Ad quod tempora illa caliginosa reponunt; ipsam tum Deos patrios, tum adorâsse & illos, quibus cæcitas Romana litabat. Liquet id ex sepulchrali tabula; quæ quondam ibidem reperta, ac eruta, & nunc in mœnibus juxta sacram D. Florini Ædem exposita, Hymenæum duos inter sponfos sedentem, ac connubiali eos fide jungentem, nec non sobolem ex ipsis deinceps genitam exhibet obscure, quia per tempus exesa, elatior autem in suo ectypo prostat apud Broverum in *Proparaf. pag. 58. nec non pag. 103. in Notis Masenianis.*

Erat hæc tenebrarum Principi in Rhēni acco-

las permissa potestas, eâque miseranter cœcati, quod ex lapide, ligno, & metallo condiderant, votis, hostiis, thurisque crematione colebant; palabanturque hac in caligine, usque dum aurora Christianæ Fidei, agente D. Materno, ter- ris his oboriri est visa: sub quam quod & Con- fluentia ab aviis digressa sit in semitas rectas, ex Martyrologio Romano satis clarè consequi- tur; id namque dum ad 14^{tam} Septembris affir- mat, Treviros, Tungros, & Ubios, iisdemque finitimas gentes æternæ salutis semina, primam videlicet in Christum fidem, Materno evange- lizanti debere, utique Confluentiam, quæ in Treviris, Ubiis verò confinis est, unâ cum po- pulis aliis in partem hujus debiti trahit: idque & per ea confirmari videtur, quæ infra cap. 10. de apparitione D. Materni dicuntur.

Hoc autem Orthodoxiæ donum an Majori- bus nostris in altero Æræ Christianæ sæculo; an verò sub finem sæculi tertii, aut ad initium quarti fuerit de cœlis datum, non est idem omnium Scriptorum sensus, prout liquet ex *Hist. Trevir. Diplom. 10. 1. pag. 10. §. 15.* qui cum Browero, La-Guille, Bertholet, Bucherio, cùmque aliis non paucis tenent, D. Maternum in fine sæculi primi, aut ineunte sæculo secundo apud Ubios, Tungros, ac Treviros Apostola- tum cum Pontificatu gessisse, ac finitimis po- pulis, atque inter hos Confluentibus, vel per se, vel per suos Missos Fidei rudimenta dedisse, sententiæ suæ suffragantem allegant Benedictum XIV. in Republica literaria versatissimum Pa-

pam : dum enim Is in Martyrologio noviter edito, cui concinnando, præter concurrentem selectissimorum virorum operam, proprias quoque manus applicuit, inhæret Baronii, veterumque frequentissimo sensui, atque D. Maternum inter Discipulos Principis Apostolorum reponit, tacitè, ac consequenter affirmat, ipsum vel sub finem sæculi primi, vel in sequentis limine his in terris Christi Fidem disseminasse : quâ tamen autoritate posthabirâ, Hagiographi Antverpienses 10. iv. *Septembris ad xiv. ejusdem mensis*, prænuntiantibus eorundem literis, tenent oppositum; quod nempe S. Maternus nec D. Petri Discipulus, nec ante sæculum tertium existerit Trevirorum Episcopus : interim verò sicut circa hæc non idem, ita facilis est omnium sensus, Fidei semina à D. Materno Confluentiæ sparsa, deindèque vel à Paganismi tyrannide, vel per alias temporum, hominumve injurias, crebriùs duriùsque pressa, aut planè fortassis extincta, à S. Castore, D. Maximini Archiepiscopi Trevirensis Discipulo, circa annum 337. verbo & opere ibidem vel reerecta, vel resuscitata fuisse. *Videatur Masenius in Indice Chrono. Hist. Trevir. pag. 3. col. 2.*

Cæterùm an & hæresum aliquando zizania in Confluentinis arvis fuerint vel sata, vel nata, evidenter non constat; inimicum tamen hominem ad annum 1163. illuc illa tulisse, atque manus ad ea spargenda parâsse, ominamur ex iis, quæ Browerus *Lib. 14. num. 139.* sequentibus refert, *Egbertus Schônangiensis Abbas, ex-*

cellentis eâ tempestate ingenii ac doctrina vir, hæreticum, Berengarii sectatorem, Caradonâ, nobili Trevirorum Vico, oriundum, peracuto ac vafro ingenio, & oris volubilitate vel præcipuè promptum, apud Confluentes in publico doctorem hominum conventu, invictis rationum momentis tam feliciter confecit, ut ultro, perspectâ clariùs veritate, manus illi daret, seque in Ecclesiâ gremium, agnitâ Sacramenti veritate, reciperet.

Prout autem Caradonensis hic extitit felicior tribus aliis, apud Browerum *lo. cit.* nominatis Berengarii, & Tanchelini sequacibus, ceu qui Colonia Agrippinæ ab eodem Egberto convicti, at non conversi, nec emendati, suam subinde pertinaciam infamibus flammis luerunt; ita quoque Confluentia, dum hæresin in ovo contrivit, quoad id Trevirorum Augustâ attentior, & felicior fuit: hæc enim ut Casparo Oliviano, Jurium Doctori, ac degeneri suo civi, concivibus ad annum 1559. clam & palam propinanti Calvinisticum virus, virum gravem opponere distulit, multa sibi pericula, nec pauciora nocumenta concivit, prout Ill. Honthemius in *Hist. Trev. Dipl. to. 2. à pag. 783. usque ad pag. 861.* publicarum tabularum fide Notisque subnexis tam fusè, quàm accuratè describit, simulque commonstrat: Quod Aurifaber, Lutheri primùm discipulus, dein verò Ecclesiæ Orthodoxæ Professor, hæreticum genium coloribus vivis expresserit, dum in suis Symposiis titulo de *Sectariis* dixit. *Certum est, quod quilibet Hæreticus aut Sectarius est seditiosus; nam posteaquam*

mendacia docuit, & sparsit, ea deinceps homicidiis obfignat. Et iterum pag. 367. Seditiones & homicidia sunt Hereticorum, imò diaboli velut quadam sigilla: Unde, quod Apostolus in Epistola ad Titum cap 3tio scribit; Hereticum hominem devota, sciens, quia subversus est, cuilibet dictum esto.

Confluentia itaque, dum adrepenti hydræ & aditum tempestivè præclusit, & Herculis ei clavam impegit, suis per id aris ac focis providè ac religiosè consuluit; quin & deinceps in perra fidei, sub obedientia Apostolicæ Sedis, eâ jugiter observantiâ & reverentiâ stetit, ut ex Interdicti censura, qua Eugenius Papa, hujus nominis 4tus, anno. 1433. universam Archi-Diœcesin ferierat ad persequenda & componenda dissidia, quæ inter Rabanum ab Helmstatt, legitimè creatum Præsulem, ejusque competitorem & antagonistam Udalricum à Manderscheid, turbulentè obversabantur, ipsa sibi meritum, laudèmq; perennem pepererit teste Browero *Lib. 19. num. 36.* ubi ait. *Confluentia in his turbis, etsi Udalrici Manderscheidensis factio magnas ibi vires habebat, rara tamen & memorabilis religionis laus enituit, cum anathematis periculo declinato, Sacerdotum collegia, ac reliquos Cœnobitas in honore habere, ac veneratione maluerit, quàm ullis improbis, quod alibi fiebat, machinationibus ad violanda Pontificia decreta compellere.* Quibus & Masenius consonat, dum in *Ind. Chron. Hist. Trevir. pag. 33. Col. 2.* dicit: *Confluentini in dissidio Archi-Episcopalis*

electionis pro Pontificis Romani voluntate constanter stetere, ejus excommunicationem reveriti; ideòque & Rabanum suscepere, factione Udatrici repressâ. Trevirorum non idem omnium sensus fuit. Gestâ quoque Trevirorum Broweri & Masenii asserta confirmant, dum pag. 448. dicunt: Generale Interdictum fuit positum in Diœcesi Trevirensi, quod duravit quatuor annis, vel circa. Confluentini in omni illo Interdicto laudabiliter se habuerunt, non arctando collegia, neque claustra, neque alias personas aut subditos.

Sicut autem pravitati hæreticæ, præfatæque turbæ schismaticæ, ita & Judaicæ perfidiæ suas semper portas Confluentia contendit occludere, utpote damnis aliorum, fors etiam suismet, edocta, Judæis nunc verè congruere, quod Sapiëntia cap. 12mo. de eorundem adversariis dixit; *Quoniam nequam est natio eorum, & naturalis malitia eorum, ac semen maledictum.* Imò teste Apostolo 1. ad Thessal. 2. pervenit ira Dei super illos usque in finem; quia & Dominum occiderunt, & ESUM, & Prophetas, & Deo non placent, & omnibus hominibus adversantur, Quocirca, dum Richardus à Greiffenclau vi privilegii, quod ei, ejusque præcessoribus Archi-Episcopis nonnulli Imperatores concesserant, ad annum 1518. Judæos intra ipsam admitti, suâque sub protectione locum illis dari jubebat, Magistratus prudenter ac modestè secundantem, ac reluctantem exhibuit, morémque tunc tandem imperatis gessit, quando perfidam hanc hominum faciem strictis arctandam

legibus, & sub iis admittendam, tolerandamque rescivit.

Cæterum an hic Richardus, an verò Otto à Ziegenhein, Judæorum osor, eorúmque ex Archi-Diœcesi proscriptor, Confluentiæ seu bono publico magis profuerit, aliis edicendum relinquimus; nobis interim referentibus, & approbantibus illa, quæ Hermannus Kornerus suo Chronico ad annum 1419. hoc de Ottone intexuit. *Fuit vir magna prudentia & probitatis. Hic confirmatus in Archi-Episcopum, omnes Judæos de sua provincia expulit, magis exhorrescens eorundem malitias, quibus suam Diœcesin macularent, quàm ponderans lucrum vel commodum, quod ex eis habere potuisset. Bona verò eorum omnia confiscavit, restituens cuilibet Judæo triginta denarios, in memoriam venditionis Christi pariter & vindictam: reddidit etiam pignora circa eos inventa omnibus debitoribus eorum, quæ ipsi pro mutuis à Christianis acceperant, postulans ab iisdem debitoribus solam summam ipsis à Judæis concessam. Quod exterminium sordidus ac maledictus hic populus non solùm ob venditionem & interemptionem Christi, sed & meruerat ob carnificinam S. puero Wernero apud Wefaliam, nec non ob sacrilegam Everhardo Archi-Episcopo Treviris illatam necem: in quos quibus modis naturalis eorum malitia, ac congenitus in Christianos rancor sævierit, narrat Browerus in *Annal. Trevir. lib. 11. num. 145. lib. 16. num. 116.**



CAPUT III.

De Sæcularibus Confluentiæ
Principibus.

Confluentiam suis in primordiis nullius sub-
stitisse dominio, Tacitus affirmare vide-
tur, dum de Moribus Germanorum *cap. 28.*
dicit; quod sedes, sive regiones ac terræ in
prima transmigratione germanicarum gentium
fuerint promiscuæ, indivisæ, nulliûsque poten-
tiâ vel legibus intrâ terminos definitos conclu-
sæ: quot verò per sæcula, vel quot in annos
colonia hæc sine domino primâque in liber-
tate perstiterit, aut quæ tempora hanc ei liber-
tatem ademerint, non constat.

Constat è contra, quod aliquando paruerit
Urbi, cui nomen Treviris: quæque à Germa-
nis, ut diximus, vel condita, vel certè tot
civibus, opibus, ac viribus est aucta, ut tan-
dem, testante Browero, in tributariorum suo-
rum album ipsos etiam Nemetes, Vangiones,
ac Triboccos adlegerit; quin &, referente Ill.
Honthemio, ab Oriente usque ad Rhenum,
ab Occidente usque ad Mosam, à Meridie
usque ad Mediomatrices, à Septentrione usque
ad Condrusos populum, hos intrâ fines con-

clulum, sui juris efficiens, suum quoque illi nomen indiderit, inde dicta Trevirorum Augusta: quæ quoad accolas Rheni, & sic quoad Confluentes confirmantur à Cæsare, dum *Lib. 3. cap. 11.* nec non *Lib. 4. cap. 10.* dicit; *Treviri proximi Rheno fluvio sunt. Rhénus per fines Trevirorum citatus fertur.* Similiter Strabo *Lib. 4. Geogr. pag. 194.* ait; *Treviri juxta Rhenum habitant:* unde & antiqui Scriptores, dum de Confluentia tractant, inquirunt; *Confluentia in Treviris.*

Augustæ Civitatis hujus gloria ad fastigium tam sublime conscenderat, ut is, qui in ea primatum tenebat, apud Lucium Annæum Florum *Lib. 3. cap. 11.* Rex; Senatores verò in Commentario Cæsaris *Lib. 5. cap. 5.* Principes nuncupati legantur: qui, dum tutamina clientibus, confœderatis verò auxilia ferunt, dum opibus, dum viribus, nullisque non felicitatibus florent, id sibi demum à fatis adornatum conspiciunt, quod nunc eorundem posterì in tabulis evangelicis legunt: *cùm fortis armatus custodit atrium suum, in pace sunt ea, quæ possidet; si autem fortior superveniens vicerit eum, universa ejus arma auferet, in quibus confidebat, & spolia ejus distribuet:* Principatus namque Romanus, ut Trevirorum capita sæpe superciliosa, fumigantia, & refractaria comperit, id tandem, quod elatius ac arrogantius, cuique nomen Indutiomarus erat, ense demersit: cæteros verò Trevericos Proceres vel fugam arripere, vel capita inclinare coegit, dum ip-

sam eorundem Augustam omnésque illius terras quinquagesimo ante Æram veterem anno in Provinciam redigens, ipsas arbitrio & potestati Præsidis, qui Titus Labienus erat, subjecit. *Hist. Trevir. Diplom. 10. 1. pag. 6.*

Quo super Trevericæ celsitudinis lapsu sentiendum, loquendúmque cum Sanctis: *Deus transfert, & constituit regna.* Dan. 2. *hunc humiliat, & hunc exaltat.* Ps. 74. Indèque & Confluentes cum humiliata sua Domina sua quoque capita inclinârunt Romanorum imperiis; at non continenter: dum namque trans-Rhenani Germani, qui & Franci, id est, liberi nuncupantur, circa tempora Gallieni Cæsaris anno Christi 260. occupatâ cis-Rhenanâ ripâ, Romanum militem, prout Ammianus Marcellinus *Lib. 28.* dicit, ex pluribus munimentis ejiciunt, Confluentiam quoque capiunt, copiis instruunt, suisque imperatis substernunt.

At verò dum denuo Cis-Rhenanarum rerum potiuntur Romani; dum Gallienus, & post hunc Valentinianus, uterque Augustus, Rheni ripas turribus, castellisque communiunt, Confluentini quoque Aquilas imperiales adorant usque ad annum circiter 464. quo Franci Romanos, cæso Ægidio eorundem Duce, exuere Trevirorum Augustâ, Coloniâ Agrippinâ, multisque aliis Rheni litori insidentibus locis, prout Gesta Francorum *cap. 8vo.* testantur: ex quibus Ill. Honthemius, rerum Trevericarum accuratior, ac critices intelligentior Scriptor, concludit; epocham imperii, quod in terras Trevericas

obtinerunt Franci, inchoandam ac constituendam esse ad annum mox dictum. Cæterum qui hi Franci, quique fuerint eorundem Reges, idem Illust. Scriptor clarè ac scitè refert in *Hist. Trevir. Diplom. to. 1. pag. 12. & pag. 21.*

Francicum hoc regnum occidisse ad annum 509. Historici passim affirmant: dum nimirum Clodoveus Magnus occisis Francorum Regibus, ex omnibus Provinciis, quæ sub nomine Franciæ variis parebant Principibus, regnum unum, Gallia nuncupatum, erexit: at verò ut & ipse anno 511. vitam cum sceptro deposuit, filii ac hæredes ejus, ruptis novi regni compagibus, id in Franciam Orientalem, sive Austrasiam, & in Occidentalem, sive Neustriam dispartierunt: Rex Austrasiæ jam Metis, tum Rhemis sibi Solium ponens, innumeris pene populis, ac inter hos Treviris, nec non & illis, qui Lotharingi postmodum nuncupati fuerunt, principabatur usque ad annum 870. quo Carolus & Ludovicus Fratres, filii Ludovici Pii, hic Germaniæ, iste Galliæ Reges, partiti sunt Austrasiæ regnum: & quia in divisionis hujus sorte pars Occidentalis Carolo, Ludovico autem pars Rheno vicinior, nimirum Orientalis, obtigerat, hæc portio à Galliis avulsa, ad Germaniæ regnum accessit, indèque & Confluentia Germaniæ deinceps Regibus suam fidem addicere cœpit: demùmque ut hi anno 936. ad Imperii Romani thronum in Ottone Magno levantur, Sacramenta iisdem Imperatoribus Romano-Germanicis dixit usque ad Henricum II. cogno-

mento Pium; cujus munifica demum religio, sicut plura alia Dei cultui dicata loca insignibus largitionibus & prædiis, ita & anno 1018. Trevirensē Ecclesiam Confluentiā cum omnibus ad ipsam pertinentibus auxit, ac Poponem, tunc Archi-Præsulem, per solemnes tabulas, in *Hist. Trevir. Diplom. to. 1. pag. 354.* relatas, in illius possessionem immisit.

Quā tamen donatione nec attentā, nec obstante, Præfectus seu Advocatus Imperialis (:hic semper è classe Comitum, viribus ac opibus pollentium erat:) munus suum apud Confluentes exequi, ac obeunda obire non destitit, restantibus id tum chartā foundationis Arensteinsis Cœnobii ad annum 1156. tum instrumento publico, ad annum 1182. confecto super compositione, inter Confluentinos Cives ex una, ex parte altera inter Trevirenses S. Simeonis Canonicos initā, Imperiali hoc Advocato præsentē. Porro præcipuum hujusmodi Præfectorum officium, cura, seu studium erat, pacem publicam inviolatam servare, orta dissidia tempestivè componere, jus dicere, ac executioni mandare, ad redditus imperiales attendere, nec non circa alia plura disponere, quæ videri possunt in *Antiquitatibus Wetteraria lib. 3. cap. 1. 2. 3. 4.* videatur quoque *Hist. Trev. Diplom. to. 1. pag. 575. 614. 832.* ex cujus etiam relatis habetur, quod Confluentia post suum ad Archi-Episcopos transitum ultra sæsqui sæculum sub continuo jure ac præsidio Advocati imperialis persisterit, ab eoque tandem ad annua

1220. exempta, in plenum jus Præfulum Trevericorum concesserit per Constitutionem Frederici II. datam Francofurti ad 26^{tam} Aprilis; ceu quâ præcipitur, ne quis Officialium Cæsaris in Civitatibus, ad Episcopos spectantibus, ullum posthac juris actum exerceat. *Hist. cit. to. 1. pag. 658.*

Quibus ex præmissis evidenter conspicitur, quod Confluentia paruerit 1^{mò} Primatibus Trevirorum Augustæ. 2^{dò} Romanis. 3^{tiò} Germanis trans-Rhenanis, seu Francis. 4^{tò} rursus Romanis. 5^{tò} iterum Francis. 6^{tò} Regibus Austrasiæ. 7^{mò} Germaniæ Regibus. 8^{vò} Imperatoribus Romano-Germanicis. 9^{nò} & ultimò Ecclesiæ Trevirensis Præfulibus, de quibus nunc plura.



CAPUT IV.

De Ecclesiasticis Confluentiæ Principibus.

PRænotandum hic venit, quod, cum Confluentia in sæculo undecimo à jure Cæsaris in dominium Archi-Episcopi Trevirensis transierit: Ludovicus Rex autem in confiniis sæculi noni & decimi Radbodo, similiter Archi-Episcopo nostro, potestatem politicam in Augustam Trevirorum contulerit, hæc longè ante Con-

fluentiam jura sua & ab ense, & à Stola receperit. Porro Principes, qui ab anno 1018. usque ad annum 1753. quo hæc scribimus, in utroque foro Confluentibus jura dixerunt, sunt sequentes.

I. Poppo Marchio Austriæ, & Ecclesiæ Bambergensis Præpositus, renuntiatus Archi-Episcopus anno 1016. defunctus anno 1047. Hic ab Henrico II. in Confluentiæ possessionem immissus, ejusdem telonio S. Simeonem Trevirensē ditavit. Collegium S. Castoris decimis insignibus auxit: Sacrum Divi Beati corpus è Monasterio Dei-Paræ ad SS. Martyres prope Trevirim sito, transtulit ad Ecclesiam Montis, in quo nunc Cœnobium Carthusianorum conspicitur. Interfuit Concilio Aquisgranensi anno 1023.

II. Everhardus Comes Palatinus Rheni, & Ecclesiæ Wormatiensis Præpositus, electus anno 1047. à Judæis per incantamentum occiditur anno 1066. donationem Confluentini telonii, à Poppone Canonicis S. Simeonis factam, confirmavit literis, in Historia Trevir. Diplom. 10. 1. pag. 385. relatis.

III. B. Cuno sive Conradus Comes de Phül-lingen, Suevus, Ecclesiæ Colonienſis Præpositus, ab Henrico IV. Imperatore anno 1066. designatus Archi-Episcopus, in via versus Trevirim crudeli morte ab adversaria factione perimitur.

IV. Udo Comes à Nellenburg, Suevus, electus anno 1066. defunctus anno 1077.

Concilio Moguntino assedit anno 1071.

V. Egilbertus Bavarus, Ecclesiæ Passaviensis Præpositus: electus anno 1078. defunctus anno 1101.

VI. Bruno Comes à Bretten & Lauffen, Suevus, Ecclesiarum Trevirensis & Spirensis Præpositus: elect. anno 1102. defunct. 1124. Hic, ut Annales Trevirenses *Lib. 13. num. 25. & 73.* referunt: Hospitali domo S. Nicolai apud Confluentes originem dedit, oblato domicilio & sic dotato, ut non modò Clerum S. Florini, sed vicinos quoque vicos & municipia exemplo suo ad beneficium concursum induxerit. Basilicam S. Florini, vetustate propemodum abolitam, quadrato saxo, dilatato quoque ambitu, ad eum, quo visitur hodie, nitorem, decorémque adduxit. Adfuit Conventui Moguntino anno 1102.

VII. Godefridus patriâ Leodiensis, Ecclesiæ Trevirensis Decanus, elect. 1124. de quo Gestæ Trevir. pag. 195. hæc habent. Peracto anno Episcopatus sui insurgentibus contra eum quibusdam de Clericis suis, & introitum ipsius calumniantibus, tandem ad hoc causa est perducta, quod sciens suam infirmitatem ad hoc onus non sufficere, circa finem tertii anni, anno nimirum 1127. ab Episcopatu est absolutus: sive ut Browerus *Lib. 13. num. 80.* dicit. Posteaquam Sedem biennio, mensibus decem, diebus undecim occupasset, honore spontè abiit; atque singula factiosis concedendo, memorabili famâ modestiæ, in privatum vitæ genus descendit.

VIII.

VIII. Meginerus & à natali solo, & à splendore prosapiæ Godefrido non dispar, electus anno 1127. defunct. 1129. Hic Godefridi insectator acerrimus fuerat; indeque & forsitan minorati sunt dies temporis ejus.

IX. Albero de Monstreil, Lotharingus, Ecclesiæ Metensis Præpositus, Abbas Prümienfis, elect. anno 1131. def. 1152. Hic plerisque Germaniæ Proceres anno 1139. Confluentibus adesse fecit; quatenus tam suam quam Theodewini Portuensis Episcopi, & Cardinalis Legati auctoritate Conradus Suevus, dictus tertius, Imperator eligeretur, quod & dexteritas ejus, quæ insignis erat, evicit. Ut quoque inter vicinos Comites ac Nobiles gliscientia bella sopiret, anno 1152. solemnem hinc Conventum indixit; in quo dissidentes composuit, Diocesis suæ salutis consuluit, otium Reipublicæ peperit, ac dein, lapsis post hæc pauculis diebus, in optima pace quievit.

X. Hillinus de Falemannia, ex Diocesi Leodiensi originem trahens, & Ecclesiæ Trevirensis Decanus, elect. anno 1152. def. 1169. In Monte S. Beati Canonicis Benedictinos substituit. Arcem Ehrenbreitsteinianam & exstructâ turri munivit, & ædificiis ampliatis ornavit: in ipsa quoque durissima rupe vallem ac cisternam immenso labore, maximisque impensis excidit. Interfuit Conciliabulo Papiensi anno 1160.

XI. Arnoldus I. oriundus ex Provincia Colonienfi, & Colonia ad S. Andream Præpositus; elect. anno 1169. def. 1183, Anno 1179. Con-

cilio Lateranensi assedit. Dissidia, quæ ratione telonii inter Cives Confluentinos, & Trevirenses S. Simeonis Canonicos obversabantur, anno 1182. amicabili compositione diremit.

XII. Joannes I. Trevir. Imperialis Aulæ Cancellarius; elect. anno 1190. def. 1212. Hic mox dictum telonium suâ, & Imperatoris autoritate Ecclesiæ S. Simeonis noviter adjudicavit.

XIII. Theodoricus II. Comes Wiedensis, Ecclesiæ Trevirensis Archi-Diaconus, & Præpositus ad S. Paulinum; elect. anno 1212. def. 1242. Autoritas, quâ Præfectus seu Advocatus Imperialis in Confluentinos pollebat, sub hoc Pontifice corruit. Duæ è contra sacræ Familiæ, Dominicana nimirum & Minoritana, quibus Theodoricus non modò sedes, sed & favores impertiit, ibidem assurrexerunt. Interfuit Concilio Lateranensi anno 1215.

XIV. Arnoldus II. Comes Isenburgicus, Ecclesiæ Trevirensis Præpositus; elect. anno 1242. def. 1259. Confluentiam nullis hucusque mœnibus turribusque instructam, vallo & munitio-nibus aliquatenus obsepere cœpit. In Arce Ehrenbreitsteiniana, quia Clero suo molestus & inacceptus erat, suo pro tutamine frequentius residere consuevit.

XV. Henricus à Vinstingen, Lotharingus, Ecclesiæ Metensis Decanus, Ecclesiæ Trevirensi in dissidio ad annum 1266. Archi-Episcopus per Papam datus, moritur anno 1286. Hic Cives Confluentinos ob spreta & violata eorum jura, nec non ob castrum, quod intrâ Confluentiam

struere cœperat, refractarios habens, arctâ eos obsidione pacem amplecti, & obedientiam exhibere coegit. Monialibus S. Catharinæ Senensis licentiam conventualiter hic habitandi concessit.

XVI. Boëmundus I. à Warnesberg, Lotharingus, Ecclesiæ Trevirensis Præpositus; elect. in schismate anno 1286. confirmatus 1289. def. 1299.

XVII. Dieterus Comes Nassovius, Adolphi Imperatoris germanus frater., anno 1300. ex Ordine Sancti Dominici ad Archi-Episcopatum assumptus à Papa; def. 1307. Nostrates tributis & vectigalibus, nec non oneribus aliis nimium ab eodem pressi, & exinaniti, in motus demum, ac in secessionem labuntur: unde is copioso eos milite cingit, premit, extremisque remediis ad saniora, & ad jussa capeffenda reducit: quod tamen bellum, quia ærariam publicum vehementer attrivit, Dieterum in summam apud omnes invidiam, & criminationem adduxit.

XVIII. Balduinus Comes Luxemburgicus, Henrici VII. Imperatoris germanus frater, Ecclesiæ Trevirensis Præpositus; elect. anno 1307. def. 1354. Confluentiæ Curiam Ecclesiasticam, id est, Officiale proprium cum Sigillifero, Secretario, & Assessoribus: quin & pontem lapideum supra Mosellam præterfluentem dedit. In Monte S. Beati Benedictinis Canonicos, & his Cathusianos suffecit.

XIX. Boëmundus II. Comes Sarapontanus, Ecclesiæ Trevirensis Archidiaconus; elect. anno

1354. def. 1366. Hic mercatum annuum, qui à die 7^{ima} mensis Septembris usque ad *imam* Octobris Confluentiæ celebrari consueverat, in tempus magis opportunum, nimirum in dies, qui à Dominica tertia post Pascha usque ad Vigiliam Pentecostes decurrunt, suâ & Cæsaris autoritate reposuit.

XX. Cuno Comes à Falckenstein, Wetteravus, Canonicus Ecclesiæ Moguntinensis; elect. Coadjutor anno 1361. inthronisatus 1362. def. 1388. in Æde S. Castoris sub splendido monumento quiescit.

XXI. Wetnetus Comes à Kôffligstein, Cunonis nepos, & Ecclesiæ Trevirensis Archidiaconus; elect. anno 1388. def. 1418. in Ecclesia mox dicta anastasin universalem exspectat.

XXII. Otto Comes à Ziegenhein, Hassus, Ecclesiæ Trevirensis Præpositus; electus anno 1418. def. 1430. Judæos è ditione sua pellendo, Confluentiam quoque hac à sæce purgavit. Effigiem pientissimi hujus Præsulis ad vivum vide depictam in Histôria Trevir. Diplom. 10. 2. pag. 896. & seqq.

XXIII. Rabanus ab Helmsstatt, ex Palatinatu inferiore originem trahens, Episcopus Spiriensis; à Papa ad Archi-Episcopatum Trevirensen promotus anno 1430. hoc spontè deposito, ad Ecclesiam suam primam revertitur anno 1439. Plebs Confluentina hunc contra Principem tumultuariè, armisque apprehensis surrexit: Magistratus verò dolenter id ferens, dum supplicem Rabano se fuit, ac contactis

Evangeliiis jurat, motus hos se prorsus infcio ac invito fuisse coortos, veniam & clementiam infania plebeia reportat. Comes Virnenburgicus, infectator Rabani, hujus ante oculos Confluentiam parvam ignibus injectis devastat.

XXIV. Jacobus I. à Sirck, Lotharingus, Ecclesiæ Trevirensis Scholasticus; electus anno 1439. def. 1456. Fridericus III. ad instantias hujus Præfulis Confluentinis concessit, à Festo exaltatæ S. Crucis usque ad 28^{am} mensis Septembris agere nundinas eo prorsus jure, iisdemque cum privilegiis, quibus Francofurtenses suas agere solent. Idem Præsul in hujatē Minorum Conventualium regularem domum Minores Observantes immisit. Canonicis Regularibus S. Augustini ex Belgio huc accersitis, dum pro iis intra mœnia locum opportunum non reperit, sedem in Insula inferiori attribuit.

XXV. Joannes II. Marchio Badensis, ad regendam Trevirensē Ecclesiam à summæ Aedis Canonicis postulatus anno 1456. def. 1503. Mercibus Confluentiæ venditis accisam, sive tributum imposuit. A Civibus provocatus ad iram, ad supplices eorundem preces, necnon ad instantias Capituli Metropolitani, culpam remisit. In Arce Ehrenbreitsteiniana præaltum puteum laboribus immensis effodit. Accem Kerlichiam ab imo usque ad summum perduxit. Eremitas Augustinianos in Vallem Ehrenbreitsteinianam invexit.

XXVI. Jacobus II. Marchio Badensis, Pro-nepos Joannis, ejusque Coadjutor; elect. anno

1493. Regimen adiit 1503. def. 1511. ejus exuviae in Aede D. Florini sub nobili monumento servantur.

XXVII. Richardus à Greiffenclau, Ringavus, Ecclesiae Trevirensis Cantor; elect. anno 1511. def. 1531. Judæos ab Ottone proscriptos in Confluentiam reintroduxit.

XXVIII. Joannes III. à Metzenhausen, Ecclesiae Trevirensis Præpositus; elect. anno 1531. defunct. 1540.

XXIX. Joannes Ludovicus ab Hagen, Lotharingus, Ecclesiae Trevirensis Præpositus; el. anno 1540. def. 1547. Carolum V. exquisito hic apparatu excipiens, interrogabatur in lingua vernacula; ipse ne Trevirorum Dominus esset? Cui is; non Trevirorum Dominus, sed Cæsareæ Majestatis Vestrae fidelis sum cliens: atque ita Carolum in Arcem Ehrenbreitsteinianam deducens, nonnullis ei diebus, quidquid honoris ac obsequii comminisci poterat, magnificè & affluenter exhibuit.

XXX. Joannes IV. Comes Isenburgicus, Ecclesiae Trevirensis Archi-Diaconus; el. anno 1547. def. 1556. conditus in Ecclesia D. Florini. Concilio Tridentino assedit anno 1551.

XXXI. Joannes V. à Petra, Ecclesiae Trevirensis Archi-Diaconus; elect. Coadjutor anno 1555. ad S. Sedem levatus 1556. def. 1567. Cives cum Scabinis & Senatoribus existimantes se liberos, Cæsarique immediatè subjectos, adeoque magno in errore versatos, quod hucusque paruisent Episcopo, dum in apertam secessio-

nem prorumpunt, ac Joannem mœnibus arcere, ingressuque in urbem prohibere non timent, ipsos is arcto primùm obsidio, dein commœtu intercluso, ac demum conditis legibus sapere, sese dedere, ac obsequi docet. Superbo funere in Ædem B. Florini delatus, in dextra Chori parte quiescit.

XXXII. Jacobus III. ab. Eltz, Ecclesiæ Trevirensis Decanus; elect. anno 1567. def. 1581. In formula juramenti, quod Neo-Electus emisit, promisit; velle se, semel quovis anno sacros Ordines apud Confluentes conferre. Ob hæreses circumquaque grassantes prohibuit, ne quis hic in civem reciperetur, nisi se Catholicum coram deputatis testibus fidei professione probâisset. Sacris & nobilibus Ordinis Cisterciensis Virginibus ab hinc in Insulam inferiorem translati, Patres Societatis substituit. Monialibus, quæ S. Augustino litant, noménque à S. Barbara tenent, hic locum indulxit. Utrique hujati Judicio, Aulico nimirum & Ecclesiastico, graves ac peruriles leges præscripsit.

XXXIII. Joannes VI. à Schönenberg, Ecclesiæ Trevirensis Præpositus; elect. anno 1581. def. 1599. Confluentinum PP. Societatis Collegium, Scholas, & Scholasticos variis privilegiis muniit. In causis civilibus ab hujatis Officialatûs sententia ad Parlamentum Aulicum appellari posse, decrevit. Profugas Andernacenses S. Dominici Sanctimoniales Franciscanis Virginibus in Martiniano Cœnobio junxit.

XXXIV. Lotharius à Metternich in Beil-

stein, Joannis V. ex sorore Nepos, Ecclesiæ Trevirensis Scholasticus; elect. anno 1599. def. 1623. Domum Metternichiam, quam in fundis quatuor civicarum justo pretio comparatarum ædium assurgere fecerat, privilegio Sedis Equestris ornavit. Præscripsit modum exequendi sententias ab hujate Officiali latas. Telonium Mosellanum abhinc Hammersteinium ex Cæsaris licentiâ transtulit.

XXXV. Philippus Christophorus à Soëteren, Ecclesiarum apud Nemetes Episcopus, & apud Treviros Præpositus; elect. anno 1623. defunct. 1652. In pede Ehrenbreitsteinianæ rupis sibi, suisque Successoribus Electorale Palatium: in contigua verò Valle Capucinorum Sodalitio Cœnobium cum Ecclesia posuit. Fidei ac custodiæ tam Gallicæ, quàm Suevicæ Confluentiam, Ehrenbreitsteinium verò soli Gallicæ ad Imperatoris luctum, & ad Imperii detrimenta commisit. Accersito Sueco milite Confluentiam obstrepentem compressit.

XXXVI. Carolus Casparus à Petra, Ecclesiæ Trevirensis Cantor; cooptatus in Coadjutorem anno 1650. inthronizatus 1652. defunct. 1676. Confluentiam & Ehrenbreitsteinium fossis, turribus, & aggeribus novis communiit. Capucinorum in Valle Cœnobium & Ecclesiam, quæ gallicis flammis perierant, è cineribus reasurgere fecit. Theresianis, sive Carmelitis discalceatis intrâ Confluentiam locum attribuit.

XXXVII. Joannes Hugo ab Orsbeck, Caroli Caspari ex sorore Nepos, Episcopus Spi-

rensis, & Ecclesiæ Trevirensis Archi-Diaconus, in Avunculi sui Coadjutorem assumptus anno 1672. regimen capessit 1676. def. 1711. Confluentiam novis amplioribus academicis Scholis, nec non trajectitio Ponte : Ehrenbreitsteinium firmissimâ turri : Vallem Ecclesiâ S. Crucis, ac juribus Parochialibus auxit. Sanctimonialibus Augustinianis in civitatis angulo versûs Orientem latentibus, in platea Lôhrana Cœnobium magis commodum struere, ac inhabitare permisit. Hospitale verò, quod usque huc ibidem extiterat, transtulit ad spacia, à quibus mox dictæ Moniales recesserant. Gallis Confluentiam obsidione prementibus, æneum se murum objecit, ac inglorios in Franciam remeare coegit.

XXXVIII. Carolus Dux Lotharingæ, Episcopus Osnabrugensis; elect. Coadjutor anno 1710. inthronizatus 1711. Viennæ in Austria anno 1715. variolis confectus occubuit.

XXXIX. Franciscus Ludovicus Dux Neoburgicus, Episcopus Wormatiensis & Uratislaviensis, Supremus Ordinis Teutonici Magister, Præpositus Elvacensis; Coadjutor Archi-Episcopi Moguntini, anno 1716. ad Cathedram Trevericam Canonicis votis evectus, gradum dein ad Moguntinam, hujus Præsule demortuo, fecit anno 1729. pro Pastoribus emeritis sedem, pro junioribus Clericis Seminarium, id est, scientiæ ac virtutis palæstram, pro Judicibus Ecclesiasticis Tribunal, sive Curiam sub uno eodémque tecto prope civitatis mœnia, quæ Orientem respiciunt, à fundamentis ad fastigium

usque percoluit, eâque dote, quæ decuit, instruxit. Orphano-trophium quoque ut surgeret, unâ cum Carolo Casparo Comite de Petra operam sollicitam & usque nunc conducentem impendit.

XL. Franciscus Georgius Comes de Schônborn, Ecclesiarum Trevirensis Præpositus, Colonienſis Scholaſticus; Spirenſis Decanus; elect. 1729. A Feria ſecunda poſt Dominicam Lætare uſque ad Sabbatum ante Dominicam Palmarum, nec non à XVII. uſque ad IV. Cal. Septembris nundinas, quotannis ſolemniſter hîc agendas inſtituit. Inſignibus munimentis Ehrenbreitſteinium, Kerlichium verò percommotis & magnificis ædificiis auxit. Schônbornianas delicias, nec non ampliffimas ædes, quæ in atrio Palatii Electoralibus nunc Dicasteriis ſerviunt, à fundamentis aſſurgere fecit. Capellam aulicam in formam ampliorem redegit. Rupi deciduæ murum, validumque fulcrum ad Aulæ tutamen objecit. Prolixiora hujus Principis elogia videantur in *Hist. Trevir. Diplom. 10. 3. pag. 208. & ſeqq.*

En itaque *quadraginta baſes argenteas!* Ex 26. quibus Confluentia in ſæculum octavum ſuffulta, populo nunc ac commercio, ſacris & profanis molibus, vallis ac mœnibus, quin & utroque ſic eminet foro, ut cum Trevitorum Auguſta in arenam deſcendere; pro palma cum ipſa certare, demumque compellari valeat; prout olim Magni Leonis facundia è ſuggeſtu affabatur Romam.

Quadrageſta hi Præſules ſunt Patres tui, verique Paſtores, qui te regnis cœleſtibus inferen-

dam multò melius, multoque felicius condiderunt, quam illi, quorum labor prima tibi fundamenta locavit. Serin. 1. in Natal. Apost.




CAPUT V.

DE REGALIBUS

Quæ Archi-Episcopis intra Confluentiam competunt.

Jura & Privilegia, quibus illustriores plerumque personæ, Civitates quoque liberæ, nec non aliæ hinc inde Communitates in Ditionibus Imperii gaudere noscuntur, appellantur Regalia, eò quod sint munera, à Regibus in ipsas profecta: horum autem etsi non pauca, neque modica ex religiosa Cæsarum, Regumque munificentia dimanarint in Archi-Præsules nostros, de iisdem tamen sigillatim hic agere, & forum nostrum excedit, & constitutis repugnat: ea proin sola proferimus, quæ intrà Confluentiam, ac sub expresso Confluentiæ nomine Archi-Episcopis attributa leguntur: quoad cætera verò Lectorem remittimus ad Historiæ Trevirensis Diplomaticæ *to. 1. & 2.* ubi singula suis locis indicata & illustrata reperiet.



§. PRIMUS

De Jure Telonico.

Regale primum atque præcipuum, quo Archi-Episcopi nostri intrâ Confluentiam gaudent, est facultas, sive jus in terra æque, ac in præterfluentibus aquis à transeuntibus, vel vecturas ducentibus, nec non à præternavigantibus exigendi vectigal. Constat id primò ex sic sonante Diplomate Henrici II. *Pro remedio anime nostre, nec non dilectissima Conjugis nostra Cunigunda, videlicet Imperatricis Augusta, Trevirensi Ecclesia... Confluentiam... cum Telonio tradimus, atque firmiter donamus... Anno Incarnationis Domini nostri JESU Christi 1018. Indict. 1. Anno Regni Domini Henrici Romanorum invictissimi Imperatoris Augusti xvij. Imperii autem v. actum Boderebrunnen (:PADERBORNÆ:) feliciter.* Constat secundò ex charta Archi-Episcopi Popponis, quâ Collegio S. Simeonis telonium hoc donat, & ait: *Telonium, quod à prætereuntibus navigio, & in foro Confluentino solvitur, cum omni jure suo liberè in manu nostra Imperiali concessione tenentes &c.* vide Historiam Trevir. Diplom. to. 1. pag. 354. 379.

Erant hæc sancta & aurea illa tempora, in quibus Cæsares, Reges, ac Principes divini honoris dilatandi gratiâ Sacerdotium stabiliebant Imperio, additis attollebant Ecclesias, suis-

que sibi substantiis coronas fabricabant in ecclesiis; sed & Ecclesiarum Antistites, quibus dederat Deus *divitias, & substantiam, & honorem.* Eccle. 6. lacris frequenter Collegiis & Aedibus, prout necessitas vel merita eorundem monebant, aderant luculentis auxiliis. Vidit id, ut diximus, & etiamnum prædicat S. Simeoni intra Trevirim dedicata Basilica, ceu cui præmemoratus Poppo ad annum 1042. per solemnes, in Confluentina nimirum S. Castoris Ecclesia coram Clero & Populo confectas, appensisque Sigillis roboratas tabulas telonium Confluentinum attribuit; Henricus verò hujus nominis IV. tam raræ pietatis donum anno 1104. ratum, validumque voluit, ac, quid pro mercibus sigillatim pendendum, decrevit.

Circa quæ tamen advertendum est primò; mox dictæ donationis tabulis, hanc clausulam fuisse insertam; *excepto, quod Oeconomus Episcopi in Festo Beate Nativitatis Domine nostre accipiet medietatem telonii per unum diem integrum, & duos dimidios*; quæ idcirco adjecta & reservata videntur, quatenus posteritas inde dignosceret, beneficium tam pingue ac nobile nonnisi ex pietate Episcopi, & non aliunde, in Collegium Sant. Simoneum fluxisse.

Advertendum secundò; quod, cum aliquando Confluentina Communitas quartam telonii hujus partem Canonicis S. Simeonis negandam, & ædificiis seu publicis suis fabricis debitam, applicandamque contenderet, ipsoque facto partem illam sui juris efficeret, Arnoldus I. adhi-

bitis sedulis pastoralibus studiis, ad compositionem amicabilem dissidentes partes induxerit; subindéque Confluentini cives, posthac se nunquam contra jura Canoniceorum acturos, porrectis Arnolfo manibus, pro se, posterisque sponderint: Canonici verò *pro tam amabili & sincera compositione, ad conciliandum sibi posteritatis ipsorum favorem, & ad comparandos prædii alicujus redditus, ob facta compositionis memoriam, Confluentinis civibus sexaginta marcarum pecuniam dederint.* Acta hæc fuere in Civitatis Prætorio Anno Domini 1182. præsentem Arnolfo Archi-Episcopo, præsentem quoque Roberto Comite Nassovio, Confluentinorum Imperiali Præfecto; qui coactis illic universis civibus sub pœna banni sui districtè inhibuit, ne quis in posterum super sæpè dicto Fratrum, idest, Canoniceorum istorum telonio querimoniam ulteriorem moveret, aut ipsis quoquo modo molestiam, seu gravamen inferret.

Advertendum tertio; constare quidem partim ex Popponis Archi-Episcopi, partim ex Henrici IV. Imperatoris superius allegatis tabulis, quod ex telonio Confluentino dimanantia commoda, si illa Oeconomæ-Episcopalis excipias, S. Simeonis Collegio fuerint ad alsem donata: at verò, si aliæ quoque chartæ legantur, ex iisdem patebit, hæc ei lapsu temporis ex parte fuisse subtracta, & retracta ad Archi-Præsulis fiscum; una harum chartarum est illa Joannis, hujus nominis Archi-Episcopi primi, expedita ad annum 1193. altera est Ludovici Imperatoris IV. data ad an-

num 1314. Ex priore liquet, quod Mercatores, temporibus ejusdem Joannis Confluentiæ negotiantes, Ecclesiæ S. Simeonis pendendos solum habuerint quatuor Confluentinos, sive duos Colonenses denarios. Ludoviciana verò dicit; *Archi-Episcopus, sive Ecclesia Trevirensis ex Nostra, & aliorum Prædecessorum nostrorum, Romanorum Principum concessione perpetuò pro qualibet carrata vini, & aliis mercimoniis... in Confluentia super Rhenum quatuor grossos Turonenses ratione telonii recipit, ac recipere debet.* Porro sicut tunc telonici juris portio ad Archi-Episcopum rediit, ita Ipsum, sive Ejus ærarium telonii nunc totalitate gaudere, nemini non constat; latent è contra tituli, modi, ac tempora, quibus sæpe dicta Ecclesia iis juribus fuit exuta.

Advertendum quartò; quod ex concessione Caroli Imperatoris IV. ad annum 1354. nec non ex alia Friderici III. ad annum 1442. Archi-Episcopis Trevirensibus facta, sicut & ex edicto, ad annum 1616. per Lotharium Archi-Præsulem edito, colligere liceat, quod uti nunc, ita & à pluribus retrò sæculis Confluentiæ duo semper telonia fuerint, unum juxta Mosellæ, alterum juxta alveum Rheni: quòdque istud annis sequentibus tum ex indulto Cæsarum, tum ex Collegii Electoralis consensu fuerit translatum in Hammerstein: inde verò quod tractu temporis in Engers, & ab hinc fuerit de-nuo Confluentiam positum, & chartæ publicæ, ac modernæ experientiæ satis liquidò monstrant.

Advertendum quintò; quod litteræ, quibus Henricus à Vinstingen, in Episcoporum Trevirensium serie 87^oimus, asperfas sibi labes coram Papa emaculare contendit; quæque in Historia Trevir. Diplom. 10. 1. pag. 767. & seqq. referuntur cum Papalibus, ipsum postulantibus literis, apertissimè dicant, telonium Confluentinum quotannis mille olim marcis Archi-Præfulis fiscum auxisse: unde, dum abundantiora, & intelligentiora nunc tempora vivimus, id quoque jam longè ditius in eundem fiscum influere, in dubium nemo prudens vocabit.



§. SECUNDUS

De Jure cudendi Monetam.

Alterum Regale, quod apud Confluentes Archi-Episcopis, & Electoribus Trevirensibus competit, est jus cudendæ monetæ, anno 1018. concessum ab Henrico II. & anno 1045. confirmatum ab ejusdem nominis Imperatore III. quorum tamen Diplomata de solius argenteæ, non autem de percussura monetæ aureæ veniunt intelligenda: jus namque auream monetam cudendi, Carolus IV. in Bulla Aurea Tit. 10. §. 2. Electoribus demum concessit.

Porro nummos, qui Conflentiæ ex officina monetaria ad hæc usque tempora sub Archi-Episcopis nostris in auro prodiisse leguntur, percuti

percuti jusserunt Otto à Ziegenhein, Jacobus Badensis, Carolus Casparus à Petra, Joannes Hugo ab Orsbeck, Franciscus Georgius à Schônborn. Nummis argenteis ibidem cufis æraria cimmeliâque dirârunt Boëmundus Sarapontanus, Wernerus à Kônigstein, Lotharius à Metternich, Carolus Casparus, Joannes Hugo, Franciscus Ludovicus Neoburgicus, & Franciscus Georgius Schônbornius. Primus, qui nummos aureos, quos appellamus Ducatos, cudi fecit, est Carolus Casparus à Petra: nummi námque aurei, ab ejusdem Antecessoribus Confluentiæ vel alibi cusi, duobus solùm Rhenanis argenteis florenis æquivalebant. Idem ipse Elector de argento patrio ex eadem officina prodire fecit Imperiales, vulgo *Reichsthaler* / hâc inscriptione signatos. *Donum Dei ex fodinis Vilmariensibus.* Super quibus consuli, & legi poterit *Historia Trevir. Diplom. to. 1. pag. 355. 382. 589. to. 2. pag. 886. & seqq. to. 3. pag. 275.*

§. TERTIUS

De Jure recipiendi & protegendî Judæos.

Tertium Archi-Præfulum nostrorum Regale est jus, seu facultas intra Confluentiam

D

admittendi, retinendi, nec non protegenti Judæos; ita ut tributum ab iis exigere, vim ipsis inferre, eos è civitate ejicere, aut alio quovis modo premere vel affligere, alteri inferiori non liceat; constant hæc ex charta Caroli IV. quæ ad annum Christi 1356. Boëmundo II. privilegium hoc non tam impertit, quàm aliàs indultum confirmat. Hebræorum quippe genti ante hujus Boëmundi tempora tam apud Treviros, quàm Confluentes stabilia fuisse domicilia, liquet tum ex iis, quæ Browerus ad annum 1060. de nece Everhardi recenset, tum ex Magistratûs Confluentini statuto, quod extat apud Illust. Honthemium in *Hist. Trevir. Diplom. to. 1. pag. 819.* quóque ad annum 1283. Cal. Octob. decernitur; quod, si quis in mortem vel damnum Judæorum conspirare, aut quid machinari præsumplerit, tam quoad personam, quàm quoad bona sit prolapsurus in vindicem Archiepiscopi manum.

At nunc enascitur quæstio; an à tempore Ottonis de Ziegenhein, qui anno 1419. in limine sui regiminis in omni sua ditione judaicum nomen expunxit, an, inquam, à tunc usque ad Richardum de Greiffenclau Confluentia suis aliquando civibus Judæum cohabitantem conspexerit? Ad quod negativè respondendum putamus; tum quia à decessu Ottonis usque ad mox dictum Richardum non est ostensibilis Electoralis charta, quæ quid de Judæis in Conflentiam reintroductis, vel reintroducendis disponat; tum quia Richardo, locum iis

ibi dare paranti, constantem renisum, quantum licuit, Magistratus objecit, prout legitur in ipsiusmet Richardi diplomate, quo quinque Judæorum familias, nonagesimo nono post eorum expulsionem anno, Confluentiæ readmitti præcepit. Videantur superius dicta ad calcem cap. 2. nec non Historia Trevir. Diplom. 10. 2. pag. 608.



CAPUT VI.

De Legibus Urbi Confluentinæ peculiariter datis.

Fluvius, si tranquillus, si placidus eat, si itum intrâ suum alveum compositè ac innoxie teneat, jugi fruitur facultate cundi: at verò si tumeat, si litora perniciosè transcendat, moles sibi & aggeres objici ferat, oportet: simili prorsus modo, si populus intrâ legum aut consuetudinum limites, quæ pacis, quæ juris, quæve moris sunt, cogitet & agat, salus ejus aliis adminiculis non eget; at verò si contra Principem vel Magistratum assurgere, si indubita vel inassueta prætereundere, si inconcessa moliri, aliisque modis prævaricari præsumat, æquitas quæ & necessitas poscent, ut strictiores ei

leges, velut aggeres, vis major opponat. Suis id quondam damnis Confluentini sensere, ac non soli; Trevirim namque ac Boppardiam aliquando cum ipsis in simili, quin & in graviore damnatione luxisse, legimus in Trevirensium fastis: interim verò dum hic de legibus eorundem tractamus, præsciendum venit, quod non tantum vindicativa Principum justitia recalci- trantem quandoque Confluentiam legibus velut fræno domuerit, sed quod & morigeram atque compositam eorundem providentia salutaribus ordinatis instruxerit; idque nunc, prout per historiæ nostræ duces accepimus, cum Lectore communicamus.

Henricus à Vinstingen, ut amputaret incommoda, quæ Antistites nostri in suo ad ædem suam Ehrenbreitsteinianam ascensu frequentius experiebantur; ut suam quoque personam contra vim & pericula, quæ metuebat, in tuto locaret: ut & arctiore fræno Confluentiam audentiolem compesceret, Castrum, die Bürg hodièdum & olim dictum, anno 1280. intra ipsam ad Mosellæ ripam cœpit erigere; at verò quia novum hoc opus Nobili æque ac ignobili civi sinistras ingenerabat ideas, nullusque non id ægrè molestèque ferebat, cœpère tandem in murmurâ non modò prorumpere, sed & in turbas seussini coire; fœdera exterorum accersere, arbitrato suo publicas munitiones dirigere, quin & eò prolabi, ut privatis etiam in conventiculis, Antistitem è medio tollere, excœcatâ ratione concluderint.

Henricus, qui suo ex genio satis igneus, per-quem versutus, ægréque placabilis erat, ut primùm hæc subodorat, apertius in flammâ prorumpit, militem copiosum conscribit, contra cives adducit, eos premit, angit, & arctat; dùmque his sub angustiis Nobiles, cæteræque motuum capita fugâ se extricare norantur, residui suo se Principi subdere, ac dedere sub hac conditione resolvunt, ut nimirum inter Ipsum & cives enatæ hucusque lites per Moguntinensium demum, & Agrippinensium Præsules, nec non per supremum Equitum Teutonicorum Magistrum, cœu per arbitros conjunctim deciderentur: qui proin anno 1281. in Curia Confluentina convenientes in unum, condidêre decreta, dederuntque mandata sequentia. 1^{mò}. Milites, Scabini, cæterique cives D. Henrico, ac Successoribus ejus; tanquam veris & legitimis suis Dominis, reverentiam & obedientiam, prout debent, exhibeant. 2^{dò}. Omnia juramenta, colligationes, & fœdera, in Ecclesiæ Trevirensis præjudicium facta, retractent, nec unquam reassumere, vel renovare præsumant. 3^{tiò}. Surrectioni novi operis sive Castri nullum posthac impedimentum obmoveant. 4^{to}. Civitatem muris, fossis, ac vallis, si voluerint, valeant munire. 5^{to}. Juribus ac privilegiis, quibus hucusque gavisî & usi fuêre, gaudeant ac utantur deinceps, nec in libero eorundem usu à D. Henrico, aut à Successoribus ejus quoquo modo turbentur.

Initâ sic Confluentiam inter ac Præsulem tam

sanctâ, & utrisque proficuâ pace, Hic æque ac ista nil nisi prospera exin oritura sperantes, nil quoque turbidi, nil adversi timebant: sed en infelicitas & commotio nova! Nobiles quippe aliique cives, quos malæ conscientiæ stimulus solum vertere, capitâque salvare compulerat, res denuo novas comminisci, actiores motus ciere, ac contra Principem non verentur impotenter insurgere: unde & is, quatenus inita nuper fœdera in perpetua stabilitate persisterent, postulat à civibus cæteris, ab iisque non difficulter reportat; quod rebellibus his nullus unquam inter ipsos indulgendus sit locus: quod illis nil unquam gratiæ, nil juris favendum: quod si revertantur, mox consignandi sint in vindicis justitiæ manus: quodque & in illos, qui eorundem causam defendendam assument; vel qui armâ ad iis opitulandum capeissent; vel qui ad concitandam plebem ære campano sonum tumultuarium edent; aut qui Prætori in illorum captura resisterent, vel opem postulatam non conferent; aut qui contra Principem conjurationibus, aliisque machinationibus surgent, is ipsosprehendere, tenere, ac contra eos, si ex ore duorum testium de eorundem delicto constiterit, prout ipsi libuerit, procedere possit. Ad quorum plenius perpetuumque robur in Curia Confluentina confectæ, ac à pluribus viris illustribus obsignatæ sunt tabulæ, per extensum relatæ in *Historia Trevir. Diplom. 10. 1. pag. 819.* brevius autem adductæ in *Annalibus Browerianis Lib. 16. Num. 107.*

Confluentiæ rebus publicis Archi-Episcopum inter & cives per longiora tempora in optima pace repositis, hæ noviter his modis turbantur. Dieterus, Adolphi Nassovii Imperatoris germanus frater, ac in locum Hentici à Virnenburg, in Archi-Episcopum canonicè electi, ex Papali dispositione suffectus, ut Albertum Regem, æmulum sui fratris Adolphi, clam & palam continuis insectationibus petit: ut omnem illi nervum jam patriis, jam exteris armis, undequaque congestis, opponit, Confluentiam inde, prout tributis identidem indictis exhaurit, ita querimoniis, impatientiis, & indignationibus implet, quæ proin jugi tam gravis pertæsa, id tandem excutere, ac fidem, quam primùm Virnenburgico ad annum 1299. electo, at à Papa, quæ Bonifacius Octavus erat, necdum confirmato Præsuli, subindèque Nassovio, Bonifacio mandante, jurârat, huic incipit apertè negare.

Dieterus peracerbo hæc animo coquens, bilique fermentescenti concedens, militem exemplo conscribit, arctè Confluentiam cingit, assultibus crebrioribus premit; indèque à civibus celerem deditionem extorquens, ipsos novis se juramentis obstringere, ac expressius profiteri compellit, quod in civilibus æque ac in ecclesiasticis Archi-Episcopo morem gerere; quod in perpetuum ad id se devinctos agnoscere: quodque id in opere nunquam non morigerè ac fideliter ostendere velint. Acta sunt hæc in Curia civica anno Domini 1304. in Sabbato ante Festum S. Joannis Baptiste; quibus hæc

epiphonematis loco pro Principe; *Patres! nolite ad iracundiam provocare filios vestros. Ephes. 6.* ista pro populo subnectenda putavimus; *noli resistere contra faciem potentis, neque coneris contra ictum fluvii. Eccli. 4.* nec non & ista *1. Pet. 2. Subditi estote in omni timore Dominis, non tantum bonis, sed etiam discolis, sive ut Glossa dicit, asperis quoque ac malè moratis.*

Benè posthac moratam suo se Principi Confluentia probans, in omni erga eum cultu in tertium usque sæculum observantissima & florentissima stetit: at verò cùm per Lutheri ac Calvinii corruptissima dogmata, ex iisque dimanantia perniciofa concilia vix non tota obstreperet, recalcitraret, & armaretur Germania, Confluentia quoque cum Boppardia & Treviri vix non in similem insaniam lapsa, contra Joannem à Petra non timuit arroganter assurgere, cristas arrigere, quin & ad ipsam introite volenti portas impudenter occludere, protit præter Browerianos Annales inedita quoque Trevirotum Gesta sequentibus produnt. Anno 1560. Confluentes in seditionem prolapsi, Archiepiscopi & Principis sui imperata facere detrecabant; quos Archiepiscopus anno 1561. obsidione & rerum omnium penuriâ domuit. Datis ergo legibus, & recepto ab eis sacramento de non amplius deficiendo, pax reddita, civibûsque & auctoribus gratia, & admissorum oblivio data est. Simili modo Boppardienses domiti sunt: ut autem Trevirensium motibus, qui seditionibus plebem præparare pergebant, intentius insistere posset, prius

Confluentinos pacatiores & fideliores sibi facere studuit, quàm bello Trevirenses oppeteret. Humaniter ergo Confluentinos tractare cœpit, concedendo, quaecumque rationabiliter postulassent, invitando etiam honoratiores ad sua convivia.

Porro inter leges, quas Trevirorum fasti memorant post hæc dissidia Confluentibus latis, ista utique principalior fuerit, quæ Magistratum Urbis ex ejusdem Præfecto sive Satrapa, ex Prætore ac quatuordecim Scabinis, ex duobus Consulibus, nobili videlicet & non nobili, demùmque ex Senatoribus è classe civium hunc ad gradum levandis, constituit atque componit: his verò quid agendum, vel quid omittendum incumbat, simili tunc cura hic Princeps tum fusè tum & accuratè sancivit. Ubi tamen notandum, quod, etsi Joannes à Petra leges has primus ediderit, mox dicta tamen Magistratûs forma non ab ipso solo, sed & ab Antecessoribus ejus suum ortum ordinemque deriver: eam namque longè ante Joannis tempora, si non ex toto, ex plurima tamen parte extitisse ac floruisse in Confluentium Curia, novimus ex iis, quæ referuntur in Historia Trevir. Diplom. to. 2. pag. 615. 865. & seqq.

Visis hucusque dissidiis inter Principem ac cives enatis, visis quoque legibus adversus ea providè, ac salubriter latis, offendimus nunc ad controversiam, sive ad querelam, quam Confluentium Prætor & Scabini contra non nobilem Consulem & Senatores, & hi contra istos anno 1527. sub Richardo de Greiffenclau

ad tribunal Electorale tulerunt: hi autem motus unde profluxerint, quibúsque modis fuerint à Richardo compositi, indicat ejusdem decisio, quâ, quid in inspectione interempti corporis, in statuendis ponderibus ac mensuris, in denuntiatione novi operis, circa sylvam glandariam, quoad ligna pro ædificiis erigendis cædenda, quoad præcedentiam sive sessionem, nec non quoad conventiones in Curia, quid, inquam, quoad ista Prætori ac Scabinis, quidque Consuli ac Senatoribus competat; quid quoque ab ipsis, si vel Consul vel Civis delinquat, observari oporteat, declaratur per novem articulos, relatos in Historia Trevir. Diplom. to. 2. pag. 615. & seqq.

Porro sicut hic Princeps, ejúsque prædecessores Joannes à Petra, Dieterus Nassovius, & Henricus Vinstingius latis legibus atque decretis salutis publicæ quam-optimè consuluerunt, ita Joannes Badensis ditando civitatis ærario, nec non struendis ædificiis, aliisque accrementis publicis suas curas sacravit, dum ad annum 1462. consentiente ac concurrente Magistratu decrevit; ut Fiscus de qualibet marca, à mercium venditore receptâ, duos nummos: pro cado autem vini, in civitatem advecti, duos deinceps albos tam ab exteris, quàm ab inquilinis exigeret; illiúsque tributi sive accisæ pars una Principi, duæ cæteræ competerent Civitati per proximè sequentes duodecim annos; atque his lapsis pars una in hujus, duæ aliæ in ærarium Principis deportarentur.

Jacobus ab Eltz pacis non modò, publicique commodi, sed & avitæ religionis zelosissimus ac vigilantissimus cultor, dum quorundam suâ in Metropoli à fide nuper desciscientium ausus, quin & Belgium diebus his ab hæresi susque deque jactari considerat, Confluentiam hæc contra mala tempestivè præmunire contendit, atque idcirco ad annum 1572. edictis pastoralibus ordinat, & vetat, ne quis cooptetur in illius civem, & ne cui eam inhabitandi licentia fiat, nisi præviè coram testibus ad id deputatis in fidem Romano-Catholicam juxta formulam præscriptam jurarit.

Post hæc ad cultum justitiæ, in utroque deinceps foro attentius strictiùsque zelandum, spiritu principali se vertens, Parlamentum aulicum æque ac ecclesiasticam Curiam imbuat sapientissimis legibus: sed & Lotharius à Metternich ipsa hæc vestigia premens, dum anno 1617. negligentias & incurias detegit, ob quas utraque Civitatis Curia quoad modos exequendi sententias ab Officiali latas, corrigi, & emendari poscebat, serpentibus inde malis obviam per triplicata decreta procedit. Vide Hist. Trev. Diplom. to. 3. pag. 47. 48. 253.

Cæterum præter dictas hucusque leges, aliis quoque sancitis, placitis, atque decretis grammatophylacium Confluentinum instrui, dubitare non licet: horum autem sciendorum gratiâ cum istud subire non detur, illaque hic loci referre, sit extra sphæram activitatis nostræ, hinc tandem huic capiti hunc finem imponimus; quod nem-

pe Confluentia tergeminae suos erga Principes inobservantiae ac inobedientiae rea, reatus hos totuplicis fidei non vulgaribus argumentis absterferit : & quidem 1^{mo}. quando ad annum 1347. nobilior & potior civium portio , ut primum audit, Reinhardum Westerburgicum Comitem dolis & astu cepisse Grenzavienſe Balduini ſui Principis caſtrum , urgente erga illum fide , arma ſine moraprehendit , ac viriliter , at non aequè feliciter , in campum contra hoſtes proceſſit. 2^{do}. Quando Richardo , quem Franciſcus à Sickingen , rebellium Luthericoſarum ductor , anno 1523. infeſtis copiis intrà Trevirim cingebat atque premebat , ſexcentos & ſeptuaginta milites ſuis ſumptibus auxiliarios miſit. 3^{tiò}. Quando Philippum Chriſtophorum , anno 1645. ex decennali exilio reducem , anteaquè ſibi in pluribus ſat durum , & inclementem , omni tamen , ut ait Maſenius in continuatione Annalium Trevirenſium *Lib. 25. num. 75.* omni , inquam , honore , plaufuque , & obſequio , quò deſideratiſſimus patriæ pater excipi potuiſſet , excepit. Confluentia itaque ſicut cum D. Petro ſuis à Dominis triplicatâ negatione reſceſſit , ita & cum illo abſceſſuum ſuorum maculas totuplici dilectione purgavit.

Diximus antea ; quod Confluentia tergeminae ſolùm ſuos erga Principes inobservantiae ac inobedientiae comperta ſit rea ; quarta enim ejus ſeceſſio , quam Philippi Chriſtophori impropriis procedendi modis , ac inconditis imperatis ob-

jecit, specialiter ei imputanda & exprobranda non venit; eòquod mirabili & aspero hujus Principis genio omnis ferè cum ipsa obstreperit Trevericus orbis, ipsèque Philippus Christophorus vix non semper induerit, ac egerit personam illius, de quo olim Scriptura; *Manus ejus contra omnes, & manus omnium contra eum. Gen. 16.*



CAPUT VII.

De nonnullis Confluentiæ Privilegiis.

Privilegium definiti solet; jus singulare contra jus commune concessum: cujusmodi juribus Confluentiam ab antiquis retro temporibus vel per Cæsares, vel per Archi-Episcopos fuisse donatam, liquet ex pervetustis inter ipsam, & Henricum Vinstingium initæ concordiæ tabulis, ceu in quibus inter alia statuuntur & ista. *Militēs, Scabini, & Oppidani Confluentini utantur, & gaudeant omni jure in ipso Oppido Confluentino, prout hactenus sunt gavisi: nec ipse Dominus Archi-Episcopus, vel sui Successores, Militēs, Scabinos, & Oppidanos Confluentinos super eo impediunt deinceps, gravent, aut molestant.* Hæc

autem jura, sive privilegia quæ seu qualia iisdem temporibus fuerint, tabularium Confluentinum, si interrogetur, forsitan edicere poterit; dum interim nos alia quædam, eaque partim obsoleta, partim adhuc usitata, seu valida, ex Historia Trevirensi Diplomatica, nec non ex Annalibus Browerianis depromimus, in seriem sequentem redigimus, ac cum Lectore communicamus.

Primum itaque Confluentiæ privilegium seu jus quondam erat, publicum quot annis mercatum, sive solennes nundinas à Dominica tertia post Pascha usque ad Vigiliam Pentecostes agendi eo prorsus ritu, jure, ac privilegio, quibus Francofurtum suis in nundinis uti, gaudereque consuevit: Privilegium hoc Carolus IV. anno 1356. Idibus Decembris ad instantias Boëmundi II. concessit; quod dein Jacobus I. novâ Cæsaris autoritate firmandum, & quoad temporis circumstantias alterandum seu meliorandum existimans, anno 1441. IV. Cal. Septembris à Friderico III. facultatem obtinuit, easdem nundinas transferendi in opportunius tempus, ad eos nimirum dies, qui à decima quarta usque ad 28^{vam} Septembris, sive à Festo Exaltationis S. Crucis usque ad profestum S. Michaelis decurrunt: his verò nundinis paulatim exolescentibus, alias deinceps, præterquam in feria quinta post Dominicam Lætare, Confluentia non egit usque ad annum 1747. quo Franciscus Georgius Comes à Schônborn solemnem denuo ac privilegiatum mercatum à feria

secunda post Dominicam Latere usque ad Sabbatum ante Dominicam Palmarum, & à die 16ta Augusti usque ad iv. Cal. Septembris celebrandum indixit; qui, etsi hodieum continet, quoad mercatorum tamen emptorumque confluxum, & quoad intenta ex eo lucra seu commoda voto Principis, ac spei publicæ non æque correspondere videtur; idque potissimum inde, quod Elector Mogonus mercatum similem ad ipsosmet dies, quibus Confluentia suam agere cœperat, altero statim anno in Metropolim suam invexerit, nullisque non studiis omnem adhuc mundum ad eum pertrahere, sicque Moguntiam Francofurto, si non celebriorem, æmulam saltem, seu parem efficere, ac Germaniæ exhibere conetur.

Alterum privilegium erat jus stapulæ; quod mercatores adstringit, suas curru vel navigio ad locum aliquem apportatas merces, antequam eas aliorum vehant, venales ibi per tempus constitutum exponere: quo jure Joannes Badensis ad annum 1462. exuens Trevirensia loca, quæ à Boppardia usque ad Engers ad Rhenum sunt sita, Confluentiam ejus compotem fecit, prout videre est in Historia Trevir. Diplom. 10. 2. pag. 444. eo verò jure an aliquando re ipsâ, & quamdiu Confluentinis gaudere licuerit, eadem Historia non dicit.

Privilegium tertium erat jus ab Henrico IV. anno 1104. ad nonas Junias Sutoribus Confluentinis collatum; quo, quidquid à festo Nativitatis Deiparæ Virginis usque ad festum S. Martini

Episcopi à Sutoribus exteris, qui calceorum vendendorum gratiâ Confluentiam adibant, in telonio pendere solebat, iisdem Confluentinis Sutoribus sub hac clausula adjudicabatur, *pro hoc autem (: Sutores:) dabunt telonario & octo Senatoribus bonum pastum; telonarius autem dabit sex sextaria vini, & caseum, qui manu unâ possit levare. Hist. cit. to. 1. pag. 482. sub finem.*

Privilegium 4^{um} est jus antiquum, & anno 1527. confirmatum à Richardo de Greiffenclau, vi cuius cuilibet Confluentino Scabino, qui domum intrâ Confluentiam noviter ædificare resolverat, hunc in finem, non verò in alios fines vel usus, duodecim quercus, & totidem fagi ex communi sylva subministrabantur.

Privilegium 5^{um} est jus quotannis eligendi duos Consules, quorum unus civium nobilium, alter non nobilium causis ac Curix præsit. Juris hujus antiquitas colligitur ex supplicibus literis, quas Confluentina communitas in causa Canonizationis B. Rizæ sub annum 1265. ad Romanum Pontificem hoc sub exordio dedit. *Sanctissimo Patri Schultetus, Milites, Scabini, & omnis universitas Oppidi Confluentini cum omni reverentia & devotione pedum oscula beatorum:* colligitur quoque ex deciso Richardi de Greiffenclau, ad annum 1527. super quibusdam Confluentinorum controversiis dato; ceu in quo legitur, quod Ordo Equestris proprium ibi Senatum obtineat; cujus certè Præses seu Consul non inferioris, sed ordinis ejusdem extiterit.

Privilegia

Privilegia lignandi, venandi, piscandi, vendendi, emendi, in jus civicum recipiendi, aliâque hujusmodi, si forsitan Confluentibus competant, aut competere existimentur, hîc loci investigare aut exponere, ipsisque ab-vel adjudicare non nostrî, sed illorum est, quibus præ nobis eorundem grammatophylacium patet.



CAPUT VIII.

De Confluentina Curia Ecclesiastica.

Confluentiam suis à Principibus tam ense judicari, quàm Stolâ, id est, in spiritualibus æque ac politicis eorundem jussa capeßere, sive, in utroque foro eorundem subistere dominio, diximus in præmissis: at verò, quia, quæ quemlibet alium, ipsos quoque Præsules afficit humanæ conditionis infirmitas, ut prudentiæ ac vigilantia suæ oculis occurrentia quæque contingere, adeoque sibi concreditæ quoad singula, prout contendunt, intendere, adesse, ac consulere non possint, hinc ad profana sive ad politica ritè curanda & agenda, Sattapam, Prætorem, Scabinos, Consules, Senatores ibi-

dem creati, sive Curiam sæcularem institui, jam pridem disposuerunt, prout legere est in *cap. 6to*. Restat proin, ut & dicamus, an & quos pro sacris & ecclesiasticis Confluentiæ emergentibus, vel illuc devolutis negotiis ac causis in sollicitudinis suæ partem vocârint, sive an & quale hîc Consistorium seu ecclesiasticum tribunal erexerint.

Causas ecclesiasticas ante Sæculum XIII. Treviris in Synodo, sive, ut nunc dicimus, in Curia Metropolitana, sive in Consistorio Archiepiscopali à Consistorialibus in unum concurrentibus consuevisse decidi, inferimus ex præcepto, quo Godefridus Bullionius, Lotharingiæ Dux, ad annum 1088. Cellam S. Dagoberti ab Arnalphe Comite occupatam Monasterio Gorziensi restituit; ceu in quo præter alia legitur, quod Monachi super hoc apud Synodum Trevirensis proclamationem fecerint; quodque hæc Cella sive Ecclesia judicio Synodali ipsis fuerit adjudicata. Vide Historiam Trevir. Diplom. 10. 1. pag. 437. quo tamen definiendi more successu temporis vel abolito, vel exolero, judiciaria potestas mansit deinceps, & usque nunc residet penes solum Officialem, prout & ex moderna praxi, & ab olim constat ex sententia, per Officialem Trevirensis anno 1282. contra Robinum à Coverna, Virum nobilem, prolata, atque relata in mox dictæ Historiæ 10. 1. pag. 816.

At verò dum subsequenter annis Limburgum ad Lahnam, Wezlaria, aliæque non pauca,

primùm ad Archi-Diœcesin Mogonam spectantia, Vestrovaldica loca transiêre ad Treverica jura; sicque Archi-Diœcesis nostra à Mosâ & Luxemburgensibus terris in vastum usque Vestrovaldiæ tractum jus ecclesiasticum protendere, ac dicere cœpit, urgentissima ratio Balduinum Præfulem circa annum 1324. commovit, Diœcesin tam amplam in duo, nimirum in superiorem & inferiorem partiri, in hac æque ac ista ecclesiasticum tribunal erigere, ac cuique proprium Officiale præficere.

Sicut itaque ab olim Trevirorum Augustæ, ita hoc à tempore Confluentiæ suus quoque Magistratus ecclesiasticus adfuit; cujus Officialis, Sigillifer, Secretarius, & Assessores quondam in Capella D. Martino Sacra, & Ecclesiæ S. Florini connexa, convenire, ac decidenda decidere soliti, ea temporibus nostris in Seminario sive in Alumnatu diebus horisque determinatis expediunt: à quorum tamen sententia in causis, quæ quoquo modo ad politica seu civilia spectant, ad Parlamentum, sive ad Judicium aulicum; in merè autem ecclesiasticis ad Curiam Trevirensensem appellationi locus conceditur.

Cæterùm eadem ratio, quæ Balduinum induxerat, ut divisis utriusque Diœceseos finibus (: hi ad rivum Eltz prope Moselkern suos limites habent:) tribunalium ecclesiasticorum unum Treviris, alterum Confluentiæ collocaretur, suavitè similiter & introduxit tunc morem, qui ab Archi-Episcopis quotannis petebat, ut ad

conferendos Sacros Ordines Confluentiam semel descenderent; prout Joannes Trithemius ad annum 1324. in Chronico Hirsaugiensi testatur: prout quoque colligere licet ex iis, quæ cap. 4^{to} à nobis sunt dicta de Jacobo, hujus nominis Archi-Episcopo 3^{tio}.

Porro Confluentinam hanc Curiam ab illa Trevirorum non solum aliam, sed & prorsus independentem ab olim fuisse, liquet tum ex ejusdem antiquissimo procedendi more, tum & ex Cunonis Archi-Episcopi literis, per quas Joannes Herbord Linzius ad annum 1374. ab Officialatu Confluentino ad Trevirenslem sub hac formula transferebatur. *Committimus tibi Officialatum Trevirensis nostra Curia, & censuram ecclesiasticam, cum plenitudine juris, nolentes tamen per hoc jurisdictioni Curia nostra Confluentina in aliquo derogari.* Prout autem ambo hæc tribunalia distinctâ & ordinariâ pollebant auctoritate, sic & ambos eorundem Judices usque ad Francisci Ludovici Neoburgici tempora extitisse semper, ac existimatos fuisse veros, proprièque dictos Officiales, convincitur ex pariformitate styli, quo ipsos Archi-Episcopalia decreta jam instituunt, jam compellant, jam instruunt, jam & reformant, prout videre est in Historia Trevir. Diplom. 10. 2. pag. 645. 10. 3. pag. 48. 49. Imò post ejusdem tomum 2^{dum} in Indice 3^{tio} juridico & onomastico sub lit. O. dicitur expresse; *Officiales Archi-Episcopi Trevirensis duo sunt*, nimirum apud Confluentiam unus, alter in Trevirorum Augusta.

Dixi, *usque ad Francisci Ludovici Neoburgici tempora*: hic namque in Historia Trevir. Diplom. invenitur primus, qui in suis ad annum 1719. editis decretis Confluentinam ecclesiasticam Curiam, præter omnium Antecessorum suorum morem, Commissariatum Trevirensis Officialatûs nuncupandam, tenendamque putavit, ex ejus fortassis consilio, qui tunc in sacratioribus secretiore, non ignotâ tamen, pollebat auctoritate.

Cæterum cui hac in Curia prima dignitas primum obtigerit, quisque huic proximè in eadem dignitate successerit, nec ex Historia Trevirensi Diplomatica, nec ex Annalibus Browerianis eruere licuit; detexere tamen nonnullos, qui suâ posthac prudentiâ, scientiâ morumque integritate huic gradu splendorem decorumque dederunt, & sunt sequentes.

Joannes Herbord Linzius, anno 1388. Canonis Archi-Episcopi ad Papam Legatus.

Joannes Francofurthius, anno 1443. à Jacobo I. Basileam ad Synodum missus.

Joannes Empel, Juris utriusque Doctor, anno 1472.

Joannes Gremam ex Nickenich, Juris utriusque Doctor, anno 1492.

Mathias Saarburgensis, Juris utriusque Doctor, anno 1535. ad Officialatum Trevirenssem translatus.

Joannes Gemminger, Canonicus ad S. Florinum, anno 1535.

Bernardus Dorning Westphalus, Juris utrius-

que Doctor, & Canonicus ad S. Florinum; obiit anno 1545.

Georgius Lemberget, Decanus ad S. Florinum; obiit anno 1560.

Cuno ab Homburg, Juris utriusque Doctor, & Decanus ad S. Florinum; obiit anno 1581.

Mathias Keller, Juris utriusque Doctor, Ss. Theologiæ Licentiatus, Canonicus ad S. Florinum; obiit anno 1597.

Joannes Werl, Juris utriusque Doctor, Decanus ad S. Florinum; obiit anno 1628.

Joannes Fladt, Juris utriusque Licentiatus, Decanus ad S. Florinum; obiit anno 1658.

Joannes Henricus ab Anethan, Juris utriusque Doctor, post benè in Officialatu gesta, primum ad Hildesensem, dein ad Trevirensen, demum ad Coloniensem Suffraganeatum promotus.

Valentinus Scheiden Confluentinus, Canonicus ad S. Florinum, & Pastor ad Beatam Virginem; obiit anno 1692.

Joannes Finger Confluentinus, Decanus ad S. Florinum; obiit anno 1711.

Joannes Hugo à Gaërtz Confluentinus, ex Officiali Suffraganeus Osnabrugensis; obiit anno 1716.

Joannes Henricus Jacobi ab Ehrencron Confluentinus, ex Consiliario Aulico Clericus & Officialis; obiit anno 1716.

Joannes Conradus Schwang Horchemius, Canonicus ad S. Florinum, & Pastor ad Beatam Virginem; obiit anno 1737.

Joannes Nicolaus ab Hontheim Trevir, Juris utriusque Doctor, Canonicus ad S. Florinum, ad S. Simeonem Treviris, & Monasterii in Maifeldia; anno 1748. ad Suffraganeatum Trevirenssem evehctus.

Casparus Radermacher Bonnenſis, Canonicus ad S. Simeonem Treviris, & Bonnæ in Ecclesia Archi-Diaconali Decanus. Vid. Browerus *Lib. 18. Num. 76. Lib. 19. Num. 63.* & mox dictus Illuſt. Honthemius in *Historia Trevir. Diplom. to. 2. pag. 8. 332. 550. to. 3. pag. 216.*



CAPUT IX.

De Ecclesia S. Florini.

Hierarchico, politicóque flore in tribunali-
bus Confluentinis ſpectato, digredimur
nunc ad ſacras, Deóque ac Divis conſecratas
Ædes, in quibus Confluentia ſua Deo homagia
præſtat, ſacrificia litat, vota cum orationibus
fundit, fidei myſteria pandit, palæſtras virtutibus
erigit, ac per hæc, ceu per idoneos largóſque ca-
nales, in Principem ac Civem cœleſtia dona de-
rivat: Cœlum námque, dum fideles Dei famu-
los, & vanos ſæculi filios eadem intra mœnia
eodem jure gaudere, ac more civium convivere
videt, parata his mala iſtorum gratiâ ſolere

quandoque comprimere, suâque dona in hos æque ac istos profundere, sacræ paginæ docent. *Gen. 18. 39. Job. 42. Act. 27.*

Narrationis itaque telâ ad delubra, & ad aras usque perductâ, primo nunc loco considerandam, ac describendam assumimus Collegiatam D. Florini; ceu cui inter alias Confluentiæ sufficitas Ecclesias locum Principem ex titulo antiquitatis competere, tradit Browerus, dum *Lib. 9. Annal. Trevir. Num. 107.* dicit: *Hæc ab usque Agritii & Helena temporibus originem arcescit: indeque rear, Eadem hanc esse ceteris antiquitate non postferendam.* Quæ Broweriana opinio an sit, vel non sit sufficiente probabilitate suffulta, ex capite mox secuturo patelcet.

Ecclesia hæc, Virgineæ Dei Matri quondam dicata, ejusdémque clericale Collegium Monasterii nomen gerebant; cujus Rector Abbas, Clerici autem appellabantur Fratres B. Virginis; hi in communitate viventes, pascebantur in uno triclinio, unâque dirigebantur regulâ usque ad annum circiter 973. hæc namque sub tempora, sicut Canonici Metropolitanæ Basilicæ, qui quoque in communi sub regula præscripta viventes, Fratres S. Petri nuncupabantur, abjectâ talismodi vitæ formâ, distributisque inter se præbendis, regulares esse cessarunt, ita & Florinenses nostros Canonicos transiisse ad simile vitæ genus, colligitur ex Trithemio in *Chron. Hirsaug. to. 1. pag. 116. videantur quoque Hist. Trev. Diplom. to. 1. pag. 171. 281. 354. Annales Brow. Lib. 11. Num 4.*

Religiosum hoc, ac insigne Collegium à B. Mathilde, Magni Ottonis Matre, largis muneribus; ab ipsomet Ottone luculentis prædiis: ab Hermanno Sueviæ & Alsatix Duce Humbacensibus decimis: ab Illustri Viro Cunone de Confluentia pluribus fundis, agris, ac vineis: ab Henrico hujus nominis Imperatore II. Gildenfeldio per quam quæstuosâ Villâ: ab evergeta nobis non comperto Obermendig & Volckersfeldt, magni similiter compendii villis: à Brunone Trevirensium Præsule Basilicæ structurâ, prout nunc est, auctum, ditatûmque legimus in Annalibus Browerianis *Lib. 9. Num. 107. Lib. 11. Num. 4. Lib. 12. Num. 17. Lib. 13. Num. 73.* Item in Historia Trevir. Diplom. 10. 3. pag. 744.

Quæ locupletissima Historia, sicut & mox dicti Annales hac de Basilica sequentia quoque memorabilia produnt, & quidem imò. Quod circa sæculum decimum, posito Mariano titulo, illum S. Florini, Sacerdotis Rhæti, Confessoris sanctitate ac miraculis clari, cum ejusdem lipsanis, uti supponendum, assumpserit. *Brow. Lib. 11. Num. 5.*

2dò. Quod fundum, cui nunc insidet Teutonica domus, illi substraverit pia largitas hujus Collegii, & eâ quidem sub lege, ut, si quis Florinensium religionis ergo terram sanctam inviseret, gratum ibi, paratûmque semper hospitium apud Teutonicos inveniret: & ut, si quis ipsorum apud Confluentes in egestatem incidere, à Teutonicis hospitaliter susciperetur, *Brow. Lib. 15. Num 114.*

3^{to}. Quod, quia temerarii ac tumultuosi quidam Cives signum crucifixi Christi, ac S. Florini effigiem à muris Ecclesiæ hujus avellere, atque deicere, nec non quasdam ad ipsam pertinentes structuras infringere ac demoliri præsumperant, Joannes Badensis ambobus Confluentinis Consulibus, sex Senatoribus, Civibusque nonnullis injunxerit, ut à se, coram frequentissima, & idcirco coacta Nobilitate, in medio læsæ Ecclesiæ, flexis genibus, admissam culpam deprecarentur; quod & morigerè præstitum, reportatamque ab ipsis veniam, perhibet Illust. Honthemius in Historia Trevir. Diplom. 10. 2. pag. 467. 470.

4^{to}. Quod Sixtus IV. Canonicalem Basilicæ hujus præbendam unierit, ac incorporaverit Universitati Trevericæ: quodque eâ gaudens teneatur quolibet anno ad viginti quinque Lectiones publicas Jurium Candidatis habendas. Hist. mox cit. 10. 2. pag. 524. Ubi tamen adverte, quod ex particulari Capituli & Universitatis conventu huic annuè nonnisi 40. Imperiales pendantur.

5^{to}. Quod Eminentissimus Nicolaus Cusanus, S. R. E. tit. S. Petri ad Vincula Presbyter Cardinalis, Episcopus Brixinensis, Apostolicæ Sedis in Græciam, Galliam & Germaniam à latere Legatus, in hac etiam Ecclesia Decanatûs dignitate claruerit.

6^{to}. Quod Capitulum Metropolitanum ob discordias, inter ipsum & Senatum Populûmque Trevirenses obortas, non in ordinaria

Aula capitulari, sed in hac Æde Jacobum ab Eltz ad diem VII. Aprilis Archi-Episcopum renuntiârit. *Browerus lib. 22. num. 1.* Ea, quæ in Gestis Trevirorum leguntur, Jacobum nempe Witlichii in Arce Ottensteiniana Archi-Præfulem renuntiatum fuisse, hæc, inquam, intelligi petunt; quod Canonici Metropolitani autecapitularia ibidem egerint, sive curârint, quodque sub his eorundem potissimi in favores Jacobi suis jamdum votis apertius propendere sint visi: formalem namque & canonicam electionem dilatam, actamque fuisse in præfata Basilica, liquet tum inde, quod actus tam gravis & sacer non in arcibus, sed in insignibus Ecclesiis celebrari deponat; tum &, quod ipsimet Cæli prodigiosum ei jubilum in atrio Ecclesiæ Florinensis præmiserint, prout l. c. sic à Browero describitur. *Eodem paulò post auroram albescente (: electionis :) die, dum esset tranquilla, serenâque Cæli facies, dispulsis tenebris, plenissimâ luce aëre toto diffusâ, repente nubecula quadam exitit ab Oriente in Occidentem tripudio quodam huc & illuc se trajiciens cum fragore, non terrifico quidem illo, quem in tonitru sentimus, verum sedatiore; isque strepitus variis subinde locis exauditum est, sed & Cælo vibrante volitantes conspecti passim ignes, ex quibus non obscura facula summo de Cælo lapsa, Confluentia in foro, ubi conciderat, subito evanuit.*

7^{timò}. Quod Jacobi Badensis, Joannis Isenburgici, & Joannis à Petra Archi-Episcoporum exuviæ, singulæ in suis loculis conditæ, com-

munem in ea resurrectionem expectent. *Brow. lib. 20. num. 41. lib. 21 num. 93. 144.*

81avò. Quod ad annum 1688. quo furor Gallicus Confluentiam igniariis sphaeris vastabat, hæc quoque Basilica iisdem sub fatis gemuerit.



CAPUT X.

De Collegiata S. Castoris.

UT & fundamenta & fastigium hujus Ecclesiæ simul liceat sub conspectum adducere, Lambeciana ad Theganum Appendix nobis apprime servit, dum dicit: Eodem anno (: *nimirum* 836 :) Hetti, beatus Trevirensis Archi-Episcopus, divino jussu instinctus, asportavit corpus S. Castoris de loco, in quo antea quiescebat, qui vocabatur Caradona, ad locum, qui vocabatur Confluentes, ubi Mosella in Rhenum intrat, ad Monasterium, quod ipse supradictus Archi-Episcopus à fundamento construxerat, sicut ei in visu præcepit Maternus, qui erat tertius Trevirensis Archi-Episcopus; & in festivitate S. Martini venit sanctum corpus ad Confluentes cum magno honore: & in crastinum die Dominico consecravit supradictus Pontifex illam Ecclesiam in honore S. Castoris,

& omnium Sanctorum Confessorum; & post consecrationem suscepit sanctum Corpus, & collocavit illud in Ecclesia honorificè, sicut dignum erat. Octavo verò die post consecrationem, qui est XII. Kalendas decembris, die Dominico venit Dominus Imperator (: *Ludovicus Pius* :) cum Coniuge & Liberis, & post Missarum sollemnia obrulit ibi maxima donaria in auro & argento, & mansit ibi duos dies, & totidem noctes; *ita antedicta Appendix*: cui à Browero subnectuntur sequentia; quod nempe, sicut religionis zelus ad erigendum tam magnificum opus Archi-Episcopo consilia & stimulos dederat, ita illius non modò profectus, sed & prima initia Ludovici Augusti pietas munificâ manu promoverit, promotum verò & in fastigio positum Popponis Trevirorum Antistitis, ac B. Rizæ, Covernanæ Dominæ, pia profusâque largitas insigniter locupletarit. *Vid. Annal. Trevir. lib. 8. num. 83. lib. 11. num. 84. item Hist. Trevir. Diplom. to. 1. pag. 765.*

Ministros seu Alumnos hujus Ecclesiæ regularem primitus vitam in clericali communitate duxisse, inde sat clarè dignoscitur, quod eorum domicilium, prout Appendix Lambeciana testatur, sub nomine Monasterii venerit: quòdque ad annum 816. Aquisgrani celebratum Concilium ordinaverit inter alia, monendos & adstringendos esse Canonicos, ut juxta regulas, jubente Imperatore congestas, in posterum vitam componerent; quibus de regulis Ademarus Cabanensis *to. 2. pag. 158. hæc habet.*

Ludovicus jussit fieri regulam Canonicis, excerptam de diversis Patrum Scripturis, decrevitque eam observandam à Canonicis; Et ut, sicut Monachi respiciunt ad librum regula S. Benedicti, sic prælegant Canonici inter se librum vitæ Clericorum; quem librum Amalerius Diaconus, ab Imperatore jussus, collegit ex diversis Doctorum sententiis. Hac autem à vitæ methodo sicut Castornenses Canonicos sub annum 973. defecisse, perhibet Historia Trevir. Diplom. to. 1. pag. 396. ita Browerus in Annal. lib. 19. num. 87. refert; quod Jacobus Sirckius circa annum 1451. necessaria & salutaria iis instituta præscripserit, quòdque per ea fuerint ad observantiora reducti; imò quod & providentia Jacobi sancierit, ut, si quem illorum hæc contra statuta, vel modis aliis publicè peccare contigerit, pœna, talismodi excessui debita, nec à Decano, nec à quibusvis aliis, sed à se, & à successoribus suis sit imponenda.

Hac præterea de Basilica hæc apud Scriptores memorabilia prostant; quod nimirum trium Regum & undecim Episcoporum conventus, ad annum 860. in eadem coactus, ipsam celebrem & ubique nominatam reddiderit.

Quod reconditæ in ea Cunonis & Weneri Archi-Episcoporum exuviæ, nec non B. Rizæ, Covernanæ quondam & ex regio Francorum Sanguine descendens Dominæ tumulus, ab ipsamet intrà illam electus, ejus nomini splendorem cum prærogativa concilient.

Quod inimica Gallia, dum anno 1688. glo-

bis igneis in Confluentiam sæviit, Ædem hanc, ob quiescentem in ea Francicam Principem, in pretio & præ oculis religiosis habuerit, ipsamque non modò, sed & ejus viciniam salvam & inambustam servârit.

Quod Sixtus IV. unum Canonicatum, unamque integram Ecclesiæ hujus Præbendam Universitati Trevirensi unierit, annexerit, ac incorporârit; ex particulati autem Capituli & Universitatis conventu hæc annuè non recipiat nisi 20. Imperiales.

Quod denique in ejus Sacrario Carolus è Ducibus Lotharingiæ unanimi Capituli Metropolitani consensu Joanni Hugoni fuerit Coadjutor adjunctus.

His breviter de utraque Collegiata Confluentina relatis, restat nunc discutienda & decidenda quæstio, cui earum præferentia competat? Ad quam non incongruè licet reponere; quod, cum in instrumentis publicis, nec non in Electoralibus, hinc inde in Historia Trevir. Diplom. extantibus, chartis Florinenses semper loco primo, altero Castorenses ponantur, de his sentiri, dicique possit, quod istis vel titulo antiquioris originis, vel aliis ex causis, quæ nos latent, præferentiam debeant; indèque & in contextu hujus operis Florinensi locum primum, sequiorem Ecclesiæ Castorensi dicavimus. At verò si hoc super dubio Historiæ Trevirensis Diplomaticæ sensus petatur, asseret utique, Castorensi Collegio præ Florinensi locum Principem ab antiquitate competere, eò quod ta-

bulæ, ad annum 1358. à Magistratu Confluentino conditæ, disertissimè dicant, Canonicos ad S. Castorem esse antiquissimos Confluentiæ cives. *Vid. mox dicta Hist. to. 2. pag. 207.* Si denique consulatur Browerus, is quoque comperietur sat apertè pro causa Castorensium stare, cum de his jamdum ad annum 837. agat, & in laudes eorundem excurrat; Florinensium autem memoriam non faciat, nisi sæculo sequenti, videlicet ad annum 948. qui narrationis ordo utique præposterus foret, si hi suo ab ortu istis extitissent priores: neque obstant, quæ *lib. 9. num. 107.* refert; *Hæc Ædes, nempe D. Florini, ab usque Agritii & Helena temporibus originem arcessit:* ea namque vacillare videntur, dum alibi, nimirum *lib. 11. num. 4.* dicit; *Cujus Ædis de primis initiis ut accuratè disseramus, haut, licet per testes, quibus antiquitas caret, idoneis.* Benevolus Lector ex his, pro utraque parte adductis, litem hanc dirimere noverit.

His eousque typo, nostræque revisioni commissis, literis cujusdam Canonici Florinensis; quod hodie dum, dum utriusque Collegiæ Canonici in solemnitatibus, aliisve occasionibus conveniunt, inter eos præcedentiæ locus non detur, sed quod mixtim stent aut incedant, ita tamen, ut qui senior est, locum priorem, posteriorem junior, hic sinistram, iste dexteram teneat. *Hæc ille.* Quibus nos subnectimus, quod Collegiata S. Castoris à longis retrò temporibus

poribus sit quoque Parochialis Civium, quos inferior, ut ajunt, regio civitatis complectitur.



CAPUT XI.

De Ecclesia B. Mariæ Virginis.

Superior Civitatis regio Parochialia sua hac ab Æde deposcit: cujus origo etsi nec ab Historia Trevirensi Diplomatica, nec in Annalibus Browerianis prodatur, ipsam tamen à multis retro sæculis cum utraque Collegiata & in flore & spectabili loco steterisse, inferimus ex mandato, quo Arnoldus Archi-Episcopus ad annum 1182. Saulino ibidem Plebano imposuit, ut, quotquot Trevirenses S. Simeonis Canonicos in Confluentini telonii juribus quoquo modo turbare, vel impedire præsumpserint: excommunicatos è suggestu pronuntiaret. Idem inferimus ex Apostolicis literis, quibus Urbanus IV. ad annum 1262. Conrado similiter ibidem Parocho commisit, ut super telonio, quod Henricus Vinstingius noviter ad Rhenum statuisset insimulabatur, quòdque ipsi in Romana Curia notam malam cum negotiis tædiosis pepererat, per se, vel per substitutum inquireret, atque comperta eidem Curiae per literas significaret.

His itaque Ecclesiæ hujus vetustatem, quin & præstantiam sufficienter probantibus, manet nunc enodanda quæstio; an ergo illius origo in tanta caligine lateat, ut de ipsa nil omnino statui, seu calamo valeat proferri? Ad quæ respondendum censemus: repetenda hîc esse principia, in capite primo præsignificata: in antiquis nempe, in quibus congruæ probationes decedunt, locum & fidem adminiculis non imprudenter posse concedi: de rebus quoque, quas temporum obscuravit antiquitas, rationabilem conjecturam in historia texenda sufficere; quibus præsuppositis, passimque admissis, verisimilem opinionem asserimus, quæ sustinet, originem Ecclesiæ B. Mariæ Virginis referendam esse ad tempora, in quibus Confluentia paganissimum exuens, Christum liberius pleniùsque induere cœpit. Cujus ratio est; quia, sicut nemo dubitat, quin Confluentia, extra lucem evangelicam posita, Deastris suis non in angulo, nec in imo, sed, prout mos gentilibus erat, crexerit, & consecraverit fanum in eminentiore ac spectabiliore loco, ita quoque pro indubitato tenendum, quod ad fidem Christianam traducta, ipsum hoc fanum, quia alia ei Ecclesia non erat, initiaverit Christianis mysteriis: quodque, quemadmodum Roma Deorum omnium, & Bavaria Vetere-Oetinganum septem planetarum fanum, ita quoque Confluentia pristinum suum delubrum esse fecerit Sacram Ædem sub nomine ac præsidio Virgineæ Dei Parentis; sicque eminentior Civitatis Confluentinæ locus, prout

antea Deastris, ita deinceps Cœli terræque Dominæ fuerit, maneatque dicatus: in quo demum religio civium, Æde vetere per tempus exesâ, nobilem & peramplam, prout nunc conspicitur, Basilicam assurgere fecit. Cujus dein campanilia cum campanis anno 1688. Gallicus Vulcanus absumpsit; ejus verò plebaniam Franciscus Ludovicus Neoburgicus Seminario Archiepiscopali annexuit; ita ut nunc Alumnatûs seu Seminarii Rectoratus, ac Pastoratus ad D. Virginem combinentur in eadem persona.



CAPUT XII.

De Hospitali Pauperum, de Domo Teutonica & de Seminario Clericali.

Hospitali pauperum, quod Annales Treverenses S. Nicolao Episcopo consecratum dicunt; pia largitas Brunonis Archiepiscopi circa annum 1110. fundamenta cum fastigio dedit; ipsumque hoc novum opus, nec non & munificentiam, in id à præfato fundatore collatam, habuere rata Summæ Ædis Trevericæ tum Advocatus, tum & Præpositus, nec non Ecclesiarum S. Florini, & S. Castoris Præpositi,


prout legere est in Browerianis Annalibus *lib. 13. num. 25.* & quia Florinenses Canonici religioso huic operi liberaliter substraverant fundum, hinc ipsos Bruno Superintendentes, & Procuratores ejus instituit: quod & munus sub congrua deinceps jurisdictione portârunt usque ad annum 1217. quo hospitalis hæc domus vetustate fatiscens, translata fuit in vicum, cui nomen Lôhra. *Browerus lib. 15. num. 114.* Abhinc autem anno 1718. rursus amota, nunc sub ampliore forma visitur in loco, qui Alumnatui Archi-Episcopali contiguus, aliàs ad Sanctimonialibus Augustinianis, à S. Barbara nuncupatas, spectârat.

Ordo Teutonicus, ut primum inclarescere, ac per Europam se diffundere cœpit, alumnos suos terris Trevirensibus quodammodo præcæteris dedit, utique, quia Henricus Waldport à Bassenheim, primus eorundem Magister, in Treviris, & quidem non procul à Confluentibus, natalem suam domum habebat: unde & circa annum 1212. vix apud nostros conspecti, mox quoque recepti à Joanne I. dein sub Theodorico II. ad annum 1217. stabilem adepti sunt sedem in Florinensibus fundis, prout supra cap. *9^{mo}.* retulimus

Instituti hujus cultores collegialiter seu conventualiter hic quondam vixisse, ac indies, prout nunc Mergenthemii, & Trajecti ad Mosam fieri novimus, regulariter celebrâsse divina, eruitur ex iis, quæ in Petri Majeri manuscriptis, Richardo de Greiffenclau ad annum 1537.

dedicatis, leguntur; quod nimirum Domini Tentonici cum cætero Confluentino Clero proceffionem tragicam, quam Confluentia temporibus pristinis, ob stragem suis civibus à Comite Westerburgico, & ab ejus confœderatis illatam, Feriâ 6tâ post Dominicam Resurrectionis agebat, comitari consueverint. *Browerus in Annal. lib. 15. num. 114. Hist. Trevir. Diplom. 10. 2. pag. 173. 10. 3. pag. 996.*

Franciscus Ludovicus Dux Neoburgicus, Trevirorum, Vangionum, & Silesiorum Antistes, nec non Supremus Ordinis mox dicti Magister, majorem Dei gloriam, ac uberiores sui gregis profectus præ oculis, ac in curis pastoralibus gerens, anno 1723. Judicibus ecclesiasticis opportunam Curiam, junioribus Clericis ad sacras scientias, & exercitationes discendas palæstram, quam Alumnatum seu Seminarium dicimus, emeritis verò Parochis promeritam Sedem, uno sub tecto coassurgere fecit, volens insuper & ordinans, ut, qui Plebanus est ad B. Virginem, sit quoque seniorum & juniorum ibidem commorantium Præses: quin & ejusdem verè magni Archi-Præsulis manus, cui & suam Carolus Casparus Comes de Petra jungebat, Orphanotrophium, multo Confluentinorum solatio, juxta mox dictum Seminarium posuit. *Vide cap. 4. 11. 16.*



CAPUT XIII.

De Monte Sancti Beati.

SAcra & religiosa domus, quæ in hoc olim Monte florebat, in ministris, in ædificiis, & in titulo alia prorsus erat ab Ecclesia & Claustro, intrâ quæ nunc Carthusiana familia in Dei laudibus occupata conspicitur: tunc namque sub invocatione ac patrocinio Beatorum Martyrum incolebatur, ac curabatur à sæcularibus Clericis, & quidem, ut Historia Trevir. Diplom. ait, à Canonicis S. Castoris; primûmque S. Beati initiata est titulo, quando ad annum 1017. sacra Confessoris hujus ossa ex Monasterio B. Mariæ ad Martyres, prope Trevirim sito, Popponis Archi-Episcopi studio ad ipsam deportabantur.

Canonicorum Collegium sub annum 1153. Hillino Præsulatum tenente, Familia Benedictina excepit: à qua dum anno 1238. Ecclesia in novam, sive in monasticam formam redigitur, noviter etiam ab Henrico Episcopo Osiensi ad annum 1242. Deiparæ Virgini, & SS. Confessoribus Servatio & Beato cæremoniis consuetis dicatur. Historia Trevir. Diplom. 10. 2. pag. 116. Hos inter Monachos & Castorenses Canonicos super agrorum finibus, nec non

super quibusdam possessionibus aliis acriter obortum litigium Hillini prudentia sopiit, dum à Confluentinis civibus omnia accuratè perquiri, montem dimetiri, ac pro re comperta suum cuilibet tum linqui, tum reddi præcepit. *Brow. lib. 14. num. 97.*

Iisdem quoque Monachis lis aliquando erat cum sacris ac nobilibus Insulæ Superioris Virginibus; affirmabant enim isti, sibi in ipsas superioritatem, sive monasticam jurisdictionem competere; oppositum tenebant illæ: dūnque hac in causa crebrius ad forum Archi-Episcopale pulsatur, dum ambæ partes jam hæc, jam ista ex scriniis documenta depromunt, Theodoricus II. his vix unquam finiendis litibus materiam subtrahendam existimans, dicta demum documenta rescidit, abolèvit, ac sanctimoniales in statu pristino quietè relinquendas decrevit. *Brow. lib. 15. num. 109.* Interim prout hanc parthenoni gratiam, ita & Monachis, integrè tunc observantiam Benedictinam colentibus, insignem favorem impertit, dūm nimirum omnia eorundem bona, condito ad annum 1215. diplomate, contra quoscumque protegit, ac præmunivit.

At verò dum serior ætas Monachos hos à monastica disciplina deflectere, laxioraque sectari conspexit, Balduinus iis amotis, duodecim rursus Canonicos, ac demum, dum & hi hujus loci solitudinem nauseant, ac difficilia multa causantur, Carthusianos ad annum 1331. substituit: quorum dein Cœnobio, quas gratias

Carolus IV. Augustus contulerit, Browerus *lib. 17. num. 167.* lic refert, *Nam & tutela loco à vicinis oppidis, Confluentiâ, Boppardiâque, constituta, & immunitas data, Rheno, Mosâ, Vahali, Isalâ, Mosellâ, Mœno, citra telonii pensum quâque commeandi.* Porro Sacellum effigians Christi sepulchrum, nec non Dominicæ passionis mysteria repræsentantes imagines, quæ in orientali montis hujus latere tum sculptæ, tum pictæ cernuntur, Confluentinorum religio paulatim ibidem exposuit, ac sanctis ea accessibus crebrius per annum venerari consuevit.

His hoc de monte ex Historia Trevirensi Diplomatica, nec non ex Christophoro Browero depromptis, superest enodanda quæstio; an non per literas, quibus Henricus II. ad annum 1018. Popponi Archi-Episcopo Confluentiam cum quapiam Abbatia donavit, dicens; *Trevirensi Ecclesie quandam nostri juris Curtem, nomine Confluentiam, & Abbatiam sitam in Pago Trichire tradimus, atque firmiter donamus.* An non, inquam, Henricus per hanc Abbatiam intellexerit Ecclesiam & Clericale Collegium, quæ tunc in eodem monte florebant? Ad quod nostra responsio idcirco est affirmativa; quia Ecclesiæ, quæ à Scriptoribus in quæstionem hanc adductæ leguntur, nonnisi duæ sunt, scilicet illa Mosæ-Trajecti ad S. Servatium, & Confluentina ad S. Florinum; de neutra verò harum affirmari posse, quod in præfata donationis charta fuerit per Imperatorem intentâ, inde sat liquidò constat; quod inprimis Tra-

jectensis extra pagum Trichire, sive Trigorium sit notoriè sita: dein quod non appareat, cur Henricus Ecclesiam D. Florini, & non insimul Collegiatam S. Castoris Archi-Præsulum esse voluerit: ad hæc; cur Imperator omnem prorsus Confluentiam, & in hac totalitate Collegiatam quoque S. Castoris Archi-Episcopo tradens, solam & unicam Ecclesiam Florinentem exceperit, ac quasi quid ad communitatem Confluentinam non pertinens, sub nomine Abbatiae specialiter exprimendam assumpserit, cum tamen ista ætas Castorensis æque ac Florinentem Ædem Abbatiam nuncupare consueverit, prout colligitur ex iis, quæ à *Mirao in Diplom. Belg. lib. 2. not. 1.* & à *Molano de Canonicis lib. 2. cap. 5.* traduntur? Consequens proinde videtur; quod per Abbatiam, in Pago Trichire sitam, Ecclesia Montis D. Beati, quæ situm suum extra Confluentiam habet, veniat intelligenda; cujus Sancti venerabiles exuviae, dum anno 1017. illuc fuerant per Popponem translatae, ansam utique Imperatori præbuerant, ad annum posterum Ecclesiae illius dono Popponem lætificandi. Cæterum quid hæc vocula Pagus Trichire, sive Trigorius denotet, dictum est in cap. 170.

Opellâ hâc ad finem usque perductâ, imbui-
mur quasi posthumâ, & hîc aptè depromendâ
notitiâ: quod nempe, dum anno 1734. Arx
Trarbacensis, suis jam in ruinis sepulta, gallico
cingebatur obsidio, subierit Confluentiam ve-
hementissimus timor, ne rebus ibidem perditis,

ipsa dein peteretur & perderetur eâdem vastatrice manu; unde clam ac palam non erat audire nisi alta suspiria, in horas centuplicata lamenta, ac Superos compellantia vota: nil erat cernere nisi labra pallentia, confusa negotia, tremulasque manus sub convasandis & deportandis familiaribus rebus vel ad camerata, vel ad alia distantiora loca. Elector sui populi commiseratione perculsus, illique in persona se sistens, totus advertebatur in eo, ut animos dejectos erigeret, lachrimas promissis abstergeret, ac benedicente manu, quam sursum piâ mente levabat, trepidantia corda firmaret.

Post hæc, ne arbores & hortenses ædiculæ, quæ campum ex parte meridionali complebant, inimicis copiis munimini vel tutamini forent, Electoralibus jussis diruuntur hæ, succiduntur istæ: quin &, qui Electori à secreticribus epistolis erat, destinatur in montem S. Beati, indicatque ejusdem Priori; murum claustralem, utpote obfuturum urbi, hostibusque profuturum dejiceret: cui is; quantumvis mei non sit, Cænobii clausuram infringere, aut res ejus quoquo rhodo disperdere, nec verbum tamen, neque factum opponam, si quis alius, quod præcipitur, executioni mandarit: qui interim spe firmâ sustentor, quod Monti nostro nec defutura sint Superiorum præsidia, nec ad illius damna concursura sit cuivis nota, & ubique celebrata Eminentissimi nostri clementia.

Adest postridie militiæ Confluentinæ Præfectus cum duobus Architectis bellicis: dūmque

montem omnem oculis attentissimis lustrant, ait Commendans; si murum cum contiguīs structuris dejicimus, spatia præparabimus hosti, in quibus aggeres erigi, & tormenta bellica poterunt ad nostra detrimenta plantari. Post hos Generalis Cæsareus, ut rebus Confluentinis consuleret, ab Electore petitus, & à Cæsare missus, similiter ad montem se confert, omnibusque inspectis dicit: abhinc usque ad civitatis aggeres intercapedo tanta versatur, ut globi, ex tormentis hic explodendi, hominem quidem sternere, munimentum verò nec dejicere, nec discutere possint. Ad hæc, cum mala abhinc timenda, non tam à Carthusia, quàm à monte sint dimanatura, hic utique post istam dirui & æquari debebit; quo oraculo correctus est annosus multorum error, qui crebrò timuerant, ne aliquando molimina gallica hoc à monte robur & adjuvmenta ad civitatem expugnandam desumerent.



CAPUT XIV.

De cæteris Regularium Domibus
ac Ecclesiis.

Ezechias Rex, ut ab Assyriorum copiis Hierosolymam infestandam accepit, militum

delectu, ac omnigenis eam armis instruxit. 2. *Paral.* 23. pariformiter Archi-Episcopi nostri, ut humanæ salutis hosti, qui nunquam non suis eam odiis, fraudibus, ac assulribus petit, Confluentiam velut alteram Davidicam turrin ob-
 jicerent, omni eam induerunt armaturâ fortium *Cant.* 4. Illi nimirum conscribendo milites, & dando athletas, quibus non modò adversus spiri-
 tuali anequitiæ in cœlestibus, & contra Mundi rectores tenebrarum harum gloriosa colluctatio foret. *Ephes.* 6. Sed & qui meritorum suorum præstantiâ, orationumque suarum virtute justas Dei iras comprimere, ultricisque ejus manus continere, ac ad misericordias inclinare vale-
 rent. *Ex.* 10.

Hos itaque in fines accersebantur jam pridem Sæcularis Cleri veneranda Collegia: his circa annum 1153. in Monte S. Beati sociabantur Monachorum subsidia: evocari post hos aderant commilitones S. Dominici; qui ad annum 1231. ut vult Cantipratanus *de Apib. lib.* 2. *cap.* 25. §. 11. vel, ut *lib.* 15. *num.* 154. tenet Browerus, ad annum 1233. ipsâ Dominicæ Resurrectionis die sacris Confluentium gaudiis peropportunè se interferentes, Ecclesiæ dein suæ aliquantisper tardius, circa annum videlicet 1239. fundamenta locârunt: dùmque hæc unâ cum Cœnobio ob pecuniarii nervi decessum languidè morosèque assurgere cernitur, Innocentius IV. Pont. Max. suis adest auxiliis, & omnibus ad incrementum surgentis operis manu adjunctricem præbentibus, Indulgentias 40.

dierum per Breve *Quoniam*, ut ait. impertit. Historia Trevir. Diplom. 10. 1. pag. 730.

Eodem penè tempore, quo Dominicanæ adventabant suppetiæ, Franciscanam quoque militiam sua hîc explicasse vexilla, proditum tenemus ex his; quæ apud Brøwerum *lib. 18. num. 126. 176.* leguntur. Illa verò, quæ idem Scriptor *lib. 19. num. 87.* refert; quod Jacobus I. circa annum 1451. Confluentinam Franciscanam familiam labore maximo ad pristinam disciplinam reduxerit, non prout ipse sentire videtur, sed hoc modo veniunt intelligenda, quod nimirum Sirckius Minoritis Conventualibus, Fratribus de Communitate tunc dictis, loco cedere jussis, surrogari fecerit Fratres de Familia; qui nunc Minores Observantes, seu Recollecti vocantur. Ad hæc; Sectatores S. Francisci Seraphici ante medium sæculi XIII. adeoque non longè post ortum sui Ordinis, apud Confluentes formalem habuisse Conventum, constat ex iis, quæ leguntur in Historia Trevir. Diplom. 10. 1. pag. 787. quod nimirum Henricus Vinstingius ante annum 1267. Guardiano Fratrum Minorum in Confluentia, nec non aliis duobus injunxerit, ut contumacem quendam Militem excommunicationis censurâ perstringerent.

Quo tempore Carthusiani in viciniam, ac in tutelam Confluentinæ Civitatis devenerint, capite præcedenti retulimus. Canonicos Regulares S. Augustini circa annum 1450. Confluentiæ fuisse receptos, à Browero in *Annal. Trevir. lib. 19. num. 98.* sic inquiriente didicimus. Jacobus

Sirckius *Canonicos Regulares Ordinis S. Augustini*, *Cœnobitarum genus sanctitatis opinione, atque virtutis apud Batavos, Frisios, & Geldrios eo tempore florentissimum, Confluentiam primus accersivit. His in Insula Rheni sedem propius Urbem Gymnasium virtutis attribuit. Hinc mox partem eorum evocans, Everhardi Clusam ob crebra miracula jam tum illustrem iis commendavit. Porro Canonicos cæteros, eorundemque posteros adhuc ultra sæculum cultu suæ regulæ eam Insulam sanctificasse, demumque penitus intercidisse, novimus ex literis Gregorii XIII. Summi Pontificis, quas refert Historia Trevir. Diplom. to. 3. pag. 101.*

Jacobus ab Eltz, ut hæreses in ditionis suæ vicinia arroganter caput attollere, pietatem avitam opprimere, innumeræque mala parturire ac progignere cernit, quatenus ovili suo de tutamine novo prospiceret, Patres Societatis huc vocat, eosque anno 1580. annuente Papâ, immittit in regularem domum, quam Sanctimoniales Nobiles sub cultu Instituti Cisterciensis à multis retro annis ad hoc usque tempus possederant. *Historia Trevir. Diplom. to. 3. pag. 101. 145. Browerus lib. 22. num. 57.*

Carolus Casparum à Petra non absimilis cura propagandæ religionis excepit; utpote qui circa annum 1659. Theresianis, sive Carmelitis Discalceatis, post multas ipsorum, aliorumque instantias, licentiam demum fecit, Regularium Cœtibus suum hinc Sodalitium stabiliter consociandi: qui subinde regulari domui fundamenta

locantes, ejusque profectui operam diligentem navantes, in illam tandem anno 1662. die septimâ mensis Septembris ex privatis ædibus, in quibus lustrum compleverant, solemniter progrediuntur. Quorum dein Ecclesia per proximè sequens sexennium, opitulante beneficâ plurium devotorum manu, prout nunc visitur, in altum surrexit.

Ordo Cisterciensis in sæculo XIII. nobili parthenone religiosas hinc familias auxit: cujus alumnas sicut Joannes Badensis sub annum 1496. ad veteris disciplinæ, à qua nonnihil abscesserant, observantiam puriorem reduxit *Brow. lib. 19 num 183*. Ità Jacobus Eltzius anno 1580. perægrè consentientes transtulit ad Insulam inferiorem Rheni in intercidentem ibi Canonico-rum Regularium Ædem: illam verò Sanctimonialium, quæ antiquitus appellabatur Lera, Patribus Societatis adscripsit, ut diximus antea.


Monialibus ad S. Catharinam præparatur, & attribuitur locus; dum anno 1276. pia & locuples quædam Virgo suam ex lapide structam domum sex devotis, à Dominicani Conventus Priore denominandis, Virginibus in ultimis suis tabulis legat; dumque is eo dono sui Ordinis alumnas lætificat, hæc eâ lege, ut fertur, admittuntur à civibus, ut, si petantur, servitia sua exhiberent ægrotis; quo tamen à debito, si quod iis fuit, nunc absolutæ videntur.

Franciscani quoque Instituti cultrices, quas Tertiarias dicimus, in Cænobio S. Martini

quondam hîc floruisse, ac defloruisse per injuriam temporis, scitur exinde; quod, dum Joannes Schônenbergicus sub annum 1587. Andernacenses, legibus S. Dominici obstrictas, Virgines, quatenus, ut Browerus in *Annal. lib. 22. num. 71.* dicit, earundem honestati & pudicitiae præsentiora remedia ferret, huc transtulit, ac in Parthenonem mox dictum immisit, hæ ibidem tres Franciscanas invenerint, quibus successivè demortuis, sola deinceps Dominicana Familia cœnobium tenuit, ac in eo in hunc usque diem cultui suæ regulæ vacat.

Quæ in Institutum S. Augustini jurare, ac Moniales S. Barbaræ communiter solent vocari, primùm incoluere vicum, non procul à Mosella situm, cui nomen Lonnig: inde verò ad annum 1143. in Vallender, & ab hinc anno 1567. intrà Confluentiam prope Villam Carthusianorum translata, tandem anno 1708. die ultimâ Mensis Martii transmigrârunt in plateam Lôhranam: ubi nunc in Monasterio, super spatiis hospitalis veteris noviter erecto, vota sua Deo solvere sollicitæ, emigrationem quartam ad temporis consummationem expectant.





CAPUT XV.

De Sanctorum Reliquiis Sacraria
Confluentina ditantibus.

INspectis, breviterque descriptis divino cultui dicatis ædibus, nunc ad sacros earundem thesauros, id est, ad conditas in iis Sanctorum reliquias retegendas & explicandas accingimur: has namque raris regibus præstare cimmeliis, noverat D. Chrysostomus, dum apud Metaphrasten ait, & optat; *Sit mihi gladius Pauli pro corona, & clavi Petri pro gemmis, infixis in diademate?* Has velut aurum potabile locum principem inter optima & pretiosa medicamenta tenere, ac miseris præsentaneam afferre salutem, clamitant sudaria Pauli *Act. 19.* consonat Hipponensium Præsul, dum *lib. 22. de Civit. Dei cap. 8.* refert; quod florum fasciculi, quos feretro S. Stephani quorundam pia fides admo-verat, valetudinem infirmis attulerint: confirmant hæc Magnericus & Gregorius, hic Turo-nensium, iste Trevirorum beatissimi quondam Antistites, ceu quos venerandas S. Martini Episcopi reliquias eripuisse è præsentissimo vitæ discrimine, perhibet Browerus in *Annual. Trevir. lib. 6. num. 69.* nosque repetemus infra *cap. 23.*

Hæc itaque sacra pignora hoc capite expositiuri, non ad omnia, sed ad ea sola tractatu nostro convertimur, quæ nobis in Historia Trevirensi Diplomatica, nec non in Annalibus Browerianis produntur; quoad reliqua verò, quæ vel inter insignia lipsana non reponuntur, vel quæ ad Nostros ab ætate recentiore sunt lata, piam Lectoris curiositatem ad ipsasmet lipsanothecas remittimus.

Annus 836. novâ non modò Basilicâ, sed & sacro corpore B. Castoris, volente ac dirigente Cœlo, Confluentiam exhilaravit: qui Sanctus Dei Sacerdos in sæculo iv. defunctus, ac in tumulum apud Caradonam illatus, huc demum ea utique de causa solemniter est translatus, ut, quos verbo olim & opere regeneraverat Christo, suo non solùm patrocinio, sed & corporis tutaretur præsidio. Insignis ac venerandus hic thesaurus quotannis ad decimam tertiam Februarii, quâ D. Castor ad cœlestia regna migravit, palam spectandus Confluentium religioni exponitur. Videantur à nobis dicta *cap. 2. & cap. 10.* nec non Browerus *lib. 4. num. 71.*

Eodem sæculo eadem Basilica potiebatur S. Goaris brachio: qui fidelis Dei famulus in *Provincia Aquitania* ortus temporibus *Childeberti Regis Francorum*, statim ab infantia verus Dei cultor fuit: hic postmodum ibi Presbyter consecratus, patriam parentisque deseruit; & in *Provincia*, qua ripis *Rheni* fluminis contigua, *Trigoria* nuncupatur, atque ad *Dioecesin* pertinet *Trevire- rum*, Deo liberè servire delegit, usque in finem

vita sua. Ita Ven. Beda in Martyrologio pridie Nonas Julii; quibus Rabanus in Martyrologio suo subnectit: *Hic hospitalis multum fuit, & largus in pauperes, & Deo in sacris Missis & psalmodiis instanter quotidie serviebat: fecit etiam miracula multa in vita sua, quam ad annum 573. beatissimo fine conclusit.* Videatur Browerus lib. 8. num. 101. 102.

Idem Castorense Sacrarium undecimo circiter sæculo incrementum tertium ab exuviis B. Rizæ, sive Richezæ, Francicæ Matronæ, recepit: hæc, testibus literis, à Communitate Confluentina anno 1265. ad summum Pontificem datis, *Fuit nobilissima, de Ducum seu Imperiali genere descendens: & postquam hereditariâ successionem, seu viri solatio destituta plenariam rerum potestatem habuit, Christum sibi fecit heredem, venerabilibus Ecclesiis & piis locis omnia, quæ habuit, conferendo, sicut in privilegiis ipsius, & antiquis libris dignoscitur contineri. Ipsam quoque Ecclesiam S. Castoris multis & magnis villis, & possessionibus, & curtiis cum hominum familia multa valde magnificè dotavit, & cultum divinum cum diversa suppellectile gloriosius ampliavit, in quâ postmodum sepulturam elegit: ad cuius tumultum multa signa & miracula per ejus meritum Dominus operatur in argumentum & magnificentiæ meriti, sicut piè credimus, & fidelibus ad devotionis gratiam promerendam.* Sacrum hoc depositum, annuente Summo Pontifice, in medio Ecclesiæ, & in loco eminentiore sequentibus annis repositum, ansam Confluentinis

præbuit, honori hujus Sanctæ religiosum quendam Cœtum, sive, ut nunc dici consuevit, Sodalitatem dicendi, quam sub annum 1480. ejus adhuc cultui deditam, adscriptorum multitudine floridam, ac censibus provitam fuisse, ex monumentis Castorensibus constat. Ex quorum etiam præscripto annua hujus Sanctæ memoria ad diem 30^{am}. Augusti officio festivo recolitur. Dúmque insuper in iisdem monumentis refertur; *B. Riza dedit fratribus curtem fructuosam apud Covernam cum omnibus appertinentiis, familia multa, & vineis*, posteritas inde concludit, ipsam habitasse Covernæ. Cæterum aliæ Castorensium chartæ, quæ mox dictam translationem corporis B. Rizæ anno 1286. VI. Cal. Majas ab Henrico Vinstingio Archiepiscopo factam affirmant, historico mendo laborant: Vinstingius enim iisdem anno, mense, ac die animam exhalabat Bononiæ.

Confluentina Carthusia tum capite S. Officiæ, & brachio S. Servatii Episcopi, tum & sacris corporibus SS. Beati & Noitburgis ditari, ac tutari se gaudet: hoc Colonia Agrippina, istud Trevitorum Augusta Ecclesiæ hujus Montis faverunt: Hæc ex regio Francorum Stemmata genita, virginitatis suæ florem sub annum 716. in Agrippinensium Mariano parthenone Christo Sponsio devovit, & ad ejus amplexus in prima adolescentia, prout in votis semper habuerat, immaculata pervenit. Iste purissimæ vitæ Sacerdos, dum in solitudine Montis Vogasi multos in annos asceticis exercitationibus

vacat, boni tandem ac fidelis servi præmia sub annum 660. in curia cœlesti reportat: à cujus subinde tumulo, quem ei primum Treviris ex marmore parari curavit, laborantes febribus remedia frequentiora tulisse, Annales Broweriani testantur *lib. 7. num. 32. 106.* videatur quoque Historia Trevir. Diplom. 10. 2. pag. 115.

In Lipsanothecis Florinensis Ecclesiæ eminet ac præ cæteris emicat S. Sacerdotis & Confessoris Florini venerabile caput: qui Dei servus quis à natalibus, & à sanctis conversationibus fuerit, paucis nostris ostenditur *cap. 9.* pluribus verò apud Browerum *lib. 11. num. 5. & seqq.* qui quoque *lib. 18. num. 32.* refert, quod & caput S. Sylvestri Papæ inter Reliquias Florinenses servetur.

Cæterum ex illis, quæ post alterum Annalium Trevirensium tomum prostant in Indice sub litera I. quod nempe Tunica Redemptoris interior ad annum 1531. Confluentiæ fuerit denuo fidelium religioni monstrata, ex his, inquam, inferre quis faciliter posset, quod Confluentia sacratissimum hunc thesaurum aliquando vel possederit, vel asservandum receperit: sed sciendum, concinnatorem hujus Indicis, dum in Annalium Trevirensium *libro 21. num. 310.* ly *Confluente* per C. majus initiatum aspexit, ex mendo vel ortho- vel typographico prolapsus esse in errorem historicum; quod enim Annalista per voculam *Confluente* non in locum, sed in confluentes, sive in personas Treviris concurrentes intenderit, textum examinanti patebit.



CAPUT XVI.

De Curia Civica.

Sicut in Confluentiam ad Ædium sacrarum Ministris, nec non à Divis ejus Tutelaribus puritas, vigórque religionis dimanant, sic ipsamet justitiæ cultum in Curia sua vigilanter & assidue zelat, dum sibi Magistratum nonnisi juxta merita deligit, jura per hunc suis civibus dicit, præmia poenásque decernit, ordinem rebus publicis indit, actionibus modos præscribit, concordiam nutrit, dissidia litésque componit, sicque res suas magis indies magisque assurgere, florem emittere, fructibúsque ditescere facit.

Hanc autem Curiam, verè juris & æquitatis palæstram, eo in loco, in quo hodiedum conspicitur, ultra quinque jam sæcula sitam, à Magistratu tritam, atque in ipsa, quidquid rerum publicarum vel privatarum erat, curatum absolutúmque fuisse, liquet ex pervetustis tabulis, quibus Magistratus, concurrente civium consensu, anno 1283. ad Calendas Octobres sancivit; quod, si quis contra Principem temerè quid moliri præsumperit, persona in Principis manus, fortunæ autem ejus prolapsuræ sint in

ætarium fisci. Historia Trevir. Diplom. 10. 1. pag. 819.

Eâdem quoque in Curia ipsummet aliquando Principem, stipantibus cum Comite Nassovio, Confluentinorum tunc Imperiali Præfecto, aliarumque nobilium personarum coronâ, pro tribunali sedisse, ac jus in causa litigiosa dixisse, refert eadem Historia Trevir. Diplom. 10. eod. pag. 612.

Cæterum quod modernum ejus splendorem, ac novam quasi faciem attinet, hæc referenda sunt ad annum 1725. quo ea, Principe, ac Magistratu authoribus, ex ærario civitatis sunt orta.



CAPUT XVII.

De Gymnasio.

Divinarum, humanarumque literarum notitiam cujuslibet christianæ Reipublicæ basin, quin & animam esse civilis ac ecclesiastici fori, omnium prudentium autoritas, ac multiplex experientia docent: unde Gymnasia in urbibus oppidisque erigere, literarios ludos indicere, magistros eruditos accersere, artibus ac scientiis præmia & favores addicere, sæculares æque ac Ecclesiastici Principes præcipuo semper zelo,

æréque profuso curantur: quo principali spiritu dum & Archi-Præful Schönenbergicus regitur, eo is motore Patres Societatis JESU, ut juventuti literas humaniores prælegerent, anno 1580. ad Confluentes accersit, atque in Cœnobium, quod Sanctimonialium Cisterciensium erat, ex Pontificiis inductis immittit. Senatus itaque ut & se ad Principis sui vota accedentem monstraret, communi mox sumptu pro quinque inferioribus classibus gymnasium à fundamentis attollit, totidémque domiciliis seu Museis adornat: in quibus & ego, ut grammaticam cum literis humanioribus discerem, integrum quinquennium egi.

At verò ut Scholasticorum numerus novis indies incrementis augetur; ut angustia exinde accrescunt museis; ut quoque Magistri incommodis quotidianis gravantur, Joannes Hugo ab Orsbeck, verè patriæ Trevericæ Pater, nec non à posteris cum reverentia nominandus Princeps, ære proprio gymnasium magis amplum & cominodum, maximo Confluentia commodo, ad annum 1695. fecit assurgere: in quo ab anno 1716. usque in præsens non solæ humaniores literæ ut antè, sed & Philosophia & Sacra Theologia à Patribus Societatis traduntur: quæ aliàs, nimirum ab anno 1702. usque ad annum præfatum à Religiosis S. Dominici in eorundem Cœnobio prælegebantur, absque magno tamen Scholasticorum confluxu; urbana namque juvenus utriusque hujus facultatis ad-

discendæ gratiâ ut plurimum ad exteras se Academi-
as vertebat.



CAPUT XVIII.

De Mœnibus ac Munimentis.

Civitas munitur ac custoditur bifariam, physicè nimirum ac moraliter: munimenta civitatum physica sunt muri, turres & valla, cæteraque latibula, ingenia, & artificia Martis, quibus contra hostem exterum salus civium in tuto locatur, pericula quoque ac incommoda plurima ab aris & à focis arcentur. Munimenta sacra, seu in sensu morali sumpta, sunt pax & concordia civium, cura & nutritio pauperum, punitio & proscriptio scelerum, obsequens ad leges attentio, & constans erga Deum religio; quæ si civitati non adsint, aberit quoque, vel defluet publica ejusdem salus, quin & mœnia cum cæteris munitionibus erunt, quasi non essent, juxta dicentem Scripturam; *Nisi Dominus custodierit civitatem, frustra vigilat, qui custodit eam.* Porro Confluentiam utroque hoc munimento tutari, sub eodem tranquillitate potiri, benèque ac feliciter agere, ipsos ejus æmulos, & arrosos non latet: unde & hic loci nil ultra à nobis deposcitur, nisi ut indice-

mus ac prædicemus Antistites, qui Confluentiæ prima & postera propugnacula, ac munimenta dederunt.

Arnoldum Isenburgicum extitisse primum, qui ad annum 1244. Confluentiam mœnibus, turribus, & vallis munire ac concludere cœpit, refert Browerus in *Annal. lib. xvj. num. 32.* ubi & dicit; Advocationem Confluentiæ ab eodem Principe pro se, suâque Ecclesiâ comparatam fuisse *septingentis* marcis Colonienfis monetæ; hæc autem sicut ab ipso breviter & obscurè dicuntur, ita melius exprimuntur hâc chartâ.

Arnoldus Dei gratiâ Trevirorum Archi-Episcopus, omnibus has literas visuris salutem in vero salutari. Notum esse volumus tam præsentibus, quàm futuris, quod Nos Advocaciam in Confluentia, cum omni jure, honore, fructu, & appendiciis ejus, jure feudali descendentem ab Ecclesia Trevirensi, à Viris Nobilibus Waleramo & Ottone, Comitibus de Nassowe, nomine dictæ Ecclesiæ Trevirensis, pro *sexcentis* marcis Colonienfium legalium denariorum, duodecim solidis pro qualibet marca computatis... titulo pignoris recepimus in hunc modum: quod, si Advocaciam redimere voluerint propriis denariis, intra festum Beati Martini & Beatæ Walburgis poterunt liberare... Datum anno MCC. quinquagesimo tertio, Octavo Kalendarum Augusti.

Ex quibus non difficulter colligi, benèque concludi potest, quod, posteaquam Fridericus II. Imp. Confluentiam à juribus Advocati Im-

perialis exemerat, Theodoricus Wedanus, proximus Arnoldi præcessor, Advocatiâ in illa Comitibus Nassoviis per modum feudi contulerit. Revideantur dicta pag. 29. & 30. simulque notetur, quod, cum præallegatum Diploma tunc primum ad notitiam nostram pervenerit, quando anteriora hujus operis folia fuerant jam typo vulgata, oportuerit cum Browero hic loci referre, quod alibi referendum erat. Vid. Joannis Jacobi Reinhardt's *Juristische und Historische Ausführungen. parte 1. pag. 318.*

Cæterum prout Annales Broweriani bene perhibent, quod Arnoldus Confluentiam, nullis suo tempore mœnibus instructam, vallo & munitio-nibus cingere cœperit; ita minus rectè eorundem Index Chronologicus dicit, quod muri ab eodem cœpti, per Henricum Vinstingium ad annum 1282. fuerint ad perfectum deducti: primò namque Annales mox dicti hunc ad annum hoc de murorum progressu, sive de manu ultima mœnibus iisdem apposita planè nihilum, multum è contra memorant de quopiam intrâ Confluentiam per Vinstingium noviter suscitato, & à civibus impugnato castello: dein illis ipsis diebus, qui civibus æque ac Vinstingio satis turbidi, nubilosi, ac infelices fluebant, istis adjudicabatur seu confirmabatur libertas, civitari de muris, aliisque de munimentis per semet-ipsos prospiciendi, prout dictum est cap. 6. unde à verisimili videtur abesse, quod Henricus Confluentium mœnia in circumstantiis tam confusis absolverit. Cæterum an civis memoratum

jus in opus aliquando redegerint; item an Isenburgicus, prout mœnibus initia, ita & coronidem dederit, Historiæ nostræ Duces non produnt.

Prodit è contra, & prædicat dedicatoria, à Masenio mox dictis Annalibus præfixa epistola, quod Carolus Casparus à Petra Confluentiam eo, robore quo nunc contra hostica molimina pollet, induerit: elogia, idcirco Principi ac operi data, sic sonant. *Cernimus ad Rheni Mossellæque Confluentes tuâ industriâ, impensisque tuis surgere munimentum Confluentina urbis eximium, quod non illâ, quâ nuper, facilitate venturos deinde inimicos sit excepturum; ita vallis propugnaculisque undequaque cinctum firmatumque, jam ad suam propemodum perfectionem spectat, operis auctorisque sui memoriâ diu fructurum.*



CAPUT XIX.

De utroque Confluentium Ponte.

Pontes idcirco ponuntur, ut publica emolumenta reponant; ut nimirum permeantibus transitum commodum & perfacilem præbeant, ut inundationum pericula minuant, earumque impedimenta removeant, ut ærarium publicum portoriis seu pontenagiis augeant, & ut civitati-

bus splendorem, ornatumque adgenerent: quorum quodlibet cum & Nostris affluat ex utroque ponte, congruit nunc dicere, quis hunc ad Rheni, & quis alterum ad Mosellæ ripas ponendo, totuplicis boni in hanc usque diem author extiterit.

Pons Mosellanus Balduino Luxemburgico, tam ab annoso regimine, quam à rebus prudentissimè ac felicissimè gestis famigeratissimo Principi, fundamenta sua cum fastigiis debet; sive, ut Browerus *lib. 17. num. 111* solitâ suâ phrasi dicit; *Baldwinus Mosellam, Confluentium Oppidum præterfluentem, eximii operis arcuato ponte, ex quadris politè factis, & affabre iunxit, magnoque totius Oppidi commodo, & ornamento flumen id pervium fecit; insimulque voluit ac decrevit, ut Treverica ditionis cujuscunque status ii vel conditionis, liberè quidem per eum commeari possent, cæterorum autem nemo, exceptis Clericis, nisi obolo dato, quem ab Hallis Halensem dicebant, ponti nimirum servando, reficiendoque.*

Porro quis annus huic operi lapidem angularem substraverit, non convenit inter Chronologos: Browerus *l. c.* annum 1341. Spanheimense Chronicon annum 1331. indigitat; vetusta verò manuscripta, quæ in Cœnobio D. Mathiæ extra Trevirim asservari feruntur, verisimilius id affirmant de anno 1343. quod & confirmant viginti supra unum apud Avenionem in Papali Curia commorantes Episcopi, dum in suis, ad annum mox dictum sub 24^{ta} Octobris exaratis literis, non de ponte jam

cœpto, sed de mox incipiendo seu erigendo sic ajunt. *Cupientes, ut pons de novo per venerabilem in Christo Patrem, Dominum Baldewinum, Archi-Episcopum Trevirensē fundandus, ad salubrem effectum perducatur; universitatem vestram rogamus, monemus, ac piē in Domino exhortamur, quatenus charitatis intuitu ad tam laudabile opus fundandum pro totius communitatis, ac Christi fidelium transeuntium commodo, ac pro re publica, pias eleemosynas, & grata charitatis subsidia misericorditer in Domino erogetis, ut per hoc & alia bona, quæ inspirante Domino feceritis, possitis ad æternæ felicitatis gaudia pervenire.* Post quæ singuli hi Episcopi omnibus & singulis, qui quoquo modo hoc ad opus opere charitativo concurrerint, 40. dies Indulgentiarum de injunctis eis pœnitentiis misericorditer in Domino, accedente Domini Balduini consensu, relaxant. *Historia Trevirensis Diplom. 10. 2. pag. 155.*

Sicut autem Balduinus arcuatum hoc opus ad quorumlibet transeuntium commoda, nec non in Confluentiæ profectum, & ornamentum absolvit, ita Joannes Hugo, dum laterales ejus muros attolli, iisque fenestellas jaculatorias fecit imponi, id insuper in novum quoddam munimentum redegit, in quo nunc contra invasiones hostium & currulia tormenta plantari, & militares copię possunt tutâ statione gaudere.

Idem Eminentissimus Princeps ad diminuenda incommoda, tollendâque pericula, quæ ex navali trajectu in fluminibus oboriri solent, primus præterfluenti Rheno ad annum 1680. tra-

jectitium pontem imposuit; exindéque in hanc usque diem ærarium Principis, nec non rem publicam luculentis commodis, & incrementis quotidianis amplificat. Porro quod ponto, Rhenum olim transmittentibus serviens, aliquando ad Monasterium S. Mathiæ extra Trevirim cum omni emolumento spectârit, monumenta ejusdem Monasterii tradunt: id autem quo tempore hujus juris possessionem adierit, & an ad annum 1680. eam primùm amiserit, explorare non licuit.

Electoralis huic ponti Comes Neowedanus, approbante ac concurrente Bonnensi Regimine, simile novum opus anno 1742. opponens, atque Rheno supra rivum Nette è regione Neowedæ imponens, publicum trajetum est orsus: at verò ut hic ausus Viennam ad Consilium Imperiale Aulicum Trevericis libellis defertur; ut & ibi evidentibus argumentis docetur; dominium Rheni à rivulo Duberbach inter Brie & Rense usque ad ripam Nette prope Andernacum accenseri Antistitis Trevirensis Regalibus, Comes causâ cecidit, ac pontem, Cæsare urgente, volens nolens removit. *Historia Trevir. Diplom. to. 2. pag. 165. 178.*





CAPUT XX.

De publicis, Confluentiæ celebratis, conventibus.

Spectasti, amice Lector, Confluentiam Aris, Tribunalibus, legibus, scholis, mœnibus, & pontibus, ut par est, à sæculis elapsis instructam: vident quoque tempora nostra mercimoniis floridam, civibus validam, ædificiis splendidam, sub Archi-Episcopalibus Infulis uti aliàs auctam, ita & adhuc ad ampliora & altiora surgentem: at nunc miremur, quod & in nobile, frequensque theatrum præteritis annis surrexerit, in quo Cæsares, Reges, ac Principes nunc sacrosanctæ Ecclesiæ, Imperiique Romani tutores, nunc Patriæ Teutonicæ Patres, jam pacis Angelos, nunc scelerum vindices, jam æqui honestique satores, uti studiis, ita & laudibus perpetuò memorandis egerunt; prout ex nunc enarrandis patebit.

Primum itaque actum hoc in theatro erat conspiciere, quin & mirari, quando Ludovico Pio ad annum 840. vigesima die Mensis Junii ad æterna translato, hæredes ejus anno 842. solemnem hîc conventum agentes, regna paternæ

terna æquius, quàm Pater antea fecerat, dispartiebantur, atque Lothario universum terrarum tractum, quem ab una parte Rhenus, ab altera Rhodanus, Araris, Mosâ, & Scaldis allambunt, ac includunt, cum Italia & titulo Imperatoris Augusti: Ludovico autem, qui Germanicus communiter cognominatur, Franciam Orientalem, sive Germaniam transrhenanam cum tribus Cisrhenanis Urbibus Moguntiâ, Wormatiâ, & Spirâ: Galliam demum, seu Franciam Occidentalem Carolo, qui nuncupatur Calvus, concorditer adjudicabant: quæ regnorum terrarumque partitio anno postero novum robur novo partium consensu in confessu Virodunensi recepit. *Historia Trevir. Diplom. 10. 1. pag. 147. Browerus lib. 8. num. 93.*

Altera in eodem theatro pandebatur scena, dum ad annum 860. à Carolo Calvo, à Ludovico Germanico (: hic non modò suam, sed & Ludovici Italiæ, & Caroli Provinciæ Regum absentium personas tunc repræsentabat :) nec non à Lothario Germanici & Calvi nepote, & ab undecim Pontificibus in Basilica D. Castoris agebatur sacer confessus; in quo hi quinque Reges icierunt fœdera, unâque cum Præsulibus laboranti saluti publicæ consuluere per saluberrimas leges, tuentes florem ac honorem ecclesiastici statûs, & exterminantes frequentiam, & temeritates prædonum. His de Comitiiis *Annales Trevirenses* sic ajunt. *Annus Christi octingentesimus & sexagesimus jam processerat, quando Confluentium oppidum in Treviris supra omnem*

retro memoriam, percelebri trium Regum Conventu, Caroli & Ludovici fratrum, & Lotharii nepotis; & Synodo pariter Episcoporum se extulit. Et post pauca interjecta. *Hac sunt nomina Episcoporum, qui anno Incarnationis Dominica DCCCLX. ad Nonas Junias in Secretario Basilica S. Castoris consideraverunt cum Nobilibus & fidelibus Laicis firmitatem, quam gloriosi Reges nostri HLudovicus, & Carolus, atque H Lotharius inter se fecerunt vij. Idus Junias in eodem Monasterio, & qui hac Capitula ab omnibus observanda acceptaverunt.*

Quamvis autem mox citati Annales Antistitum illorum nomina, sed&que, quas tenebant, non exprimant, aliunde tamen accepimus, quod fuerint Hinemarus Remensis, Guntharius Coloniensis, Altfrius Hildesiensis, Salomon Constantiensis, Adventius Metensis, Hatto Viradunensis, Franco Tungrensis, Teudericus Cameracensis, Leuthertus Moguntinus, Gebehardus Spirensis, Christianus Ansisiodorensis, Teutgaudus Trevitorum Antistes cum summæ Edis Præposito, nec non cum aliis quibusdam Clericis non ita pridem ab impiis ac rebellibus captus, cum inter mox dictos Præsules non memoretur, diebus istis in custodia adhuc detentus fuisse supponitur. Browerus lib. 8. num. 123. 124. Historia Trevir. Diplom. 10. 1. pag. 197.

Incrementum tertium, illudque non exiguum splendoribus Confluentinis accessit, quando Carolus Franciæ, & Henricus I. Germaniæ Re-

ges, cum septem Episcopis ad annum 922. in Synodo hîc actâ condiderunt canones adversus eos, quos simoniaca lues infecerat: contra illos quoque, qui contrahebant matrimonia in gradibus, ecclesiastico jure prohibitis; nec non contra Monachos, qui obedientiam negabant Episcopis.

Porro Episcopi sua hos ad canones consilia & suffragia dantes, erant Hermannus Coloniensis, Herigerus Moguntinus, Thiedo Herbipolensis, Lotharius Mindensis, Dodo Osna-brugensis, Richonus Wormatiensis, Richquinius Argentinensis, Wanno Paderbonnensis. Rutgerus Archi-Episcopus noster injuriarum ac insectationum incurrendarum metu, quibus Gieselbertus, Lotharingæ Dux, Clerum sub id tempus vexabat, hoc à Synedrio abfuisse censetur. Browerus *lib. 9. num. 69.* Historia Trevir. Diplom. 10. 1. pag. 285.

S. Henricus II. cognomento claudus, contra suos ac patriæ Trevirensis hostes, anno 1012. publicum hîc congressum indixit: in quo frequens Nobilium Præsulûmque confessus eidem Henrico adversus turbatores pacis omnem non modò opem addixit, sed & institit, ac urisit, ut sententia contra ipsos ex omnium consensu prolata, si deinceps acquiescere, ac obtemperare noluerint, strictæ protinus executioni daretur. Præcipua tumultuantium ac obstrepentium capita erant Henricus Dux Bavarîæ, Theodoricus Mediomatricum Episcopus, nec non Adalbero Comes Luxemburgicus; hîc Cunegundis Augustæ

germanus frater, ac sub Ludolpho Trevirorum Antistite novissimè defuncto Sacellanus Domini, dum Trevirensensem tiaram, quam impotenter ambierat, Megingaudò impositam dolet, eum ob id multimodâ insectatione premebat. Browerus *lib. 10. num. 88. & seqq.* Eckardinus Annalista Saxo *pag. 429.*

Lothario hujus nominis Imperatore II. ad annum 1138. prid. Non. Decemb. in itinere, quo ex Italia petebat Germaniam, morte sublato, Albero Archi-Episcopus noster suâ, quâ pollebat, autoritate Imperii Principes, quatenus Germaniæ novum Regem crearent, non Moguntiam, prout vota & consilia multorum urgebant, sed Confluentiam fecit conscribi: qui proin anno postero ibidem aperientes Comitibus, ad prævalentia Alberonis consilia, Conradum Sueviæ Ducem, in tertium hujus nominis Germanorum Regem cooptant, eumque Aquisgranum properanter ducentes, in Solium Caroli Magni levant, ungunt, coronant, Cæsaremque salutant: cui tamen electioni, quia non consultis omnibus Principibus facta, gravis deinceps contradictio à Saxonibus fuit obmota. Browerus *lib. 14. num. 17. 18.* Piascius *pag. 489.* contra Ottonem Frisingensem *Chron. lib. 7. cap. 22. & Dodechinum in Append. ad Marian. pag. 472.* qui hæc minus rectè ad annum 1138. reponunt.

Idem Albero, verè magnus non modò suæ, sed & aliarum ditionum Rector & Atlas, ut Comites, Nobilisque clientes suos comitatum

Bonnenſem immodicè certatimque appetere , iras exin & bella concipere, quin & gladios acuere reſcit, eos anno 1152. ad Conventum hìc agendum accerſit; in quo dum magna Comitum, Nobilium, & Eccleſiaſticorum frequentia in anni ſe limine ſiſtit, Albero ipſâ ſacrâ Epiphaniæ die inhiantes ac diſſidentes animos ſuavi ſuâ potentiſque authoritate reſſimit, ſedat, componit, ſuâſque ſic terras à non paucis ac levibus malis, ipſum verò Imperium à motibus pernicioſis præſervat: & en ! vix abſoluto diſmiſſoque conſeſſu, digniſſimus hic Princeps, curis jam & ſenio gravis, ægitudine extremâ corripitur; quâ & Decimo Octavo Calendas Februarii in Caſtro Confluentino conſectus, utique eorum nunc intereſt choro, de quo author pacis; *Beati paciſici, quoniam filii Dei vocabuntur*. Manibus ejus quidam Poëta meritò bellæque accinuit: *Magnus eras magnis, par parvis, meta tyrannis, gloria divitibus, portio pauperibus*. Browerus *lib. 14. num. 85.*

Philippus Rex, Henrici VI. Imperatoris germanus frater, cum Ottone IV. Imperii gubernacula in Schiſmate tenens, anno 1205. ſolem-nem hìc Conventum cum Principibus ſibi adhærentibus agit; in quo hi novo ſe illi juramento obſtringunt, is verò ſpebus novis erigitur, fore, ut Ottoniani tandem laſſati, Imperiale Solium ſoli ſibi ſcandendum, tenendumque relinquant; quam tamen ſpem mors ejus præmatura præſcidit. Browerus *lib. 15. num. 50.*

At nunc Confluentiæ nomen, hujusque lau-

dem per omnem penè mundum clamorofior fama deportat, dum ad annum 1211. Rex Bohemiæ, Moguntinorum ac Trevirorum Antiftites, Austriæ ac Bojariæ Duces, Thuringicæ Provinciæ Comes, nec non alii quàm plures Germaniæ Proceres in indictis ibidem Comitibus Ottonem IV. quem Apostolica Sedes ad annum 1210. fceptro coronâque exuerat, è throno imperiali dejiciunt, in eumque ad mentem & fuggestionem Papæ, qui erat Innocentius III. Fridericum II. Henrici VI. filium ac Siciliæ Regem concorditer quidem levant, at non æque feliciter, quod per ipsum fperabant, temporum fuccelfu reportant: prout ex Hiftoriographis fatis conftat. Browerus *lib. 15. num. 83.*

Porro ficut diebus iftis Otto IV. Fridericum Siculum coronæ fuæ, fuorumque jurium raptorem & ufurpatorem ajebat, ita temporibus pofteris, circa annum nempe 1357. Eduardus Rex Angliæ, qui thronum Francicum de jure opinabatur fuum, contra Philippum Valefium, Regem Franciæ, fimilibus affurgebat querelis; quin &, ut Imperii Principes fuæ cauſæ patronos promotoréque accerferet, ex Anglia feftinabat ad Inſulam, quæ infra Confluentes prope Vallendariam in Rheno confpicitur: dùmque ad ejus instantias etiam Ludovicus Bavarus hujus nominis Imperator IV. multis cum Principibus ac Proceribus adefl, ac pompâ regiâ Confluentiam inflans crebrius cum Eduardo confultat, hic, quod in ſpe ac in votis gerebat, in amplis quidem promiffis, at non æque in ipsis factis

assequitur: unde dum sensim & nummaria rei decessu, & aliis difficultatibus premitur, demum à Balduino Archi-Præsule nostro mutuas pecunias sumens, Regniq̃ue sui coronam, quam Chronicon Spanheimense *inestimabilis pretii clenodium* vocat, in pignus penes Nostros deponens, suis deinceps rebus in Insula prædicta, ad quam 24^{ta} Junii venerat, usque ad 8^{vam} Septembris sub papilionibus operam vix non frustraneam locat. Historia Trevir. Diplom. 10. 2. pag. 129.

Confluentia ad annum 1457. Imperii Principibus & Magnatibus denuò suam curiam dicat: ad Electorale namque Collegium, & ad cæteros Rhenanæ Germaniæ Procures crebrius devolutâ querelâ, quod Dynasta Westenburgicus receptum non modò, asyllumque prædonum rapacitati dedisset, sed & mercatores Colonienses in via publica tentos, carceri in suo castro mandasset, ab iisque in lytrum duodecim millia aureorum tulisset, Jacobus Badensis, non ita pridem ad Cathedram Trevirensensem evectus, & cæterorum Septemvitorum legati, nec non Nassovius, Seinenlis, & Virnenburgicus Comites Conventum ibidem agentes, Westenburgicum ad sequentia damnant. Lytrum restituat: à Septemviris veniam suppliciter petat: servitia sua quandocunque & qualitercunque Septemviri jusserint, exigentiis publicis per quadriennium proximè secuturum exhibeat. Browerus lib. 19. num. 104.

Maximilianus Imp. L. ut Annam Britonum

Ducis filiam sibi primùm desponsam, jam Carolo VIII. Galliarum Regi in conjugem dari, magnâ animi amaritudine pensitat, ad vindictæ consilia atque remedia se meritò, justèque convertit; subindèque ad annum 1492. primarios Germaniæ Principes, ac liberas Civitates Imperii Confluentiam convocans, cum Electoribus quatuor, nec non cum pluribus aliis Germaniæ Proceribus, & liberarum Civitatum legatis plures ibidem per dies super bello contra Francum movendo, nec non super suppetiis contra Turcas ferendis deliberationes & consultationes instituit. Browerus *lib. 19. num. 175.*

In sæculo decimo sexto, dum non una hæresis suas in Germania cristas insolenter arrigere, ac Orthodoxæ non solum Ecclesiæ, sed & Magistratibus politicis arrogantius insultare conspicitur, Confluentia, prout temporibus pristinis, ita & tunc commoda & opportuna est visa, in qua remedia valida, his malis congruenter objicienda, concipere ac præparare liceret: quem proin in finem Septemviro- rum quatuor, nempe Mogonus, Colonien- sis, Trevir, & Saxo cum frequentibus Provinciæ Rhenanæ Dynastis anno 1534. 13. Mensis Decembris Conventum ibidem agentes, inter prima concludunt, atque decernunt, Episcopo Monasteriensi (: hic Anabaptistarum intrâ Monasterium Westphalum insanientem proterviam diuturnâ quidem obsidione arctabat, at eam expugnare ac domare, prout optabat, non poterat :) tribus peditum millibus, trecentisque equitibus in sex

proximos menses suppetias esse ferendas ; quorum posthac concurrentibus animis & armis infelix tandem Civitas VIII. Cal. Julii capta & direpta, nec non expiata rebellium Anabaptistarum cruore, Sacramentum deinceps suo Principi dixit, & dicere pergit usque in hodiernum diem. Browerus *lib. 21. num. 6.*

In limine sæculi decimi septimi, dum Protestantium Status ac Principes adversus Dominum, & adversus Christum ejus, ad opprimendum nempe vel dispergendum Catholicum gregem, ad diripienda ecclesiastica bona, ad profananda Sanctorum delubra, ad concutiendum Romani Imperii sacratissimum Orbem, Conventus crebriores indicare, fœdera fœderibus nectere, bellica consilia cudere, frontemque ostentare norantur, Lotharius Trevir, Joannes Suicardus Mogonus, & Ernestus Colonienfis Antistites, ut impendentibus malis cum tempestivè, tum & potenter occurrerent, ad annum 1606. Confluentiæ congregiuntur, primùmque tunc concipiunt, ad annum verò 1609. ibi pariunt ligam, quæ triadem hanc hâc lege strangebatur ; ut, si quem ipsorum à Protestantibus peti vel infestari contingeret, definito militum numero alter alteri suppetiaretur ; quæ Præsulum Catholicorum societas amplior deinceps & valentior audiit, quando Wormatiensis, Spirensis, Argentinenfis, Basileensis, Osnabrugensis, Bambergensis, Herbipolensis, Eichstadiensis, & Augustanus Episcopi : Fuldensis, Campidunensis Abbates, aliique Imperiales Prælati ; Magnus

quoque Equitum Teutonicorum Magister, & Dux Bavarix suas ei vires jungebant: Catholicæ hujus militiæ Ductor deputabatur Bavarus; qui, uti & cæteri eidem confœderati Principes, passim Ligistæ, Protestantium verò capita Correspondentes appellabantur. Historia Trevir. Diplom. 10. 3. pag. 244. Masenius in continuatione Annal. Trevir. lib. 23. num. 48. 65.

Iidem Ecclesiastici Principes providentiæ suæ oculis quasi certò conspicientes, quod Correspondentes post obitum improlis Imperatoris Mathiæ, ad augenda sua robora & incrementa, nullis non viribus sint eò collineaturi, ut, exclusâ Domo Austriacâ, ex eorundem Secta, vel saltem ex imbelli Nostorum prosapia Imperio Moderator præficiatur, exciti & commoti curis, quas Ecclesiæ Imperiòque jurârent, ad annum 1616. Confluentiæ rursus conveniunt, consentiunt, atque concludunt, annitendum quibuscvis modis ac mediis, ut Princeps Catholicus, Cæsare adhuc in vivis agente, Rex Romanorum inauguretur. At verò quia alius erat Correspondentium sensus ac scopus, hinc & Ligistæ, quod in sanis consiliis, ac in sanctis conclusis habebant, effectui mancipare non poterant. Annales Trevir. lib. 23. num. 100.

Comitiis intrâ Confluentiam actis, breviter eousque adductis & consideratis, illa demum simili narratione contingimus, quæ in ejus vicinia, tertio nimirum supra ipsam lapide in agro Rensensi, sive in Sede Regia, parvum

quoddam theatrum spectantibus objiciente, celebrata leguntur, suntque tum ea, in quibus Carolus IV. Luxemburgicus ad annum 1346. Wenceslaus Bohemus ad annum 1376. Rupertus Bavarus ad annum 1400. levati sunt ad Imperii Romano-Germanici thronum: tum illa, in quibus cusa, conclusa, & obfirmata est unio Rhenensis, de qua Schilterus *to. 2. Instit. Jur. Publ.* tum denique & ista, in quibus ad annum 1338. confidentes Septemviri sterere fortiter pro juribus ac libertate Imperii, datisque ad Benedictum XII. Pont. Max. urgentibus literis, insistere vehementer, vellet, Joannis XXII. contra Ludovicum Bavarum decreta & acta rescindere, læsæque Imperii jura literis aliis redintegrare. *Historia Trevir. Diplom. to. 1. pag. 27. Browerus lib. 17. num 103. 126. lib. 18. num. 40.*

Quibus adde; anno 1657. post obitum Ferdinandi III. tres Electores Ecclesiasticos Cârlichii prope Confluentiam conventum particularem agentes, Imperii Coronam detulisse Baviaræ Duci, quia rebantur Principem hunc iis opibus esse, sub quo nec ab hostibus Germania, nec Germaniæ libertas periclitaretur, illique potentiam non nisi ex Ordinum benevolentia, & sic ab Austriæ tandem tutelâ emancipandam fore libertatem Germaniæ: at Bavarus saniore consilio ductus, assensum his oblatis negavit. *Historia Trevir. Diplom. to. 3. pag. 721.*

Porro sicut ex præmissis concluditur, quod tam festivè ac frequenter à summis Principibus hic acta Comitia cùm Civitati celeberrimum

nomen, tum civibus emolumenta nec vulgaria, neque pauca pepererint, sic & illa noviter confirmata cernantur, quæ cap. 1^{mo} de Primordiis Confluentinis retulimus: si namque peramœnus, commodusque Confluentiæ situs Germaniæ, Galliæque Reges valuit tam potenter attrahere, ut in ipsa sibi Curias, Palatia, Sedesque delegerint, quis ambigat, quin & ab Alemannis, ex Germania magna trans Rhenum quondam migrantibus, ipsa illa virtus magnetica quosdam avulserit, detinuerit, atque docuerit ad utriusque fluminis ripam initiare, ac fundare coloniam? Cui nostro sensui suis quoque suffragiis non difficulter accedent, quotquot civitatum origines, quæ ex monumentis cœvis, sive ex Scriptoribus synchronis aut supparibus demonstrari non possunt, vel à traditione, non rarò per antiquitatem corruptâ, vel juxta Strabonis & Broweri consilia à prudentibus conjecturis desumunt.



CAPUT XXI.

De Augustis hospitio apud Confluentes exceptis.

Confluentiam sicut in præmissis Cæsarum, Regumque theatrum ostendimus, ita nunc

iisdem, quin & insignibus Dei Servis frequens hospitium præbuisse, probamus, simulque non temerè ex utroque concludimus, quod inter Civitates Germaniæ non qualemcunque, sed eminentem sibi vendiceret locum, rectèque in vita S. Bernardi, nec non in libro miraculorum ejus de ipsa dicatur; *Confluentia in Paræcia Trevirensi famosissimus Vicus, & nobile Castrum, ibi situm, ubi Rhenus & Mosella confluunt.*

Ludovicus I. cognomento Pius cum Augusta, Prolèque Regiâ ad annum 836. 20mâ die Novembris magnâ pompâ ad Nostros ingressus, duos ibi dies cum tot noctibus egit, interimque largiter aureis & argenteis muneribus D. Castoris tumulum & Ecclesiam auxit. Historia Trevirensis Diplom. 10. 1. pag. 25. Maximum hunc, verèque tam nomine, quàm opere pium Principem ad priora etiam tempora, anno nimirum 823. in suo ibidem castro aliquandiu negotiis sui Regni vacasse, liquet ex Martenii 10. 1. *Ampl. Collect. pag. 80.* ceu ubi adducit chartam, pro Tancrado Abbate Prumiensi ab eodem Principe 14. Cal. Septembris ad annum mox dictum Confluentiæ datam.

Lotharius I. Ludovici Pii natumajor filius, ad annum 842. in idem palatium, sive Castrum divertens, cum duobus suis fratribus, ac Regibus, Ludovico Germanico, & Carolo Calvo, in æquas ibidem portiones paternam hæreditatem divisit. Browerus *lib. 8. num. 93.* Historia Trevir. Diplom. 10. 1. pag. 147.

S. Henricus II. cognomento tum Pius, tum

& Claudus, ac inter sæculares ultimus Confluentiæ Princeps, occasione Conventûs, quem pluribus cum Episcopis, ac Germaniæ Proceribus, contra suos ac Patriæ Trevirensis hostes, ad annum 1012. hic egit, suam quoque hic residentiam per plusculum tempus protraxit. Anno quoque 1016. ût Megingaudi Archi-Præfulis mortem percepit, rursus huc advolans, ad Adalberonis, Insulam ambientis, molimina & factiones attendit: dùmque pro eo minus prosperè, pro Poppone autem, Ecclesiæ Bambergensis Præposito, ad omne vorum rem fluere vidit, mox Trevirim cum ipso festinans, cum sub Cleri Populique consensu in Metropolitica non modò sede locavit, sed & in eum, in ejusque Successores Confluentium Urbem cum omnibus illius juribus & appertinentiis ad annum 1018. munificè religiositate devolvit. *Historia Trevir. Diplom. 10. 1. pag. 351. 354. Browerus lib. 11. num. 3.*

Henricus IV. multos in annos licentiosius ac irreligiosius agens, indèque rebus publicis detrimenta non minima, crebràsque confusiones accersens, quin & cum Pontifice Romano scandalosè ac pertinaciter dissidens, ût anno 1105. filium suum Henricum adversus se arma cudere, Regnùmque capessere, quin & à suis despici, deferi, ac prodi se videt, ad Confluentes honesto in comitatu festinat; inter quos per ferias Adventuales moratus, anno postero fatali demum exauthorationis ictu in Comitibus Moguntinis feritur. *Browerus lib. 13. num. 11. & seqq.*

Conradus III. in Electorali conclavi, quod anno 1139. apud Confluentes adornabatur, Imperator renunciatus, & anno 1150. illuc reversus, in Pentecostalibus festis per plateas rarâ pompæ specie, sub Cæsarea nimirum corona, ad Ecclesiam divinis astiturus procedit. Browerus *lib. 14. num. 79.*

Alterum ibidem anno 1211. à Proceribus Germaniæ designatum, & frequentatum conclave civibus nostris hospites nobilissimos & copiosissimos tulit: quorum capita exauthorantia Ottonem IV. Fridericum II. Siciliæ Regem, in regio comitatu præsentem, Imperio Moderatorem dedere. Hic dein Nostros ab Advocati Imperialis juribus atque præsidii, per literas, ad annum 1220. 26^{ta} die mensis Aprilis apud Francfurtum datas, penitus exemit, solique deinceps juri Archi-Episcopi Trevirensis subjecit. *Historia Trevir. Diplom. to. 1. pag. 658. videantur quoque dicta superius cap. 3.*

Henricus VII. post acta Coloniae Dominici Natalis solemnia, Balduino germano suo fratre, ac Archi-Præsule nostro, multoque alio perillustri comitatu stipatus, sub finem anni 1309. ad Confluentes ascendit; apud quos demoratus in annum posterum, fraternis demum instantiis jus telonii ibidem tum erigendi, tum & instaurandi concedit. Browerus *lib. 17. num. 12.*


Ludovicus IV. cum spectabili præcipuorum Principum ac Procerum agmine Confluentiam veniens, non unam ibi hebdomadam Eduardi Anglorum Regis negotiis extricandis ac ordi-

nandis impendit; demum vero fœdere se illi jungens, sub amplis promissis Eduardo factis, & sine congressibus dato, ad Bojos suos regreditur. *Vid. cap. preced.*

Maximilianus I. ab Anna, Caroli Galliarum Regis Coniuge, prius sibi datam, at nuper retractam, scissamque sponsalitiâ fidem gravissimè ferens, anno 1492. cum quatuor Septemviris, nec non cum insignioribus Germanæ Nobilitatis Capitibus super sumenda vindicta, super bello nimirum contra Francum movendo, nec non super expeditione contra Turcas paranda, apud Confluentes crebra colloquia, & prolixas consultationes instituens, dies non paucos paucis cum fructu in utroque negotio trivit. *vid. cap. preced.*

Carolus V. proximus Maximiliani Successor, ad annum 1543. ab Africana expeditione victor in Germaniam redux, aliquôtque diebus moras hic faciens, interim à Joanne Ludovico, Archiepiscopo nostro, officiis exquisitissimis colitur. *Browerus lib. 21. num. 29.*





CAPUT XXII.

De Regibus hospitio apud Con-
fluentes exceptis.

C Hildebertus Austrasiæ Rex suo hîc in Pala-
tio circa annum 585. non rarò divertere,
ac jura suis populis in eo dicere solitus, Con-
fluentiam uti adventantibus multis semper &
magnis hospitibus, ita & emolumentis nec mi-
noribus nec paucioribus auxit. Browerus *lib. 6.*
num. 67.

Theodoricus, hujus nominis tertius Austrasiæ
Rex, primo sui regiminis, septingentesimo au-
tem ac vigesimo primo reparatæ salutis anno in
eodem castro sibi solium erigens, sicut in alia
sui regni negotia, ita signanter in Cœnobium
Sithivense suis ibi curis intendit, atque ejus im-
munitati novis tabulis novum robur impertiit.
Mabill. de Re. Diplom. pag. 609.

Ludovicus & Carolus, hic Galliarum, iste
Germaniæ Reges, ad annum 842. hîc commo-
rantes, dividunt hæreditatem paternam : ad an-
num verò 860. tursus appulsi, novis se fœde-
ribus sociant, conditis contra impios legibus

Ordinem ecclesiasticum protegent, ac publicas grassationes profligant. *Vid. cap. 20.*

Philippus Rex, Ottonis IV. æmulus, anno 1205. in comitatu suo multam huc Nobilitatem adducit; à quibus in cives cum multis gaudiis multa quoque emolumenta manârunt. *Vid. cap. 20.*

Wilhelmus Rex Rom. ad annum 1252. hîc diversatus, Monasterio Lucensi favorem imperit, quem legere est apud Leibnitium *Script. Brunsvic. to. 3. pag. 693.*

Eduardus Angliæ Rex ad annum 1337. ex Insula inferiori crebrius ad Nostros ascendens; ab iis, nec non & ab Archi-Præsule digno semper apparatu & cultu se excipi, ac prosequi vidit. *Vid. cap. cit.*

Ferdinandus Caroli V. Imperatoris germanus frater, ac propediem salutandus Cæsar, Anno 1556. nono die Julii cum Anna, Coniuge prægnante, hîc appulsus, à Joanne de Petra omni officiorum genere aliquot per dies afficitur. Browerus *lib. 21. num. 91.*





CAPUT XXIII.

De Sanctis, & magnis Dei Servis hospitio apud Confluentes exceptis.

Sanctus Castor & sanctimonia vitæ, & miraculorum gratiâ gloriosus Sacerdos, D. Maximini Episcopi Trevirensis discipulus, ac eremi prope Caradonam observantissimus aliquamdiu cultor, hanc sub annum 337. Dei monitu deferens, & ad Confluentes descendens, fidei semina, quæ D. Maternus sparserat, sacris prædicationibus rigat, sulcit, & ad accrementa perducit *Vid. cap. 2.*

SS. Magnericus & Gregorius, hic Turonensium, iste Trevirorum Antistites, dum causam Theodori Massiliensis Episcopi, sua ab Ecclesiâ per nefarios pulsî, defendendam ac expediendam suscipiunt, atque idcirco sub annum 585. Childebertum Austrasiæ Regem Confluentiæ residentem conveniunt, ac graviter pro ejecto perorant, plenè demum evincunt, quod & causæ justitia, & charitas eorundem poscebant, Annales Trevirenses his de Sanctis hoc insuper memorabile prædunt; quod, cum in una die-

rum, sumpto apud Regem prandio, scapham, animo trajiciendi Rhenum, cum aliis nonnullis intrâssent, hæc, etsi pressa, & aquis repleta, merisa tamen non fuerit tum ob sanctitatem utriusque Præfulis, tum ob merita & suffragia S. Martini Turonensis Episcopi, ceu cujus sacras reliquias penes se de more religioso gerebant. Browerus *lib. 6. num. 68. & seqq.*

S. Burchardus, à quo literatus orbis monumenta Decretorum cum aliis quibusdam eruditis operibus habet, apud Confluentes liberaliter institutus & educatus, ex Laubiensi dein Monacho creatus est Episcopus Wormatiensis. Browerus *lib. 9. num. 69*

S. Henricus, hujus nominis Imperator II. ut laboranti Trevirorum saluti succurreret, semel & iterum Confluentiam properans, hanc demum D. Petri Apostoli, sive Ecclesiæ Trevirensis juribus irrevocabili largitione addicit, prout diximus *cap. 3. 20. 21.*

S. Bernardus, Claravallensis Cœnobii nominatissimus Abbas, & Ecclesiæ Catholicæ mellifluus Doctor, ex Augusta Trevirorum ad Nostros devectus, ut in Confluentia parva Mosellam trajicere parat, supplicanti in littore claudum perbenigno non solum affatu, sed & expectatâ curatione solatur, nostris interim sibi gratulantibus sortem, quâ iis tam celebrem, tamque mirificum Dei servum hospitio excipere, verbâque facientem percipere licuit. Browerus *lib. 14. num. 62.*

B. Petrus à Confluentia, nobili loco ibidem

natus, deindéque Sodalitii Dominicani conspicuum decus, nostris potius domesticis ac civibus, quàm hospitis venit annumerandus, prout cap. 25. fusiùs dicitur.

S. Joannes Capistranus, Ordinis Seraphici fulgentissimum sydus, Anno 1451. per Fridericum Imperatorem III. ad Germanorum, Hungarorúmque salutem verbi divini præco ab Apostolica Sede petitus, Ejúsque authoritate in Hungariam ac Germaniam missus, & hanc & istam, eadémque missione Confluentiam quoque sanctis operibus, pœnitentium fletibus, ac odore tam bono, támque crebris implevit miraculis, ut Papa, his fructibus excitus, facultate illum munierit, omnibus, qui sacris ejus dictionibus pias aures præbuerint, Indulgentias Plenarias impertiendi. *Epitome Hist. Rer. Franciscan. pag. 195.*

Marcus ab Aviano, Instituti Capucinici exemplarissimus cultor, ad Leopoldi I. Imperatoris instantias Commissarius, & Missionarius terris Germanicis à Romano Pontifice datus, sicut in aliis Imperii civitatibus ac locis, ita & Confluentiæ ad annum 1680. vitæ sanctimoniâ, prædicationis gratiâ, & dono miraculorum enituit. *Epitome Hist. Rerum Franciscanarum pag. 443.*





CAPUT XXIV.

De Viris Illustribus apud Confluentes sepulturâ donatis.

Perspecto Confluentiæ nomine, quo ipsam congressuum publicorum frequentia, nec non eximiorum hospitem vel sanctitas vel majestas ornarunt, ad funerales demum urnas, sive ad conditos in ea Magnorum cineres considerationibus nostris delabimur; quibus tamen nec sacras Cœlicolarum Reliquias, ceu de quibus jam egimus alibi, nec quorumlibet illustrium, aut celebrium Virorum reconditos ibi cineres, veluti qui numerum superant, sed solas Sacrorum Antistitem, nec non Principum Electorum exuvias, quas Browerus in Annalibus Trevirensibus, & Ill. Honthemius in Historia Trevirensi Diplomatica produnt, breviter in apicum proferimus, probè scientes, etiam Magnorum tumbras civitatibus ac populis in gloriæ theatrum assurgere.

Primus itaque, qui Mausoleum suum ornamentis ac monumentis Confluentinis adjunxit, est Cuno Falckensteinius, pectoris maximi, nec minoris sapientiæ Princeps: hic post fortia præ-

fidia, post luculenta officia, post alia quoque insignia bona in Ecclesiam Moguntinam collata, primùm Trevirorum Antistiti, dein Coloniensi Coadjutor delectus, post istius obitum per quinque lustra ceu Præsul Trevericam, simulque Coloniensem Ecclesiam ceu Administrator, & Commendatarius annis nonnullis prudentissimè rexit: cùmque Episcopatum suum in omni tranquillitate repositum, ære alieno solutum, ætario divitem, se verò annis gravem, curisque fatigatum conspiceret, anno 1388. suâ sponte à Præfulatu recessit, ejusque onera in Wernerum à Kônigstein, Pronepotem suum, Capitulo consentiente, devolvens, secessit in arcem Welmichiam, ac in ea ad beatam se mortem disposens, hanc pauculos post menses oppetiit, subindèque Confluentiam vectus, nunc in Æde S. Castoris marmore, hos versus exprimente contegitur.

*Præsulis eximii jacet hic corpus venerandum
Cunonis, geniti per Falckenstein decorandum
Grande genus. Superis hunc pie junge Deus*

Wernerus Cunonis, ut diximus, Pronepos, ac proximus in Pontificatu Successor, dum cum cæteris Rheni Proceribus adversus Coloniam Agrippinam, in istos arrogantis hinc inde peccantem, arma exerit, & in campum procedit, gravi morbo sub ipsa expeditione correptus, in Castro Bûrenbergico ter decimo regiminis anno è vivis excedit, ac in Ecclesia D. Castoris è regione sepulchri, in quo Proavunculus ejus

quiescit tumulo sic signato potitur. *Hic requiescit Reverendus Dominus D. Wernerus de Königsstein Archi-Episcopus Trevirensis. Qui obiit Anno Domini MCCCCXVIII. quarta Mensis Octobris.*

Jacobus Badensis ad componenda litigia, quibus Colonia Agrippinae cives, contra Senatum, & hic contra istos pulsaverant ad Aulicum Imperii forum; ab Imperatore delectus, & amandatus Judex, sinistro ibidem accidente proster nitur, quo & ætatis suæ quadragesimo, Episcopatus autem anno nono confectus, in Ædem S. Florini ad tumulum infertur. In quo posteritas hoc Epitaphium legit.

*Virginis à partu dum Lustra trecenta duobus
Addita fluxissent, ageret sub Sydere Tauri
Et jam phœbus equos Cœli regione fugaces,
Subduxere Virum properantia fata Jacobum,
Illustrem Badensis humi, quem clara regentum
Stemmata nobilium dederant, nec non Trevirensis
Sacra Dioëcesis, totum vulgata per orbem.
Cujus in octonos dignus Pralatus in annos
Sceptra manu tenuit, & pacis amator & equi,
Hinc abiens quinto Majas subit astra Kalendas,
Conregnaturus, spero, sine fine Tonanti.*

*Richardus Archi-Episcopus integritatis ac virtutum defuncti memor, monumentum hoc
Posteritati posuit.*

Joannes Isenburgicus diutino morbo consumptus, è Castro Montaburino ad vitam meliorem decedit, indéque ad Confluentes devectus, in Basilica mox dicta hoc sub elogio anastasin universalem expectat. *Reverendissimo in Christo Patri, & Domino Joanni, ex generosa familia Dominorum ab Isenburg, & Grenzan, qui ad hujus Sancta Trevirensis Ecclesie gubernacula unanimi Capituli consensu adhibitus; cum Ecclesiam, remque publicam intra gravissimos Imperii motus insigni pietate, & animi constantia administrasset, multisque pro Christi gloria, & Ecclesie sua salute laboribus susceptis, & itineribus confectis, in Concilio Tridentino in adversam valetudinem incidisset, & paucis post annis patientissimè tolerato morbo, ex hac vita in aeternam requiem decessisset, Joannes Archi-Episcopus Successor ex nobili Stirpe Von der Lehen, pietatis & virtutis cultor, defuncto Principi posuit. Electus fuit in Archi-Episcopum Anno Domini MDXLVII. Mense Aprili die XX. obiit Anno MDLVII. Mense Februario, die XVII. in Arce Montaburensi, sua ætatis XLIX.*

Joannes à Petra brevissimo morbo, seu, ut creditum, medicinâ mortiferâ, per incuriam Medici propinatâ, sublatus, in eadem Æde his sub literis marmori mandatis, quiescit. *Reverendissimo & Illustrissimo Principi ac Domino, D. Joanni electo & confirmato in Archi-Episcopum Trevirenssem, S. Romani Imperii Electori &c. qui cum annis X. Menses X. Archi-Episcopatus prudenter præfuisset, Confluentia in pace quievit die*

X. Februarii Anno MDLXVIII. Successor honoris causâ posuit.

Joannes Schadland Ordinem S. Dominici in Conventu Confluentino Professor, Sacrarum Scripturarum Doctor, hæreticæ pravitatis Inquisitor: post Legationem pro Urbano VI. in re gravissima feliciter actam, ad Culmensem primum, dein ad Hildesiensem, exposit ad Wormatiensem, ac demum ad quartam, nimirum ad Augustanam Episcopalem Cathedram Pontificiâ vocatione promotus, hanc ultrò, & amore pacis ad annum 1370. dimisit, ac ad domum Professionis suæ religiosâ humilitate reversus, transacto in ea triennio, ad æterna decessit, sepultus ibidem sub epigraphe, quæ mox dicta munera, ab ipso benè gesta, recenset.

Bertramus ejusdem Instituti Professor, Ecclesiæ Thefelicensis Antistes, & Episcopi Metensis Suffraganeus, posthabito monumento, quod in Metensi Conventu ad sinistram partem Chori sibi splendide adornari curaverat, in Ecclesia Confluentini Conventûs, cujus filius erat, sepulturam præelectam obtinuit, mortuus anno 1387. die 21. Mensis Januarii; de quo Trithemius in lib. de Script. Eccles. hæc habet. *Vir divinis Scripturis eruditus, & inter Doctores sui temporis famosissimus, ingenio præstans, & clarus eloquio, declamator quoque Sermonum egregius.*

Joannes à Monte Episcopus Azotensis, Suffraganeus Trevirensis, & Administrator Ecclesiæ S. Wendelini, prout in Confluentino Prædicatorum Cœnobio religiosus se votis obstrin-

xerat, ita & in ejus Ecclesia tumulum, quem elegerat, est consecutus, piè mortuus anno 1442. die 17^{mâ} Mensis Decembris.

Henricus à Rivenaco, agri Confluentini vico, itidem Dominici Instituti Professor, postquam Archi-Episcopo Colonienſi summâ laude à Suffraganeatu fuiſſet, Confluentiæ in domo Professionis ſuæ defunctus, depositus ibidem fuit in medio Chori ſub lapide, hæc re-præſentante. *Hic jacet R. in Chriſto P. & D. D. Henricus de Rivenaco, Magiſter Theologia, Inquiſitor hæreticorum, Ord. Predicatorum, Episcopus Venicomponenſis, filius hujus Conventûs. Obiit anno Domini MCDXCIII. die XIV. Octob.*

Henricus Kalteyſen Archi-Epiſcopus Nydroſienſis & Cæſareenſis, anno MCCCCLXV. 2^{dâ} Octobris mortuus, in eadem PP. Dominicanorum æde ſub honorario monumento quieſcit; de quo in mox ſequenti capite ruruſus agendum.

Otto à Senheim Epiſcopus Azotenſis, duorum Archi-Epiſcoporum Trevirenſium Suffraganeus, nec non in Pontificalibus, & in Spiritualibus Vicarius Generalis, dum Archi-Dioëceſin inferiorem ſolitâ ſollicitâque viſitatione perluftrat, in Abbatia ad Lacum anno 1662. 11^{mâ} die Novembris defungitur, ac humanus ad Ædem mox dictam portatur.





CAPUT XXV.

De priscis ac laude dignis Confluentiæ Civibus.

REmotiora sæcula Virorum insignium non pauca sæpe merita in immeritam oblivionem traxisse, ex annalium monumentis vel minus accuratè congestis, vel omnino extra curam relictis, attentior posteritas cernit, ac luget; eaque sub infelici sorte Confluentiam quoque allapsam esse nostris temporibus, vel inde solum licet colligere, quod ejusdem præclari, perennique memoriam promeriti cives (: horum ad minus unum quovis sæculo ab ipsa fuisse vel Ecclesiæ vel Imperio datum, inficias vix quisquam ibit :) in fastis Trevericis nullo quasi loco, & elogio pene nullo colantur; eorundem quippe nonnisi duos Browerus in suis Annalibus, ac solos tres Historia Trevirensis Diplomatica memoratu & observatu dignos in medium proferunt: quorum quæ nomina, quæque merita fuerint: quique præter istos similiter commendari, chartæque mandari meruerint, ex nunc referendis constabit.

Agmen illorum ducunt Prænobiles ac generosissimi Milites, quibus gentile agnomen à *Confluentia*; quorumque antesignanus Cuno, Alberti de *Confluentia* filius, opulentiâ non minus, quàm religionis studio clarus, vitam communem apud Sancti Florini Clerum opibus suis attollere gestiens, luculentos sanè fundos Ecclesia S. Dei Genetricis Maria, & inclysi Confessoris Florini, in Villis Bubenheim, Wissa, Asca, Bunnela, cum agris & vinetis obtulisse non contentus, adjecit in minore *Confluentia* trans Mosellam tres vineas, & in majore *Confluentia*, quidquid possidebat in loco, cui Camnethes erat nomen; atque hanc donationem Egilbertus Archi-Episcopus in suo diplomate ab origine repetens, factam fuisse testatur sexto Idus Novembris anno Dominica Incarnationis MLXX. Ita Browerus in *Annal. Trevir. lib. 12. num. 17.*

Albertus à *Confluentia* acerrimi vindicis laudes, ut iidem Annales ad annum 1212. pag. 114. loquuntur apud omnes meritò posteros rarissimâ in Dominum fide est consecutus, dum nempe Comitis Nassovii gladio, quo is Theodoricum II. odio stimulante petebat, suum pectus objecit, ictûque lethali confossus, & Archi-Præsuli servavit vitam, & suo sic nomini adgenuit immortalitatem, utpote perpetuò dignus, qui inter fideles Principum Ministros, inter Patriæ Patres, inter magnanimos Orbis antiqui Viros cum primis deprædicetur.

B. Petrus à *Confluentia* è mox dictorum Militum perillustri prosapia genitus, circa sæculum

xv. sanctitate & eruditione refulsit: in primo namque adolescentiæ flore omnibus simul rebus ac spebus renuntians, sub Regula S. Dominici totum se uni Christo devovit: erat ei facies elegans, præstans ingenium, ardens sanctimoniarum studium, ingens ac tenera erga B. Virginem, & S. Ursulam religio; quarum etiam apparitione in ultima lucta solatus, innocentem subinde vitam in Conventu Basileensi, in quo & togam conversionis induerat, beatissimo fine in ætate florente conclusit. *Leander Albertus lib. 5. de Viris insignibus Ord. Præd. pag. 227. Ephemerides Dominicano-sacræ ad Cal. Octobris: Scriptores,* qui viculum, ad os Arulæ in Helvetia situm, ac Confluentia dictum (: vide dicta cap. primo. :) Patriam Beato Petro attribuunt, exinde hallucinari probantur; quod hic Dei Servus loco nobili & peramplo ex omnium sensu sit natus, testantibus autem gravissimis literis, quas anno 1752. ex vicinia hujus Pagi recepimus, modicus & ignobilis hic locus nullum unquam virum nobilem suos inter incolas vel cives retulisse, aut conspexisse sciatur; nec extent indicia, quæ vel tenuiter probent, illustri aliquando prosapiæ natalem ibi domum fuisse.

Cæterum quod de mox fata Militum Confluentinorum stirpe sub finem sæculi xv. quidam superfuerint surculi, liquet ex iis, quæ à Browero in Annalibus *lib. 19. num. 182.* narrantur; quod nempe inter sex nobiles & à morum integritate præclaras sanctimoniales Dominas, quæ sub annum 1495. è Boppardiensi Mariano, si-

múlque Benedictino Parthenone destinabantur Trevirim, ut in Horreensí ibidem Cœnobio disciplinam novam erigerent, atque sancirent, præfulserit una, cui nomen Walburgis à Confluentia: unde quid vetat, hos nostros Milites his elogiis accumulare! *Homines divites in virtute: qui de illis nati sunt, reliquerunt nomen narrandi laudes eorum; hæreditas sancta nepotes eorum, & in testamentis stetit semen eorum. Eccli. 44.*

In sæculo xv. virtutum, scientiarum, ac dignitatum splendoribus inter sydera Confluentina emicuit Henricus Kalteysen, Ordinis Prædicatorum Alumnus, Sacræ Theologiæ Professor, Sacri Apostolici Palatii Lector, duodecim eruditissimorum Voluminum Scriptor, hæreticæ pravitatis Inquisitor, Sanctæ Crucis Prædicator, & Archi-Episcopus Nydrosiensis ac Cæsareensis. *História Trevir. Diplom. to. 2. pag. 335. Ephemerides Dominicano-Sacræ ad Cal. Octob.*

Sub idem tempus Andreas Kettwig & Confluentiæ, in qua lucem primam aspexit, & familiæ Carmelitanae, cujus ornamentum erat, claritudinem dedit, utpote qui pro doctrinæ, prudentiæque suæ meritis in sacra Theologia ad Doctoratûs apicem, nec non in Universitate Colonienſi ad ejusdem Theologiæ Professuram & Decanatum evectus, interimque Lecturam sententiarum libris 414, nec non Sermones per totum annum tribus libris eruditè ac concinnè complexus, utrumque opus juris publici fecit; mortuus anno 1477.

In sæculo xvi. anno nimirum 1542. in Monasterio ad S. Mathiam extra Trevirim Abbatialem Infulam omnium applausus imposuit Henrico à Confluentia hujus nominis tertio, qui, quod huic Infulæ suâ deinceps religiositate, vigilantia, & maturitate honores splendorisque contulerit, liquet ex his, quæ in ejusdem Cœnobii tabulis sic annotata leguntur. *Fratrum animas summa cum industria, ac singulari discipline regularis observantiâ rexit. Monasterium fontibus auxit; & quia sub ejus regimine in bello Brandenburgico duodecim admodum grandes campanæ fuerant ablatae, Is quatuor alias earundem loco fecit fundi. Monasterium vastatum reparavit, aliâque quamplurima benè gessit, ac adificavit, quibus nomen suum cum honore ad notitiam posteritatis transmisit, mortuus anno 1566.*

Bellum Brandenburgicum, de quo hic facta est mentio, inedita Trevirorum gesta ad annum 1552. describunt, atque inter luctuosa plurima exprimunt & ista. *Monasterium S. Mathia omnibus bonis spoliatum est: è turribus duodecim campana dejecta & ablata, altaria diruta, & imagines sedibus suis propulsa; inde in fenestras Chori, Templi, Monasterii, scamna, sedilia, portas servitum; ferramenta, seras, claustra cives pretio militibus soluto emerunt. Vid. Historia Trevir. Diplom. to. 2. pag. 760.*

Guilielmus Princeps Auriacus & Comes Nassovius dum anno 1572. Ruræmundam, Geldriæ Civitatem, adoritur & capit, victor miles tum avaritiæ ductu, tum odio Catholicæ Fidei in Carthu-

Carthusiam ibidem irrumpens, in obvios quosque Monachos barbarâ immanitate desævit: quoddam ex his hominum monstris incidens in Servum Dei, cui nomen Severus, petulanter ac truculenter quærebat; cujas es tu? Utque is modestè reponit, Confluentinus sum, ejus capiti strictum mox ensen impingit, ruentem coram Marianis aris, ad quas confugerat, in culinam, sociis adjuvantibus, raptat, semivivum denudat, ac ferventibus aquis perfundit, prout iis patuit, qui postridie ttucidati corpus viderunt. *Arnoldus Havensius in Historica Relatione duodecim Martyrum Carthusianorum*; in qua & hæc cap. 5to. leguntur. *Accidit autem hic res stupenda dignaque relatu. Cùm iste D. Severus ferro caderetur ante altare, ut dictum est, B. Maria Virginis, sanguis ejus in altitudinem octodecim pedum emanavit & erupit, parietemque altari D. Virginis vicinum aspersit, non sine grandi miraculo; qui sanguis à pluribus Viris gravibus, & præsertim Episcopis, sæpe cum admiratione visus, etiamnum & in hodiernum usque diem in pariete apparet. Quibus non incongruè licet subnectere, quæ à D. Cypriano in Epist. 9. scribuntur. O beatam Ecclesiam (: Confluentiam :) nostram! erat ante in operibus fratrum candida; nunc facta est in Martyrum cruore purpurea, floribus ejus nec lilia, nec rosa desunt?*

Eodem sæculo in Societate JESU claruit Joannes Koch, patre pharmacopolâ genitus: de quo Historia Trevir. Diplom. to. 3. pag. 228. refert sequentia. *Joannes Magirus origine Confluentinus,*

opimâ hereditate relicta, Societatem ingressus, in ea partim docendo, partim Missionibus obcun- dis bonam operam navavit. In Cathedrali Spirensi 17 annis ecclesiasten cum approbatione egit, ubi die octavâ Septembris anno 1609. ætatis 51. ad Superos commigravit. Edidit brevem admonitionem ad Epistolarem Disceptionem Joannis Magiri Jesuitæ, & Davidis Paræi Calvinistæ Heidelbergensis Moguntia anno 1604. in 4to. unâ cum animadversione Joannis Mulhusini in Disputat. ejusdem Paræi. Plura de eodem Sotuellus in Biblioth. Scriptorum Soc. Jesu.

Sub medium sæculi xvii. floruerunt in Capucinatorum Ordine Elias Sacerdos, & Audomarus Conversus: iste Concionator magni nominis, atque in proponendis controversiis fidei tam disertus ac suavis, ut omnium, eorum autem præcipuè, qui erant è Camera Imperialis Senatu, aures applaudentes per plures annos possederit; exhaustus labore ad quietem transiit Spira 3. Februarii Anno 1674. Provincia Rhœnana Minorum Capucinatorum lib. 3. cap. 2. pag. 111.

Audomarus opulentis parentibus natus, in paupertate Seraphica divitias veriores invenit; festinus ad officia sacra, nec non in meditationis studio summè fervidus ac versatus, pinguem inde spiritum in multa suavitate fovebat. Otii publicus ac continuus osor, sibi que licet decrepito connivens in nullo, sedulo ministrabat infirmis, apportabat ligna, instruebat focum, purgabat legumina, reficiebat lacera, lavabat immunda, nullique non ultrò suam opem, prout poterat, pius senex dica-

bat: inter cetera, ipsomet fatente, indies precabatur Deum, ne diutino probaretur languore; cuius voti compos effectus, dum sub campanarum pulsu germanus ejus frater ad sepulchrum deferretur, apoplexiâ tangitur, atque sub fama religiositatis eximia moritur Confluentia 4. Novembris Anno 1671. Prov. Rhen. mox dicta lib. 3. cap. 9. pag. 139.

Agmen nostrorum, olim celebrium, nobisque compertorum civium honorificè clauditur ab evangelico, seraphicòque præcone; cuius Lucas Waddingus in libro de Scriptoribus Franciscani Ordinis mentionem hanc facit. *Victor Wintreus, Germanus Confluentinus, Regularis Observantia Provincia Colonia disertus Concionator, edidit librum concionum, qui dicitur; Afflictos Consolans, seu succincta methodus, quâ quilibet hoc erumoso tempore ex miseriis maximam haurire valeat consolationem. Colonia apud Joannem Heningium anno 1644.* Huic eâdem ex familia sociamus hic loci concivem, qui cæteroquin inter recentiores in paragrapho secundo proximè sequentis capituli referendus erat, ac in Historia Trevir. Diplom. 10. 3. pag. 233. hac sub laude notatur. *Hubertus Schneid, præclarissimus Concionator, eo in munere obiit Confluentia anno 1744. editis duobus voluminibus sermonum in Dominicis, & Festa.*





CAPUT XXVI.

De Recentioribus Confluentiæ
Civibus, quorum nomina literis
commendari merentur.

EX mox enarratis evidentissimè patet: non esse dubitandi locum, quin præter jam dictos alii quoque non pauci Confluentini cives, quorum gesta & merita fastis inferi, ac coram posteris deprædicari valerent, lapsis à temporibus spissa in caligine, sive in immerita fuerint oblivione sepulti; ex ea autem ut nonnihil capita eorundem levantur, atque posteris aliquatenus sub oculos cadant, à diebus nuperis, nostra scilicet ab ætate, id est, ab anno 1682. usque ad annum 1653. colligimus, & adducimus Viros, quos Confluentia genuit, virtus aluit, labor excoluit, Deus autem crescere, altiùsque assurgere fecit, hos, inquam, nominandos, commendandósque assumimus, quatenus ex iis prudens Lector concludat, quod Confluentia, sicut temporibus nostris, ita & per anteriora sæcula non sterilis, sed fecundissima parens audierit, quæ præclarissimos sæpe filios tum Ecclesiæ, tum & Imperio genuit, injuria autem vel incuria

temporum innominatos & illaudatos reliquit. Porro qui mox dictis à temporibus utrique huic Reipublicæ ornamentum & accrementum attulerint, in sequentibus conspiciendum exponimus.



§. PRIMUS

De Confluentinis Civibus;

Qui ætate nostra in ecclesiastico ac civili foro spectabilius eminuerunt.

Archi - Episcopus.

Philippus Carolus Comes ab Eltz in Kempe-
nich: qui anno 1732. v. Idus Junii concordibus Metropolitani Capituli votis ad Cathedram Moguntinam evehctus, in ea piè, providè, ac feliciter sedìt usque ad annum 1743. quo XII. Cal. April. ad vitam alteram optime comparatus decessit.

Episcopus.

Joannes Hugo à Gaertz: hic quis fuerit, Onabrugæ, ubi obiit, hoc ejus epitaphium loquitur. *Hic jacet, in quo, dum viveret, effigies S. Caroli Borromæi stetit; dixisses ipsissimum, nisi nomen scivisses; Joannes Hugo à Gaertz Episco-*

pus Dorytensis, Missionum Septentrionalium Vicarius Apostolicus, denatus anno MDCCXVI. die XXV. Decembris: Effigiem ipsam in se dum faciebat, dabat umbram humilitas, lucem puritas: Zelus, scientia, oratio, sui abnegatio grata erant, quia sancta, mixtura colorum: Solus argentus decerat, & habuisset, nisi pauperes fuissent, quibus & se, & sua dedit: hoc reliquit, quod hic jacet, cetera habet Cælum, tu Viator exemplum. R. I. P.

Metropolitanæ Moguntinæ Præpositi.

Hugo Wolffgangus L. B. à Kesselstatt.

Carolus Emericus Franciscus L. B. à Bürresheim

Hugo Franciscus Carolus Comes ab Eltz in
Kempenich.

Metropolitanæ Trevirensis Præpositi.

Joannes Fridericus L. B. ab Eltz in Kempenich.

Carolus Casparus L. B. à Kesselstatt.

Philippus Carolus Comes ab Eltz in Kempenich.

Josephus Franciscus L. B. à Kesselstatt.

Metropolitanæ Moguntinæ Decani.

Hugo Wolffgangus L. B. à Kesselstatt.

Carolus Emericus Franciscus L. B. à Bürresheim

Metropolitanæ Trevirensis Decani.

Joannes Wilhelmus L. B. ab Eltz in Eltz.
 Carolus Josephus L. B. à Schmirrburg.

Cathedralium & Equestrium Ecclesiarum Prælati.

Lotharius Adolphus L. B. à Kesselstatt. Præpositus Spirensis.

Hugo Franciscus Carolus Comes ab Eltz in Kempenich. Præpositus Mindensis.

Josephus Franciscus L. B. à Kesselstatt. Decanus Bleidenstadiensis.

Lotharius Franciscus L. B. à Bürresheim. Decanus Odenheimensis.

Vicarii in Spiritualibus Generales.

Hugo Franciscus Carolus Comes ab Eltz in Kempenich. Moguntia.

Damianus Henricus Comes ab Eltz in Kempenich. Treviris.

Franciscus Ludovicus Carolus L. B. de Boos à Waldeck. Treviris; & in Metropolitana ibidem Cantor.

Præsides Summi Magistratûs
Moguntia.

Philippus Carolus Comes ab Eltz in Kempenich. Per quatuor circiter lustra.

Josephus Franciscus L. B. à Kesselstatt. Annis undeviginti.

Emericus Josephus L. B. à Bürresheim. Ab anno 1751. usque in præsens.

Cancellarii.

Carolus Ernestus L. B. à Bürresheim Proto-Cancellarius Serenissimi Cardinalis à Bavaria, & moderni Episcopi Leodiensis : Metropolitanæ Trevirensis Custos, & Cathedralis Leodiensis Archi-Diaconus.

Joannes Petrus à Trarbach, de quo Illustris. Honthemius in Historia Trevir. Diplom. refert sequentia. Vir erat eâ Jurisprudentiæ (sed nec minore integritatis :) laude clarus, ut gravior Juris Consultus ad universum Rheni tractum eo ævo non fuisse putaretur. Anno 1724. 30. Aprilis vitâ functus, in Basilica B. M. V. Confluentiæ juxta Altare Agoniæ Domini depositus est sub hac Epigraphe. *Qui transis, sta, & lege. Transiit bene dicendo, qui hic quiescit, Joannes Petrus à Trarbach, Confluentia natus anno 1651. nil puerile gessit, inter confluentes artes & virtutes adolevit; Jurisprudentia vacavit, ut sciret suum cuique tribuere; ad magna aspirans, Spira Cancellaria Director factus; trium deinceps Electorum Trevirensium Consiliarius intimus fuit; demum partes Cancellarii annis novem egit, inter partes semper medius, quas vel amicitia composuit, vel equitate diremit. Toties stetit pro justitia, quoties pro tribunali sedit. Fuit ingenio fecundissimus; lin-*

quâ & calamo facundissimus; animi magnitudine, judicio, consilio, longo rerum usu, vita integritate, in proximum charitate; in Deum religione, ne quid ulli deberet, constanter omnibus satisfecit. Debitam Creatori animam lubenter reddidit anno vita LXXIII.

Joannes Arnoldus de Solemacher à Namedy, primùm Electori Colonienſi à Conſiliis Aulicis, dein Trevirenſi ab intimis Conſiliis Starſis, plenus dierum, obiit anno 1735.

Joannes Mathias Nobilis à Coll, magni Socer, nimirum Joannis Arnoldi mox dicti digniſſimus gener, & immediatus ſucceſſor, podagrâ conſumptus deceſſit anno 1752.

Officiales in Curia Confluentina.

Valentinus Scheiden, Canonicus S. Florini, & ad D. Virginem Paſtor. Obiit anno 1692.

Joannes Finger, Decanus ad S. Florinum, deſunctus anno 1711.

Joannes Hugo à Gaertz, poſt Magiſtratum annis paucis hac in Curia geſtum, adeptus eſt altiorem gradum, ut diximus ſupra.

Joannes Henricus Jacobi ab Ehrencron, antè aditam hanc dignitatem Conſiliarius Electoralis Aulicus, & Regiminis Secretarius, deceſſit anno 1716.

Rectores Universitatum.

Hugo Emericus L. B. ab Eltz Treviris; Metropolitanæ ibidem Archi-Diaconus tit. Sancti Mauricii in Tholeja.

Carolus Casparus L. B. à Kesselstatt; Metropolitanæ ibidem Præpositus, ac Urbis Pro-Princeps.

Damianus Henricus Comes ab Eltz in Kempenich, Treviris; ac in Metropolitana ibidem Archi-Diaconus tit. S. Castoris in Cardona.

Martinus Nickenich, Moguntiaë semel iterumque vid. §. seq.

Modestus Manheim, Treviris ultra bis decem annos continuos. Vid. §. seq.

Lotharius Franciscus L. B. à Schmittburg, Ecclesiarum Metropolitanæ Trevirensis Archi-Diaconus tit. S. Mauritii in Tholeja, & Cathedralis Leodiensis Canonicus Capitularis, anno 1753. quo hæc typis dabantur, Rectoratum Trevericum nemine non applaudente adibat: quem Superi seris posteris in ubere benedictione conservent; interea verò Lector benevolus notet, quod Confluentia ab anno 1681. numeret annos viginti & octo, quibus suos per cives Augustæ suæ literatam Rempublicam rexit: Undè non immeritò novæ sibi gloriæ ducit, quod Lotharius Franciscus, perillustris Civis suus, auspice Deo, & postulantibus ipsius meritis, continuet hunc clavum tenere.

Confluentina hæc decora prout plenitudine numeri, ita & claritudine sanguinis, optimèque gestorum splendoribus illustravêre plurimum, & etiamnum ornant Illustrissimi S. R. I. Comites de Petra: inter quos tamen Carolus Casparus: (: Hic è gente Petrina primus exitit, qui Subsellia Comitum virtute postulante conscendit:)

quasi Stella matutina in medio nebula, & quasi Luna plena in diebus suis refulsit, utpote semper visus, semperque dictus nostri Principis coram exteris & indigenis honor, Patriæ pater, Confluentiæ tutor, Pauperum altor, Orphanotrophii nostri præcipuus ac munificus author, bonorûmque omnium ut amator, ita & defensor ac antesignanus: ætate gravis, & meritis opulentus decessit anno 1740.

Petrinis syderibus non minorem in eodem Polo consociant lucem Illustrissimi S. R. I. Comites de Metternich, de Bassenheim, de Eltz in Kempenich: Liberi Barones de Eltz in Eltz, de Kesselstatt, de Schmittburg, de Bûrresheim, de Boos, de Wildberg, aliique plures, ceteri quibus applaudit Trevericus, & huic contiguus Teutonicus Orbis, quod multum ac sæpe ad primas eos Orchestras non tam Principum favor & gratia, quam congenita præstantissima virtus, & merita præclara levârint; unde & ex summitate graduum, quos in Aulis Principum non tam tenuisse, quam exornasse sciuntur, prudens Lector evidenter perspiciet gloriam, quæ exin & in illorum prosapias, & in civitatem patriam continuâ claritate dimanat.





§. SECUNDUS

De Recentioribus Confluentiæ
Civibus

*Qui in Regularium Sodalitiis lucidius
emicuerunt.*

In Ordine S. Benedicti.

MOdestus Manheim ad S. Mathiam extra Trevirim Abbas : annis sex supra viginti, quibus præest, Ætarium monasticum sub hospitalitate insigni insigniter locupletavit. Dominia sua ædificiis plurimis, iisque magnificis & accom-
modis auxit. Pomarium & hortos salientibus aquis ad abundantiam & artem instruxit. Ampliatis inferioribus Ecclesiæ suæ fenestris, pleniorẽ ei lucem, aliàs desideratam, adduxit. Eiusdem Ecclesiæ navim & chorum lapide marmoreo stravit. Scamnum, ad quod fideles Eucharistico pane cibantur, pariter ex marmore, & affabre elaborari curavit. Stalla choralia ex pyro eleganter sculpi; Aram principem ex argento cudi; illam quoque S. Mathiæ splendore nobili, ætæque non parco assurgere fecit. Reliquiis S. Modesti, sui ex nomine Patroni, & Trevirorum Episcopi, argenteam non modò statuat,

superantem triginta marcarum pondus, sed & duo argentea brachia: duo quoque similia brachia Reliquiis SS. Eucharii & Valerii Trevirensium Episcoporum dicavit. Calice aureo, pretiosis affatim illustrato lapidibus; grandiore lampade, sex candelabris magnis, cruce his proportionatâ, omnibus ex argento cufis; nec non paramentis sacris, pretio numerôque conspiciuis, sacrarium arâque ditavit, plurâque alia molitus est, & ad hunc usque diem molitur pro gloria Dei; ita ut absque palpo liceat de eo scribere, quod decorem domûs Dei verè diligit, ardentem zelet, operique studiosissimè mandet. Porro si hæc conferantur cum illis, quæ capite præcedente relata sunt de Henrico à Confluentia, similiter ad S. Mathiam Abbate, quid prohibet demum dicere; uterque *in vita sua suffulsi domum, & in diebus suis corroboravit templum; & in utriusque diebus putei aquarum emanaverunt. Eccli. 50.*

Martinus Nickenich, Abbas in Monte Specioso S. Jacobi propè Moguntiam, sacrae Theologiæ Doctor, ac Universitatis Mogonæ vice altera Rector.

Amandus Schell Abbas in eodem Monte, Sacrae Theologiæ Doctor, & mox dicti Martini ex Sorore Nepos.

In Ordine Cisterciensi.

Stephanus Jung Abbas Salemitanus, vulgò in Salmansweiler, simulque Status Imperii. Imperiale hoc & exemptum Monasterium in Suevia,

non procul Uberlingâ, est situm, unde per epistolam, anno 1752. 12. Julii datam, relata fuere sequentia. *Stephanus I. Confluentia natus, ac dictus Christianus Jung, ob eximia natura & gratia dona ad apicem Abbatialem promotus, eo fructu per plures annos præsuit Monasterio huic celeberrimo, ut ejus dignissima persona quasi fundatoris in recenti apud omnes vigeat memoria. Edificium Monasterii, sub Antecessore suo igne consumpti, jam inchoatum perfecit tanto decore & splendore, ut tum quoad amplitudinem, tam etiam quoad magnificentiam equiparari possit regia structura, omnia Imperialia Monasteria longè superans divitiis ac majestate. Erat eximius cultor B. Mariae Virginis, cujus patrocinio sortem suam tam prosperè gestam adscripsit, ante annos incirca triginta in fama Sanctuatis defunctus.*

Ferdinandus Pefgen, primùm Prior, dein Abbas Clauſtri Himmenrodensis; sinistrâ valetudine, aliisque adversis accidentibus fractus, eâ in dignitate fete per biennium stetit.

Leopoldus Camp, immediatus Ferdinandi successor, & antea Sacro-Sanctæ Theologiæ Lector, prudenter & exemplatiter præsuit annis undeviginti. Magnificam Clauſtri Ecclesiam à fundamentis erexit, novisque campanis instruxit. Obiit anno ætatis 52. humanæ salutis 1750.

Bernardus Colonia Abbas, his adhuc diebus Cœnobio Mariæstadiano præest, ac p̄dest.

In Ordine Præmonſtratenſi.

Ludovicus à Coll Abbas in Rommersdorff:

annis XV. vigilanter ac discretè gubernacula
senuit, piè mortuus anno 1746.

In Ordine S. Augustini.

Joannes Schunck, in Clusa Ewerhardina
Prior: cujus discretissimus zelus observantiam
regularem, prudentia verò œconomica reditus
annuos insigniter amplificaverunt; unde, licet
is pridem obierit, nomen tamen ejus in Ordinis
ac sæculi memoria adhuc commendabiliter vivit.

In Ordine Carthusianorum.

Nicolaus Pauli, Carthusiarum Ruremundæ,
Treviris, ac Rotilæ Prior: duobus abhinc annis
bono fine decessit.

In Societate Jesu.

Ludovicus Doëtsch, Sacro-Sanctæ Theologiæ
Doctor, ejusdemque in Universitate Colonienſi
ordinarius Professor, Theologiæ ibidem facul-
tatis Decanus, insigniorum aliàs Collegiorum,
nunc verò Treviris in Seminario Nobilium di-
gnissimus Rector, nupérque Provinciæ ad Tra-
ctum inferioris Rheni Præpositus Provincialis.

Hermannus Mannheim, prælaudati Abbatis ad
S. Mathiam germanus frater, Sacro-Sanctæ Theo-
logiæ Doctor, ejusdemque apud Treviros Pro-
fessor publicus: subinde domûs, quam primæ
probationis appellant, in annum tertium vigi-
lantissimus ac religiosissimus Rector; anno æta-

tis 43tio. humanæ verò Salutis 1743. lentâ tabe depaſtus, ſuos adhuc inter Socios his in elogiis vivit.

In Theologica cathedra cùm annos fere ſex verſatus cum commendatione fuiſſet, Præſidibus viſum eſt tandem, moderandis eum, inſtituendiſque tyronibus noſtris præſicere: quam ad rem eam continuò dexteritatem attulit, ut factus quodammodo ad hujus adminiſtrationem muneris fictuſque videretur.... Verùm oſtenſus nobis, non datus videri potuit; tabes enim, quæ tacitè graſſari viſa eſt per viſcera, muneris tam laborioſi aucta & paſta moleſtiis, apertiori jam Marte aggredi, & labefactare ejus vires cœpit. Ille autem toto, quo cum morbo tam lento & gravi conſtictatus eſt tempore, ejuſmodi fuit, ut, quò plus quotidie corpus frangeretur, hoc magis animi fortitudo & patientia invaleſceret. Non cogere ipſa cum aegritudo potuit, ut quietem & negotiorum ſuorum vacationem admitteret. Vix adduci ſupremis vitæ menſibus potuit, ut, cum ex pulmonum vitio & gutturis raudine vocem agrè moliretur, adjutorem ſibi pateretur adjungi, qui verba ad Novitios ſtatis diebus faceret. Cætera verò munia ita obire conſtanter perrexerit, ut non prius fere, quàm animam ageret, res ſuas deſerit: eâ ipſâ enim die, quæ ei ſuprema fuit (: fuit autem 28va Auguſti :) eſſi fractas admodum vires eſſe perſentiſceret, tamen rem divinam de more ſuis præſentibus fecit, cœleſtique ſe ipſum epulo ad ſuſcipiendum æternitatis iter roboravit: quod à longo jam tempore factitabat quotidie, ſingulos ſibi dies fatales futuros ſuſpicans.

Cætera

*Cetera per diem negotia administravit ut alias, communis cum ceteris mensa accubuit; à meridie Novitiis omnibus peccata expiantibus aurem prae-
buit. Dum ingravescente demum debilitate virium
respirandique difficultate victus ad valetudinarium
circa horam 6tam vespertinam concessit; ubi cum
gravioribus obrueretur deliquis, gressumque mors
ingentibus accelerare passibus videretur, sacro Oleo
perunctus est, nec multò post placidè ac pie ad
horam unam extinctus. Viri gravis, prudentis,
religiosi, ac virtuti per omnia similis existimationem
reliquit in omnium animis; qui ad rectè agendum
non verbo magis alios, quàm exemplo accenderet,
nec legum reverentiam ab aliis rigidius, quàm à
semetipso deposceret, quanquam vita composita
minùs amantibus quibusdam displiceret censoria
Viri severitas. Lit ann. domùs imæ probat. S. 7.*

Christianus Sturm, Sacro-sanctæ Theologiæ
Doctör, ejusdémque apud Ubios Professor pu-
blicus & ordinarius; vir pius ac rectus, præ-
stantis quoque ingenii, & abundantis doctrinæ,
paucis abhinc annis Coloniae ad vitam melio-
rem pervenit.

R. P. Franciscus Ortman, Sacro-Sanctæ
Theologiæ Doctör, Sacræque Scripturæ in Uni-
versitate Trevericâ Ordinarius Professor, qui à
parvulo usque ad ingressum in Societatem Jesu
bonis moribus ac disciplinis inter Confluentinos
accrevit, omnique propterea jure nostros inter
cives loco celebri reponi meretur, amicè nos
monuit; in Provincia Superioris Rheni duos
quoque Confluos, videlicet P. Randerath, &

P. Schleicher, plurium Collegiorum Rectores, pietate, scientiâ, & prudentiâ singulariter enituisse.

In Ordine Prædicatorum.

Joannes Cordier, Sacræ Theologiæ Magister, & in Provincia Teutoniæ Prior Provincialis.

In Ordine Carmelitarum, Discalceatorum.

Cyrillus Knopp Provinciæ Rhenanæ Prior Provincialis.

In Ordine Minorum Capucinatorum.

Michael Stammel Provinciæ Rhenanæ quartâ vice Minister Provincialis. Rhenanam Minorum Capucinatorum Provinciam à foundationis suæ primordiis usque ad annum 1750. in quinque libris, primùm Mogonis, demùm Heidelbergensibus typis vulgavit: edidit quoque Epitomen Historicam, in qua ab anno 1208. usque ad annum 1525. res Franciscanæ generatim; dein verò solæ Minorum Capucinatorum usque ad annum 1747. in Chronologica serie repræsentantur. Heidelbergæ anno 1750.

Conradus Stock, Pancratius in Ordine dictus, priusquam nomen militia Seraphica daret, virorem tam in Patria, quàm apud exteros egit; ad tutioris subindè vitæ genus aspirans, ejusque tyro-

*sinium Treviris inter nostros exorsus, vir deinceps non tacenda religiositatis evasit. Primò namque disciplinam monasticam studiis zelosissimis prosequi, ad Officia sacra cum primis semper accurrere, cellam rerumque usum ad normam strictissima paupertatis componere, promptè ac simpliciter Superiorum jussa capessere, in deliciis, in propositis, ac in jugibus exercitiis habuit. Sub oratione mentali fuis persape lachrymis animi exuberantiam prode-
re, hyemali quandoque tempore, ad morem Divi Alcantarini, medius inter apertas cella januam & fenestram aërem inclementem excipere, sub flagellationibus solitis valentiori semper manucarnem affligere, à contubernalibus persape notatus, indèque vir pius & exemplaris à nemine non habitus fuit. Ad Missiones curamque pastorem vocatus, erudiendis pueris operam singularem locavit, decorumque domus Dei, & vitam observantiam zelans, odia malevolorum incurrit; quin & in odium fidei ab heterodoxis militibus tentus, die integro captivitatem sustinuit. Sacramenti Pœnitentia sedulus, gnarus, ac impertusus minister, fideles plurimos per multa etiam milliaria ad forum suum accurrentes attraxit, docuit, sanavit, dicentes, eum esse virum sanctum, qui ipsorum jam peccata præsiceret: ob quod sicut multas centenae sacrilegas confessiones detexit, ita pro mercede laboris crebra quorundam murmura, & judicia sinistra, Deo permittente, recepit. Triginta tres annos, quibus Dei Filius inter homines vixit, quotidianâ, eaque singulari veneratione recolere, & ad idem pœnitentes suos inducere solitus, multis id*

precandi genus notum, ac familiare effecit. Duodecim annis circuminseffus à demone (: ut suo aliquando visitanti Ministro confidit:) ortas inde tentationes, ariditates, pergravèſque angustias usque ad redemptionis suæ diem tacenter ac viriliter tulit. Jubilarius Ordinis ad pagos, rudémque plebem, quotiescunque Superiori placuit, ob prædicationis verbum tam frequenter, quàm obedienter excurrit; donec tandem virtutis, viæque stadium Anno 1733. 5. Maji Treviris pio fine complevit. Ita Provincia Rhenana Fratrum Minorum Capucinorum lib. 3. cap. 1. pag. 95. & 96.

Alexander Lauvenberg, sub nomine Petri Damasceni, similis factus homini edificanti domum, qui fodit in altum, & posuit fundamentum supra petram; bis tribus annis, quos in fabrica ædificii spiritualis insumpsit, unicis suis curis præfixit, mori sibi, vivere Christo, & charismata meliora sectari: multo siquidem tempore abstinens ab usu vini, in hyeme perrarus ad focum, & stragulâ attritâ contentus, insipidos quoque cibos, liberiorum sibilos, vilia domûs servitia, aliâque molesta & aspera explicatissimâ fronte excipiens, qualibet carni, natureve placencia, cen incitamenta libidinis, angue pejus fugere, ac declinare studebat, inde faciliter creditus, & à suo Confessario dictus, innocentiam è sæculo latam, immaculatam in religione servasse. Pedibus ejus continuas fere rimas agentibus, adeoque monentibus fratribus; ut eos vel unguento vel solitâ lotione reficeret, subridens ajebat; an, & quoties antiquos eremi Patres suos pedes unxisse, vel la-

visse putatis ? sua in cella, ceu officina paupertatis Seraphica, nil præter Crucifixi imaginem, ac necessarios libros ferebat. Venerabilis Sacramenti devotissimus cultor, finitis Conventualibus Sacris, cuius Sacerdoti, spretâ quâlibet inclementiâ frigoris, promptissime ministrabat ad aram; paucis singula, in bono cor ejus erat in diebus juventutis sua. Talentum, quo cum largitas divinâ dotârat, certabat cum primis : id verò in suo nihilo tam scitè librare didicerat, ut, dum super eo viri præcipui applausum non infrequenter edebant, ipse erubescere, fugere, tristarique consueverit. Francisco I. & Mariae Theresiæ Augustis, Heidelbergæ præsentibus : Carolo Theodoro dein, & Augustæ Elisabethæ Palatinis Electoribus, homagium ibidem sumentibus, emblemata cum lemmatibus & versibus chronographicis dedicans, eâque in extrema Conventûs parte oculis eruditis exponens, nullius non calculo nemini secundus audivit ; quam ejus felicem poësin coronabant novissimi, ejusque infirmâ manu ad chartam redacti Rhytmi, quibus hic cygnus moriens Deo gratias pro doloribus cecinit, ac ardentissimè cupiit dissolvi, & esse cum Christo, qui & ejus spiritum à vinculis corporis in Conveniū Heidelbergensi, in quo Theologia auditor erat, absolvit die 20. Mensis Octobris Anno 1746. Provinc. Rhen. lib. 3. cap. 1. pag. 98.

Godefridus Gratz, Hierotheus in Ordine dictus, atque in eo studiis philosophicis vacare jussus, erat simplicitatis ac observantia tyrocinalis tenacissimus cultor, assiduus adorator Venerabilis Sacramenti, oris ac linguæ attentissimus cu-

stos, suis Superioribus in omni simplicitate, ac ad nutum obediens. Octavo ante obitum suum die eundem suo Lectori prædixit, Medico Calvinicolâ ad præsagii eventum stupente. Paucis ante obitum horis instantius cœpit rogare, ac iterum, iterumque multiplicare rogatus, ut vel ipse tolleretur à lectica, vel inde amoveretur pecunia: circumstantes phantasiâ ejus ex morbo turbatam censentes, ipsumque nullis non modis solantes, tandem post sepulturam ejus, dum excutitur & evacuatur lectica, sub sacco stramineo reperiunt bazium, & argenteam fibilam, quæ quidam amicus sacularis, dum nuper in eadem cella dormierat, se perdidisse asseruit. Mundum hoc lilium mors in festo Sancti Aloysii Heidelbergæ demessuit anno 1747. Provinc. Rhen. lib. 3. cap. 8. pag. 136.

Hi sunt Regularium Institutorum cultores, nostrique pariter commendabiles Cives, quorum nomina & merita vel investigatio nostra detexit, vel acquisita scientia tenuit, vel amicorum cura suggessit: Interim verò prout pauca nobis Regularium diptycha inspicere, ac consulere licuit, sic aliorum quoque Civium nostrorum elogia multifariam in iis exprimi, pro comperto prudens Lector tenebit.





CAPUT XXVII.

De inauspicatis Confluentiæ
Casibus.

EX iis, quæ Browerus in Annalibus lib. 9. num. 3. dicit, quod nempe *Godefridus Rex Nortmannorum secundâ incursione in Ripuariorum sese fines infundens* (: Ripuariis accenseri nostros cap. 1mo retulimus:) *atque uni prädationi ac vastationi agrorum, urbiumque deditus, cuncta flammis & occisione pervastavit.* Ex his, inquam, faciliter inferre liceret, quasi prima Confluentibus adversantia fata referenda forent ad annum 882. sive ad Nortmannica tempora: verum quod hæc Paganorum, ex Dania transfretantium tetra colluvies Confluentiæ nil stragis intulerit, sat apertè liquet ex iis, quæ Illustriss. Honthemius in *Historia Trevir. Diplom. to. 1. pag. 220.* dicit. *Nortmanni mense Februario anni 882. Mosam transeunt, & in Ripuariorum pagum penetrant, cuncta vastando Bonnam perveniunt, atque inde Villam Lendesdorff occupant; unde, adveniente Francorum exercitu, noctu discedunt, & sylvas perrepentes Prumiam attingunt... omnia diripiunt... ac cum ingenti præda, ad*

classēm suam redeunt, illâque ad transmarinas regiones vela faciunt.

Non itaque Godefridum Nortmannum, benè verò temporibus posteris Henricum Luxemburgicum Comitem, qui ex post sub sexti nomine Imperii gubernacula tenuit, primum hostem Confluentia sensit: cùm enim ad annum 1185. Rudolphus Summæ Ædis Præpositus, & Folmarus Archi-Diaconus post obitum Arnoldi I. Archi-Episcopale Pedum manibus contentiosis prehenderent, idque Clerus Confluentinus Folmaro, Henricus autem Rudolpho faveret, is sicut pluries alibi contra jus & æquum audentior ac licentiosior ierat, ità & hîc contra Clerum assurgens, cùmque divexans, reliquum simul civem in odia mutua, in turbas, & in contentiones pertraxit. Browerus in *Annal. Trevir. lib. 14. num. 178.*

Sicut autem hic concordia civica, ita Valeramus, Henrici conterraneus ac propinquus, Anno 1199. Confluentium ædibus nocentissimas faces admovit, fœdôque eas incendio idcirco vastavit; quia cum civitatibus finitimis non Philippum Luxemburgicum, Henrici VI. nuper mortui fratrem, sed Ottonem IV. ceu legitimum Imperatorem colebant. Quo ex utroque casu utique posteritas discet, tempore Schismatis eos sibi cautè consulere, qui, cujus sint, quoad possunt, occultant. Browerus *lib. 15. num 37.*

Tragœdia tertia his modis sua sumit initia. Henricus Vinstingius, decimus quintus Confluentium Princeps, contra avita eorundem pri-

vilegia imperiosius hinc inde disponens, sicque fomitem iracundiis, ac querimoniis ponens, anno tandem 1281. juxta Mosellæ ripam incipit erigere Castrum, quatenus eo munitus suis cives imperiis liberiùs subdere, cogere, domaréque valeret: ad quæ ut hi in turbas sensim coire, fœdera vicinorum accerlere, Henrico se palam opponere, minis eum impetere, ac opus novum execrari non timent, Henricus in iras abiens, ac vindictam æstuosius spirans, militem extemplò conscribit, colligit, adducit, Confluentiam obsidet, & angustiis ex omni parte constringit; dùmque hæc hac vi conclusa & pavidâ, ac jamjam superanda conspicitur, Nobiles, qui duces rebellium fuerant, celeri fugâ sua capita salvant, miserumque civem consiliû inopem, & angoribus implicatum relinquunt, prout fusius dictum est supra cap. 6.

Similis pene scena pandebatur sub Dietero Nassovio; ut enim nostri continuis exhauriri tributis, aliisque oneribus ab eo prægravari se lugent, impatientiâ demum victi, anno 1304. in motus apertiores prorumpunt, obedire detrectant, seque, prout poterant, contra vim inferendam obarmant: quos Dietetus, prout olim Vinstingius, copiis fortioribus cingit, & in arcto positos sese dedere ac obtemperare compellit. *Vid. cap. 6.*

At nunc & fides, nec non in Principem laude digna pietas tragœdiam Confluentibus parant. Balduinus, præstantissimus eorundem Præsul, ut Reinhardum Westerburgicum Co-

mitem, Vasallum suum, arce Grenzavicâ, causis exigentibus, privat; is spretis Balduini iuribus, & admissis quorundam suppetiis, eam denovo ad annum 1347. stratagemate suam facere, copiis instruere, & munitionibus sepire præsumit: Et en Confluentiæ suum ergà Principem animosissimam fidem! Vix námque rumor ausum hunc ultra Rhenum detulerat, nostri mox concorditer ad arma concurrunt, accensisque animis viriliter, at non æque feliciter contra hostem egrediuntur: dum námque ex itinere fessi arma nonnihil ponunt, ut levamen & respirationem admittunt, ut manipulis dispersis incedunt, incidunt in Reinhardinas insidias, à quibus pars capitur, pars potior ac nobilior cæditur, pars arreptâ fugâ sua capita salvat. Stragem hanc, 111. Non. Aprilis factam, Civitas cum Principe vehementissimè doluit, isque numeratis illi sex mille florenis, damnum, quoad licuit, refarcire contendit: Confluentia verò solemnibus se voris obstrinxit, feriâ sextâ post Pascha ad septem Ecclesias pompâ sacrâ quotannis progrediendi, tum ut ad posteros hujus cædis traduceretur memoria, tum ut interemptorum animæ in purgantibus flammis sua inde reportarent solatia. *Historia Trevir. Diplom. 10. 2. pag. 173. Annal. Trevir. lib. 17. num. 133.*

Ad annum 1483. Confluentiam novi motus concutiunt, dum nempe quidam de vulgo quassdam ædes ac structuras ad Basilicam Florinensem spectantes tumultuariè adoriuntur: dum alii ex fossis ac mœnibus civitatis veteris grava-

mina imprudenter eliciunt : dum denique alii aliis etiam modis exorbitare ac recalcitrare præsumunt: ob quæ ut offensam sui Principis, qui Joannes Badensis erat, graviter incurrisse se dolent, veniam ab eo flexis genibus exorare jubentur, prout dictum est supra cap. 9.

Anno 1560. suggerebat non solus Satan, sed & quidam suis commodis ac honoribus immodicè velificantes cives insusurrabant multitudini plebis, Confluentiam esse civitatem liberam, à vectigalibus pendendis immunem, populúmque in errore crasso versari, quod in hanc usque diem Episcopi dominatum pertulerit : is itaque arrogantior inde ac protervior factus, Joannis à Petra, qui tunc Principatum gerebat, imperia non solum cœpit exuere, sed & dum in civitatem ingredi pro more parabat, portas ei occludere, quin & quoslibet Leyanos à jure lignandi repellere, convitiis petere, aliisque modis affligere ac despiciere, impotenter ac impudenter est ausus : contra quos Præsul optimus, ne segniore morâ fomitem seditioni præberet, ut ad annum posterum, anno nimirum 1561. (: ita referunt inedita Trevirorum gesta :) Militem colligit, & adducit, ipsosque obsidione cingit ac premit, ad laniora quoque brevi reducit : *Dúmque plenus mœroris ac luctûs supplex ad genua ipsius se provolvisset Senatus, magnâque cum misericordia & dolore peteret, ut, si injuriam omnem pro delicti magnitudine condonare non posset, plus saltem loci apud se clementiam, quàm civium errorem habere sineret ; graviter increpitos, & ve-*

nia spe erectos demum à se demisisse satis habuit. In ceteros verò concitata multitudinis auctores nihil gravius statuit, quàm ut alios multâ coereret, alios exulatum ire cogeret. Annal. Trevir. lib. 21. num. 133. Videantur quoque dicta cap. 6. quibus adde, quod obsidionem, quam ibidem Trevirorum gesta dicunt assumptam, Browerus in Annalibus nonnisi intentatam affirmet.

Eorundem Annalium continuator Masenius *lib. 24. num. 113. refert, quod ad annum 1632. Galli & Sueci fuerint Confluentiæ sub conditionibus quibusdam admissi ac introducti; at verò quod obsidio prævia ad id Magistratum coëgerit, non ibi, sed indicat alibi, nimirum in Epitome Annal. Trevir. pag. 759. 760. ubi dicit. Elector Gallos, Suecico comitatu munitos, in arcem quintâ Junii die, magno Caesaris, totiusque Imperii dolore admisit: unde Confluentia dein expugnata, tam Suecum quàm Gallum recipere coacta est; & Suecum quidem ad occupandum pontem, quod liberum ad Colonienses transitum flagitaret: hos enim in spem prada sibi inter ultimos labores seposuerat.*

Philippus Christophorus à Soëteren, à Gallis & Suecis anno mox dicto apud nostros vel in pristina sua jura repositus, vel novo robore in eisdem firmatus, acerbioribus statim jussis bilem populo, ac Senatui, prout & antea facere consueverat, vehementiùs movet: unde tædiis & impatientiâ victi, Locum-tenentem ejus incelsunt, deponunt, custodiæ mancipant, aliúmque ex suis, traditis illi portarum clavibus, Satta-

pam & Præfectum saluant. Ad quæ quid Philippi Christophori genius? Patrem ac Præsulem exuens, Imperii & Ecclesiæ hostem, Suecum nempe militem aliò jam digressum, in iræ & vindictæ partem accersit; cujus solo nomine conterriti ac prostrati cives, veniam, quam suppliciter ab irato petebant, sat frigide, & sub aspera increpatione reportant; turbarum verò capita, inter quos & Consul erat, se fugâ subducunt, ex eâque licet citati, non sunt reversi, præelicientes suis exui fortunis, quàm sua capita rigoribus Soëterianis inflectere. *Historia Trevir. Diplom. to. 3. pag. 368.*

Flagella, quibus hætenus cædebatur Nostra, ipsam vel magis providam, vel melius moratam volebant; at quæ nunc Gallicâ ei manu contorta & inflicta perpendimus, nonnisi illius perniciem, ruinam, & excidia spirant: anno siquidem 1688. circa Calendas Novembres Marchio de Bouffleurs, multo eam milite cingit, mœnia juxta castrum eminentia discutit, incursum dein Mosellam vadando decernit; at verò ut hunc ob subitum Mosellæ tumorem, nec non ob valida à Comite de Lippe civibus allata præsidia, periculis obnoxium videt, mutato consilio, in Dei æque ac civium ædes pilis pyrotechnicis sævit, magnâque Nostræ partem crudelibus flammis absunit; post quæ inglorius abiens, sicut secum sat multos mutilos ac vulneratos abduxit, ita non pauciores post se cæsos ac inhumatos reliquit. Tormentarius, qui turrim, bovina nuncupatam, tenebat, magnam stragem.

obsidentibus intulisse compertus, multum inde applausus cum præmiis competentibus ruit: Augustinus Philippus quoque Comes de Lippe, Landgravii Hassiæ Vicarius bellicus, multa de se militaris peritiæ, & generosi pectoris egregia specimina dedit; is namque, ut Confluentiam Gallico Marte petitam, & militis Trevirensis Præfectum glande plumbeâ sauciatum ac decumbentem inaudit, suâ mox sponte, ac perquam opportunè accurrit, copias instruxit, stationes disposuit, gallica molimina fregit, urbemque Electori servavit; unde & ab ipso tria quotannis plaustra vini, quoad vixit, ob res benè gestas recepit.

Hæc à Gallis suscitata tempestas prout supra modum horribilis & sæva, ita & novissima Confluentibus fuit, si panicum timorem excipias, quo ad annum 1734. præfestinè turbati, animoque pusilli mœrebant, prout retulimus supra ad calcem Capitis XIII. hujus namque quosdam intrâ dies in placidum desinentibus motibus, istius quoque superatâ represâque sævitiâ ad portum tranquillitatis appulsi, in eo usque ad 1753. annum, quo hæc scribimus, salvi securique subsistunt, quin & adhuc subsistere gaudent, quæ Browerus in Annal. Trevir. lib. 21. num. 132. ante sesqui sæculum retulit. *Oppidum Confluentinum cum hominum copiis, tum ipsâ naturâ & loco, duobus succinctum fluminibus, quod ad contrahenda cum accolis Rheni commercia opportunitates habet multas, sat magnas pace longâ divitias & opes congeffit. Cætera,*

quæ his ibidem subnexa leguntur, minimè à nobis probantur, ceu qui concitatos contra Joannem de Petra motus non in Nostræ divitias & opes, nec in enatam inde superbiam, sed in grassantes tunc hæreses verisimilius refundendos censemus. *Vid. cap. 6.*



CAPUT XXVIII.

De Confluentia parva.

E Regione Confluentiæ ponè pontem, qui bina littora Mosellana conjungit, nostris adhuc temporibus visebatur Vicus, cujus incolæ tum caupones, tum vinitores & agricolas, ut plurimum autem piscatores agebant : & quia Nostræ veluti suburbium, ac municipium erat, suum quoque nomen ab eadem desumpsit, in lingua vernacula *Lûgel / Lûger / item Lîger- Co- blentz* / latinè verò parva seu minor Confluentia dictus; quod enim dictæ vocolæ *Lûgel & Lûger* priscis Teutonibus idem, quod parvum seu minus, innuerint, liquet tum ex Wachteri Glossario Germanico, tum ex Historia Trevir. Diplom. to. 1. pag. 296. ceu in qua legitur, quod castrum *Litzelstein* à Gallis *petite pierre*, id est, lapis parvus, seu parva petra vocetur;

item quod *Lüßelburg* idem sit, ac parvum castellum. Sic & in Helvetia prope *Frauenfeldiam*, ut *Hübner* in *Lexico Reali Politico* refert, fluunt duo rivi, quorum minor *Lüßelmurg*/major sine addito *Murg* appellatur.

Quamvis autem de anno, qui Vico huic initia cum nomine dedit, non constet; certum tamen est, quod usque ad positionem lapidei pontis plura ibi sæcula ordinarium trajectum conspexerint, quodque fluentibus hisce sæculis fuerint ibi domus erectæ, quatenus & nostri & exteri, nocturno, pluvio, vel brumali tempore hunc ad trajectum appulsi, tectum receptumque haberent, adeoque hic Vicus præ Vicis circumvicinis ad tempora distantissima meritò deponat reponi. *Browerus* jamdum ad annum 1070. ejus meminit, dum *lib. 12. num. 17.* dicit, quod *Cuno Miles*, & *Civis Confluentinus* tres suas vineas, trans *Mosellam* in agro *Minoris Confluentiæ* sitas, *Ecclesiæ Florinensi* donavit. Et quia *Historia Trevir. Diplom. 10. 1. pag. 730.* refert; quod à *Theodorico Wedano* ad annum 1241. *Nonis Junii* emanarint ibidem literæ, quibus feudum masculinum ad sexum fœmininum extendebatur, non obscurè colligitur, *Archi-Episcopis nostris* in *Confluentiæ minoris* agro villam aliquando, vel umbraculum hortense fuisse, quod dein *Comitis Virnenburgici* rancor & furor, ut mox dicemus, in favillas cineresque redegit.

In limine sæculi decimi quinti, dum ad *Electorale Collegium* multiplex querela ferebat, quod

quod vina, aliæque permultæ merces, nec ad-
verso, nec secundo Rheno, ceu ordinariâ viâ,
sed per tractum Hunnorum, aliæque per avia,
cum non levi Rhenensium Electorum dispendio
frequentius deveherentur, sancitum fuit in Bac-
characensi conventu; certis in locis, & signan-
ter in *Parva Confluentia*, observatores ponen-
dos, per quos vectigal, quod in teloniis Rhe-
nensibus pendendum fuisset, exigeretur ab iis,
qui suas merces bigis vel quadrigis per insoli-
tas vias provehere continuarent. *Historia Tre-
vir. Diplom. 10. 2. pag. 350.*

Sub annum 1434. extrema pene calamitas
afflixit, exagitavit, & oppressit Trevirorum
gentem, exin oborta, quod Summus Pontifex
Rabanum ab Helmstatt, Nemetum Præfulem;
Metropolitani verò Canonici primò Jacobum à
Sirck, dein Udalricum à Manderscheid Archi-
Episcopos renuntiârint: & quia Comes à Virmen-
burg nullis non studiis soli Udalrico litabat, Ra-
banum autem, ejusque fautores ubivis insectari
pergebat; hinc & in Confluentibus finitimum
agrum (: hi namque pro Rabano, & à partibus
Pontificiis stabant:) animo infestissimo, ut Bro-
werus in *Annal. lib. 19. num. 45.* refert, prædis
agendis, villisque cremandis incubuit: cum
quibus ejus quoque furor Confluentiam parvam
ad annum 1436. 20. die mensis Octobris cor-
ripuit, ac in Rabani, apud Confluentes tunc
demorantis, conspectu invasit, expilavit, exul-
sit. *Gesta Trevir. Marten. pag. 449. Videantur
quoque dicta de generali interdicto. cap. 2.*

His autem ex cineribus ut per tria pene sæcula speciosior quasi phœnix surrexerat, ad funestum rursus rogam pertrahitur, dum ad annum 1688. advolantes Galli, ut Confluentiam caperent, nidum sibi in ejusdem campis constituunt; quatenus enim hi ab extantibus ibi domibus nil turaminis, nil progreſſûs reciperent, miles noster eas omnes disploſis tormentis bellicis, ignibûsque injectis vastavit: quo dein à tempore assimidata est Trojanis arcibus, de quibus Poeta cecinit: *Ubi steterè Pergama, jam fluctuant ariste.* Interim verò corruptio hujus, si non generatio, accretio saltem fuit alterius vici, qui prius fortassis anonymos, ab incrementis nuperris novus nunc vicus, vulgò *Neuendorff* / audit.



CAPUT XXIX.

De Arce Ehrenbreitsteiniana.

MUnimentum hoc, dum jam Hermannî, jam Ehrenberti saxum apud Veteres audiisse refertur, posteris suspicionem indit, quasi incomperto cuiquam Hermannò, vel Ehrenberto sua incunabula, seu fundamenta deberet: verùm cum nec de hoc, nec de isto Historia Trevirensis Diplomatica quid prodat, sed & cum de

utroque fileant Broweriani Annales, tutius dicitur, incognitum obscurumque manere, quæ manus, quodve tempus primam hîc loci domum, primumque munimentum posuerit. unde & modernum nomen, quo gaudet, nimirum Ehrenbreitstein, non ab Ehrenberto, veluti conditore suo, prout putat Hübnerus in Lexico Reali Politico, sed indè ei inditum dicimus, quod situs in hoc jugo à natura formatus, nec non propugnacula successivè in eodem erecta, perampli sint nominis, multæ præstantiæ, maximæque considerationis; hæc quippè teutonica & composita vocola Ehrenbreit vult rem seu personam innuere, quæ laudis ac honoris multitudine, seu amplitudine pollet: hujus autem nominis non jam umbram, sed veritatem hac à rupe gloriosè portari, vel exindè patescit; quod & à fronte, & à tergo, & à lateribus se insinuans hostis eminus ex ipsa prospici, fortiter impeti, & faciliter possit repelli, adeoque fas sit cum Browero dicere: *Arcæ hâc nihil hisce locis extat usquam, aut ad vim prohibendam tutius, aut ad fortunas etiam, caputque propugnandum securius. Annal. Trevir. lib. 14. num. 144.*

Porro quod à plurimis retro sæculis hac in petra castellum sive munimentum quoddam existerit, quodque in eo nostri Principes suam sæpe sedem delegerint, constat ex iis, quæ ad annum 1166. in Annalibus Browerianis sic annotata leguntur. Hillinus anno 1152. ad Pontificatum assumptus, *Arcem Ehrenbreitsteinianam apud Confluentes operum magnitudine in primis*

nobilem, & ab Archi-Episcopis Trevirorum longo ante ipsum tempore jam olim habitatam, & tunc denique vetustate laborantem, à decessoribus instaurari ceptam, firmâ extructâ turri, & ampliatis adificiis, insigniter ornavit; tum, quod imprimis necessarium, cisternam vallēque in ipsa rupe durissima, altitudine indicibili exscindere aggressus, opus tandem immenso labore, nec vulgaribus expensis ad exitum perduxit. Ubi Lector advertat; quod, cum Browerus montem hunc jam olim, & longè ante Hillini tempora ab Episcopis nostris inhabitatum affirmer, videatur credibile, SS. Magnericum & Gregorium Turonensem, sub annum 585. trajicientes Rhenum, in eodem dein monte diversatos fuisse. Videantur dicta cap. 23. pag. 131.

Arnoldus Isenburgicus suum Clerum insolitis oneribus gravans, pia quoque legata, & Synodi decreta debitam extra curam reponens, indēque inacceptum & odiosum se reddens, vix non continuò hoc in monte residere, laterēque solebat, prout indicant paræneticæ literæ, anno 1256. ad ipsum à Clero sub hoc epilogo datæ. *Hæc monitiones publicè in Ecclesiâ Trevirensi facimus, quia metu legitimo nuntios idoneos ad vos apud Castrum Ecclesiæ Ehrenbreitstein, quod quasi pro domicilio inhabitatis, transmittere non audeamus.* Historia Trevir. Diplom. to. 1. pag. 739.

Sed & Successores Arnoldi, non attentâ commoditate ac firmitate castrî, intra Confluentiam per Henricum Vinstingium magnificè positi, hac crebrius in rupe tum ob puritatem &

salubritatem aëris, tum ob amœnitatem prospectûs consuevisse morari, colligitur tum ex literis Joannis Badensis, ibidem ad annum 1462. datis, atque relatis in mox cit. Hist. 10. 2. pag. 444. tum & ex iis, quæ diximus cap. 4. de Joanne Ludovico ab Hagen.

Mox dictus Badensis pro eadem arce aquam vivam, quæ illi huc usque decesserat, ab anno 1481. usque ad annum 1483. laboribus, sumptibusque immensis inquirens, post petras ducentis & octoginta pedibus in profundum perfossas, eam tandem largiret promanantem invenit; demûmque totum fontis ac superpositæ turris opus ad annum 1484. sub exeuntem Septembrem complevit. Browerus *lib. 19. num. 161.*

Sicut autem Providentia Joannis Badensis ad quotidianos hominum usus, nec non ad varios bellorum casus necessarias aquas ex visceribus hujus petræ prolicuit, ita succedentium Electorum labor & cura aliis & aliis eam modis, molibus, ac propugnaculis percoluit, ampliavit, armavit: Joannes à Petra egregio & anguloso eam vallo communiit. Browerus *lib. 21. num. 133.* Joannes à Schonenberg ingenti operâ in eâ fossam excidit. *Id. lib. 22. num. 71.* Lotharius à Metternich novum ei vallum adjecit. *Id. lib. 23. num. 14.* Carolus Casparus à Petra curribus permeabilem, commodamque in ea viam aperuit, & ab imo usque ad summum obliquo tractu perduxit; ædificia nova, & præmunitiones antemurale crexit: vicinam Helffensteinianam rupem,

ne aggressoribus in opem ac commodum, & incolis in præjudicium seu perniciem vergeret, partim dejecit, partim in propugnaculi formam redegit. *Masenius in Prefat. ad primam partem Annal. Trevir.* Joannis Hugonis operâ rotunda illa, & præcellsa turris, quæ in montis declivio, quod Mosellam respicit, eminere conspicitur, tam ad civitatis ac palatii, quàm ad arcis munimen & ornatum surrexit. Franciscus Ludovicus Neoburgicus vineis Orientem versus excisis, amotâque, cui insederant, terrâ, rupem inascensam nudavit, propugnaculo quoque, fossâque protexit. Franciscus Georgius Schônbornius tot denique, tamque insignibus hanc arcem munimentis juxta modernam architectoniam militarem instruxit, ut, teste *Historiâ Trevir. Diplom. 10. 3. pag. 210.* pro loco principe cum primariis fortalitiis certet: quibus adde, quod & interior Redemptoris nostri sacratissima Tunica, quæ hîc à multis retro temporibus in loco camerato servatur, sit quasi murus validus, à quo & Arx & Patria præcipuum sibi robur, præsidium, & tutamen in tempore necessitatis promittunt.

Nobilem hanc Rhenanæ Mosellanæque fortitudinis sedem mox dicti Principes aptabant, sacrabant, favebantque semper tum sibi, tum & Cæsari, Romanoque Imperio; at Philippus Christophorus de Soëteren, à genio eorundem abudens, eam anno 1632. die quintâ Junii in Gallorum prohil nidum convertit, dum avvocato milite patrio, omne ejus præsidium fidei Galli-

canæ commisit; sub qua & luxit usque ad annum 1637. quo Joannes Werdius, exercitûs Cæsarei Ductor, fame ferroque Francicam pertinaciam frangens, amissam hanc drachmam Imperii thesauris restituit, Cæsare dein in providis mandatis dante, ne illius possessio sive custodia rursus Philippo Christophoro, utpote Gallicis incantamentis corrupto & illigato, sed ut Agrippinensium Præfuli eousque continuanda tradatur, donec ab Imperii Statibus, an ipsi Philippo Christophoro, vel Successori ejus sit restituenda, fuerit decretum: quo decreto ad annum 1650. condito, miles Cæsareus inde migrans, loci præsidium Treverico Præfuli ejusdemque militiæ cessit.

Splendor Soëteriani nominis, quem Philippus Christophorus modis mox dictis obscuraverat in vertice Ehrenbreitsteiniani montis, in ejusdem pede salvus, integræque permansit; cœu in quo is ad annum 1628. operosissimè rupem excindens, Palatium ibi, sive Castrum, quod sibi suisque Successoribus sedem, tutamen autem Rheno, & ostio Mosellano præberet, magnificè, prout adhucdum cernimus, à fundamentis extulerat. Splendidas & cameratas ædes, quæ nunc Palatii hujus atriam ornant, Franciscus Georgius eo fine fecit assurgere, ut & ærarii & regiminis Electoralis negotia commodius in iisdem agi, ac utriusque Dicasterii chartæ securius asservari valerent.

Hic quoque bina Castella, quæ ruri Electoribus serviunt, veniunt commemoranda, sunt.

que Cârlichium, ac Deliciæ Schônbornianæ: de isto hæc refert Browerus *lib. 19. num. 162. Arcem Kerlichiam loco amœno, venationi aucupioque vehementer opportuno inchoatam, Joannes Badensis à solo percoluit, & ad fastigium eduxit: quibus nos addimus, quod Franciscus Georgius pluribus eam, iisque magnificis commodisque ædificiis ampliorem splendidiorémque reddiderit; quódque & diebus his in Campi Mariani sylvula, quæ nuper cum appertinente prædio à Comitibus de Metternich ad Archi-Episcopalia jura permutationis viâ transierat, alteroque lapide à Confluentibus distat, Castrum prorsus nobile, quod Delicias Schônbornianas nuncupari voluit, à fundamentis erexit, insimulque sylvulæ, ambulacris in eadem excisis, complementum amœnitatis indiderit.*



CAPUT XXX.

De Valle Ehrenbreitsteiniana.

HÆc à Priscis ob extantia ibi molendina Vallis molaris, teutonicè *Mühlenthal* / sive, ut in Luca Waddingo legitur, *Mühlheim*: à Philippo autem Christophoro, conditore Electoralis Palatii, Philippica dicta; diebus demum

nostris nonnisi Ehrenbreitsteiniana à Monte & ab Arce, quibus substat, vocatur. Filia olim erat Ecclesiæ Parochialis in Niedernberg; ab anno autem 1711. quo Joannis Hugonis religio in adjacente monticulo novam Ædem honori S. Crucis extruxit, hanc quoque Vallengibus Parochialem cum proprio Curione constituit: decentia quippe, & æquitas poscebant, ut, quæ incolarum frequentia, ædiûmque tam numero, quàm splendore induerat oppidum, à viculo nil dependentiæ, nil amplius subjectionis haberet. Curionem illi jam Archi-Episcopus, jam Abbas ad S. Mathiam prope Trevirim ex mutua conventionem præficiunt; & Abbas quidem ob jus, quod in Ecclesiam Niedernbergensem, Vallengium olim matricem, à centenis retro annis possederat, ac possidet usque in hodiernum diem.

Sacras tertii Ordinis S. Francisci Virgines claustralem hinc vitam aliquamdiu duxisse, constat ex Annalibus Lucæ Waddingi: quas Joannes Badensis ab hinc non in Insulam inferiorem, ut ait Browerus *lib. 19. num. 183.* sed, ut rectius tradit Waddingus, in Montem Bessulanum, vulgò *Besslich* (: *Browerus lib. 19. num. 58. & 59. hoc de Monte plura notabilia refert:*) anno 1496. transferri, in earumque locum Eremitas S. Augustini fecit substitui; quatenus, sicut duorum Ordinum Alumni, Prædicatores nimirum ac Minores, Confluentibus aderant in adjutorium Cleri, sic una saltem religiosa familia decedentes hinc sacros operarios apostolicâ

manu suppleret; quâ & ipsos usque ad tempora, in quibus devians Lutherus suas hæreses per Germaniam sparsit, fideliter laborasse supponimus; funestissimo quippe hoc fato hic Conventus, in quo Lutherum aliquando habitasse, refertur, *vitium quoque traxit, obrutâ istuc loci; & à Monachis desertâ religione*, prout inquit Browerus lib. cit.

Philippus Christophorus eo, quo Badensis, excitus pastoralis zelo, dum agrum Dominicum hac in Valle sat amplum, multamque in comessum, operariis autem vix non viduatam considerat, anno 1627. Franciscani Instituti cultores, qui Capucini dicuntur, huc vocat, Cœnobio donat, & apostolicis facultatibus munit: Carolus Casparus verò gentem magis ac magis in dies accrescentem considerans, in ipsos pastorem ejus curam cum necessaria jurisdictione devolvit; quâ usque ad annum 1711. quo Ecclesia S. Crucis ceu Parochialis surgebat, annis nimirum quatuor supra quinquaginta ad Dominica emolumenta perfuncti, nunc Deo & Valdensibus servire satagunt eâ vitæ methodo, quam Theologi mystici mixtam sive activam & contemplativam appellant.

Porro sicut hæc Vallis tum religionis Catholicæ, tum & rei civiæ florem & incrementa, quibus insigniter pollet, providentiæ nostrorum Principum, nec non delectæ, & stabilitæ hîc eorundem residentiæ debet; ita, quod aliquando sub cineribus ruinisque gemuerit, in Franciscam hostilitatem refundit; cum enim Philippus

Christophorus ad Imperii Romani luctum Ehrenbreitsteinianam arcem Gallicæ potestari, ut diximus supra, cessisset, atque ad repetendam illam Cæsaris appropinquaret exercitus, furia Gallicæ ad annum 1637. alterâ die Julii in sublitam hanc Vallem ruentes, totam quantam unâ cum Capucinatorum Ecclesia & Cœnobio in fumos favillâsque verterunt. Capucinica damna Caroli Caspari munifica manus refarciit iis modis, quos Conventûs & Ecclesiæ facies hâc nostrâ ætate præ se fert.

Viri insignes, quos Vallis hæc familiis regularibus à nostra memoria dedit, sunt Nicolaus Mazenbach Abbas Arnsteinensis. Adolphus Dahm Abbas Seynensis. Joannes Altenar Minorum Capucinatorum in Provincia Rhenana quartâ vice zelosissimus Minister Provincialis; cui eadem Provincia hæc concinnavit elogium.

P. Petrus Confluentino-Vallensis omen cum nomine gessit, utpote super quo velut Petra Rhenana Provincia, multo tempore bellis & ærumnis concussa, solidari tandem, novumque quasi florem emittere cœpit. A piis parentibus originem morumque innocentiam trahens, decimo quinto ætatis anno ad tyrocinium Religionis admittitur. Absolutis studiis ad aram & cathedram eodem gressu conscendens, primariis dein officiis crebrius, ac præclarissimè functus, renuntiatur Provincialis Minister, eoque in gradu positus, Apostolo morem gerens, semper & in omnibus seipsum præbere studuit exemplum bonorum operum, in doctrina, in integritate, in gravitate, dignus, qui ubiqua

audiit *Lucerna lucens & ardens*. Ab officiis divinis, à consuetudinibus piis, à refectiōe communi, à proluendis scutellis, ab aliis consuetudinibus Ordinis nulla ipsum, nisi urgentissima negotia, & agrè quidem notabantur retrahere. Infirmos visitabat, solabatur quotidie. Sermo ejus tam in via, quàm domi comis erat simul ac gravis, nunc de Deo, nunc de rebus Ordinis, nunc de sacris & mirabilibus in Italia visis, profana & vaniloquia non modò devitans, sed & congruà censurâ perstringens. Dies letitiæ, quos nostris jejuniis discreta consuetudo premittebat, tunc verè letos putabat, quando sacris canticis brevis fiebat vel cœna vel hora: & quia de hoc ejus gustu passim constabat Provincia, hinc non paucorum studium erat, Ministrum suum cantionibus piis divertere; quibus ipse non avidas tantùm aures ac placidum dabat aspectum, sed & quandoque vocem tenerâ devotione jungebat. Cœnam alteram, quam ultimo recreationis die post decimam serotinam petebat quidam abusus, negavit ac proscripsit primus. Silentium, quod in esurialibus feriis factâ collatione servamus, ipse quoque indixit primus. Solemnior ac olim non solitus cultus, quo nunc ad decimam septimam Septembris publicamus Stigmata Seraphici Patris sua ab eo initia cum profectibus habet. Reliquum Petri Zelum, quo confirmavit infirma, consolidavit disrumpita, depravata convertit, & verbum vite in aternitatis cibum alenda familie dispendit, ex ordinatis ejus, quæ in singulis Conventibus prostant, sera posteritas novit, facileque concludit, quod zelatus sit Sion zelo magno, &

quidem præ quovis alio ad paupertatis, ac ad regularis observantia discretissimam normam. Ut in desertam Francofurtensem S. Antonii Abbatis Ecclesiam pristinus Dei cultus, ac ut in regularem ejus domum, qua transferat in Secularium usus, Capucina olim expulsa restitueretur familia, mirum est, quos exantlârit labores, quas devorârit molestias; dum enim nunc Principes & potentes hujus sæculi, nunc filios Matris suæ contra se bellantes ac adversarios vidit, imitatus Prophetam, stitit se civitatem munitam, & columnam ferream, & murum aneum, prout ejus docta, solida, & multa in Provincia Archivo asservata Scripta testantur, atque prolixius in Annalibus Provincia lib. 4to. & 5to. refertur. Provincia Ministerio functus, annuâsque ferias aliquoties nactus, semper nonnisi in cella vel in sacro tribunali, vel cum Magdalena confidens ad pedes JESU, visus est quassisse, ac captâsse quietem, mirante familiâ, quod neglecto quasi corpore, solum ubique spiritum præ oculis, ac in curis haberet. Gratia, quâ Pœnitentia ministerium obibat, prorsus variis, ac specialibus ei inerat modis, ipsâque pœnitentes innumeros, præsertim Mogonos, non modo ad suum forum, sed & plurimos horum ad studia sanctiora perduxit. Sicut autem hoc in foro dexterrimus ac frequens, ita nec ullâ molestiâ fractus, aurem indefessam præbuit omnibus, non raro, dum major erat vel confluxus vel fructus, cubitum incœnatus concedens. Visitans familias, ut primum pœnitentes multos, ac operarios paucos advertit, ocyus ad horum se opem accingere, dein sollicitis verbis

optimos quosvis muneris hujus gerendi modos ad visitationis calcem præscribere, ac commendare solebat. Dum itaque commoda atque utilitates commissi sibi populi, aliorumque fidelium attentissime curat, ad gloriam à Domino tanquam dispensator fidelis, & villicus utilis asthma pulsan- te vocatur; quod ut ingravescere sensit, Evangelii S. Joannis 14^{um}, duoque sequentia capita sibi prælegi, solitis dein Sacramentis muniri se voluit, ac tandem ad primas Vesperas S. Antonii Abbat- is, pro cujus honore, domo, & Ecclesia multis annis certarat, vita vespertina Moguntia clausit, ac intra Ecclesiam ante aram S. Antonii Paduani juxta suum confessionale sub profuso presentium secularium fletu conditus terra, reclusus est lapide, hac inscriptione signato. „ A. Reverendus P. Pe-
 „ trus Confluentinus PP. Capucinorum hujus
 „ Provincia Concionator, Lector, Guardianus,
 „ Diffinitor, Custos, & 4^{ta} vice Provincialis,
 „ disciplina regularis, ac salutis proximi zelosif-
 „ finus, Religionis jubilarius, defunctus Anno
 „ 1720. 16. Januarii, hic quiescit, ubi multo-
 „ rum millium confessiones excepit. Requiescat
 in pace. Ita Provincia Rhenana lib. 3^{tio}. cap. 1.
 pag. 97. & 98.

Nicolaus Altenar, mox prædicati junior ac germanus frater, inter Minores Capucinos sub nomine Justinii semel & iterum Theologiæ Le- ctor, vir maturus, discretus, & cum primis in scientia Sanctorum versatus, quam & juniori- bus, suæ curæ commissis, mirâ suavitate, co- piosâ facundiâ, multâque energiâ explanare, ac

instillare didicerat. Sibi rigidus, plures per annos ferreo acuróque cingulo suos lumbos incinxit. Sacramenti Pœnitentiæ insignis ac peritus minister, ad tribunal suum plurimos, Mogonos præsertim, attraxit; in quorum etiam gratiam libellum edidit, eas complectentem doctrinas, quas in aurem confidentius dare solebat. Primaria Provinciæ munera suo cum germano alternativè portâsser, si melior ei valetudo fuisset. In ætate optima prolixo morbo confectus decessit Moguntia Anno 1703. *Vid. Hist. Diplom. Trevir. 10. 3. pag. 234.*

Calparus Heimes, cum Capucinâ veste Isidori nomen adeptus, in Apostolicis deinceps Missionibus annosum non modò pastorem, sed &, ne juvenus sua periclitaretur in acatholica schola, Ludimagistrum in annum tertium egit. In Conventibus silentii, pacis, collectique spiritus religiosissimus custos; ad sacras vigilias, præsertim antelucanas, vix ab ullo fuit unquam præventus: in sacro tribunali fidelis ac indefessus minister, Ordinem, quem tertium, seu de Pœnitentia dicimus, zelosè ac fructuosè promovit. In extrema, eaque nonnisi triduanâ ægritudine avidissimè ad remedia sacra suspirans, eorúmque compos effectus in lenectute bona placidè obdormiit Bingæ Anno 1737. *Provinc. Rhen. lib. 3. cap. 1. pag. 85.*

Cæterùm, quin præter mox dictos alii quoque hac ex Valle meritis eminentes prodierint, ac vel in civicis, aut in ecclesiasticis curiis dignitatum quandoque gradus conscenderint,

ambigere non licet; at verò, quia eos explorare, & hic nominatim adducere non licuit, manus tandem à manipulo nostro retrahimus, easque attollentes in altum, enixè ac fideliter petimus, ut, quidquid in eo colligendo & colligando impensum est operæ, ad suam gloriam assumere ac elevare dignetur, qui, sicut principium, ita quoque omnium nostrum est unus & ultimus.

F I N I S.

ANACE-



ANACEPHALÆOSIS.

CHRONOLOGICA,

SIVE

INDEX

IN QUO MEMORATARUM

Confluentinarum rerum series
de anno in annum brevius con-
spicienda proponitur.



Anno circiter 55. ante Christum natum.

T Revirorum Augustâ, Præsidi Romano sub-
jectâ, Confluentes quoque incipiunt Ro-
manorum jussa capessere. pag. 27.

Anno circiter 11. ante Christum natum.

Apud eos à Druso Castellum invasionibus
Germanorum opponitur. pag. 14.

Anno post Christum natum circiter 100.

S. Maternus Christianam hîc legem primus

N

- anno* annuntiat. *pag.* 19. Ubi tamen quoad hoc affertur duplex Scriptorum opinio.
260. Alemanni superato Rheno, profligant Romanos, & Confluentiam sui juris efficiunt. *pag.* 27.
262. Rerum denuo potiuntur Romani; atque cum locis, quæ nuper amiserant, Confluentiam quoque recuperant. *pag.* 27.
337. S. Castor suscitatur D. Materni semina, alterumque hic Apostolum agit. *pag.* 20. 131.
458. Alemanni seu Franci victoribus iterum armis Confluentiam Romanis eripiunt. *pag.* 27.
509. Francorum Regibus per Clodoveum Magnum deletis, Confluentia cum aliis eorundem Francorum locis ad Gallica jura pertrahitur. *pag.* 28.
512. Galliæ Regno in Neustriam & Austrasiam per filios Clodovei diviso, Confluentes Austrasiæ Regi subduntur. *Ibidem.*
585. Childebertus Austrasiæ Rex suo hic in Palatio residens, à S. Magnerico Trevirensium, & à S. Gregorio Turonensium Episcopis invisitur, ac in favores Episcopi ab Ecclesia sua pulsus rogatur. *pag.* 129. 131. 180.
600. Sub hujus sæculi cursu nostris Regibus in eorum hic Palatio residere vix licuit; eò quod crebrioribus bellis, ac infelicitatibus aliis fuerint in diversa jactati. Prout Browerus in Annalibus refert.
721. Theodoricus III. primo regni sui anno condit hic tabulas, quibus Cænobio Sithivensi pristina confirmatur immunitas. *pag.* 129.

Ludovicus Pius ad tempus hîc residens, suas ab hinc curas in subdita sibi regna diffundit. *pag. 125.*

Anno
823

Basilica S. Castoris ab Archi-Præsule Hettri sacris ritibus initiata, per ipsum quoque hujus sancti Corpore, per Imperatorem verò muneribus opulenti ditatur. *pag. 76. 98. 125.*

836

Lotharius I. Ludovicus Germanicus, & Carolus Calvus, filii ac hæredes Ludovici Pii, hîc in unum ad paterna regna inter se dividenda conveniunt. *pag. 112. 113. 125. 129.*

842

Iidem Reges in Ecclesia S. Castoris coram undecim Episcopis iciunt nova fœdera, editisque decretis persequuntur temeritates prædonum, Clericalem verò statum tuentur. *pag. 113. 129.*

860

Carolus Galliæ, & Ludovicus Germaniæ Reges partiuntur inter se Austrasiæ Regnum: & quia partitio hæc terras Rheno viciniore Ludovico Germanico favit, Confluentia quoque cœpit & ipsi & subsequis Germaniæ Regibus obtemperare. *pag. 28.*

870

Ecclesia, cui nonnisi titulus à Deipara Virgine hucusque fuerat, nunc quoque titulum & patrocinium S. Florini Confessoris assumit. *pag. 73.*

900

Carolus Galliæ, & Henricus I. Germaniæ Reges cum septem Episcopis hîc Synodum agunt, in eaque contra simoniacam pravitatem, super matrimonio non contrahendo in gradibus ab Ecclesia vetitis, ac super obedientia, quam Mo-

922

- Inno* nachi debent Episcopis, necessaria quæque præscribunt. *pag. 114. 115.*
936. Germaniæ Regibus ad Imperii Romani thronum in Ottone Magno levari, Confluentia Sacramentum deinceps Romanis Imperatoribus dicit. *pag. 28.*
948. B. Mathildis, Ottonis Magni religiosissima mater, Ecclesiam S. Florini locupletissimè dotat. *pag. 73.*
973. Castorenses & Florinenses Canonici sub clericali hucusque regula in communitate viventes, diebus his hac à vitæ forma recedunt, ac præbendas sive redditus inter se dispartiuntur. *pag. 72. 78.*
000. Sub id fere tempus B. Rizza, in Coveren sanctè defuncta, ad Ecclesiam S. Castoris, prout petierat, tumulanda defertur. *pag. 99.*
012. Henricus II. in Præsulum Procerumque hinc indicto conventu rebellia quædam capita conditis decretis humiliat atque compescit. *pag. 115.*
016. Idem Augustus, ut vacanti Trevericæ Sedi de Antistite digno prospiceret, suis hinc curis plures per dies advigilat: indeque petens Trevirim, ad hanc spartam Poponi deferendam concurrit. *pag. 31. 126.*
017. Ossa S. Beati ex Augusta Trevirorum transferuntur ad montem, in quo nunc Carthusia visitur. *pag. 86.*
018. Confluentia ex dono Henrici Imp. II. in Ecclesiæ Trevirensis jus & dominium transit: Poppo proin primus Præsulum Trevirensium fuit, qui Confluentibus jura in politicis æquo

ac in ecclesiasticis dixit. *pag. 29. 44. 48.*

Telonium Confluentinum idem Præsul Ecclesiæ S. Simeonis, quæ apud Treviros est, liberaliter donat. *pag. 45.*

Everhardus alter Nostorum in utroque foro Princeps hoc anno renunciatus, rexit annis undeviginti. *pag. 31.*

Succedit Cuno Princeps tertius, qui Sede necdum conscensâ peremptus, eam cedit Udoni, in illa dein novem annos complenti. *pag. 31.*

Cuno Miles, à Confluentia dictus, ut Florinenses Canonicos ad reamplectendam pristinam regularem vitam alliceret, pluribus eos agris, vineis, ac possessionibus dotat. *pag. 141.*

Egilbertus diebus his electus Antistes, eo in munere viginti & tres annos consumit. *pag. 32.*

Cui successit Bruno, bis denis ac duobus annis gubernacula tenet. *ibidem.*

Telonium Confluentinum tabulis novis Ecclesiæ S. Simeonis addicitur. *pag. 45.*

Henricus IV. Imp., ut & Ecclesiæ & Imperio inacceptus ac scandalosus evadit, extremis in angustiis ferias Adventuales hinc agit. *pag. 126.*

Hospitale S. Nicolai Brunonis Archi-Episcopi religiosâ munificentia à fundamentis attollitur. *pag. 83.*

Qui & Basilicam S. Florini, prout nunc est, assurgere fecit. *pag. 32. 73.*

Godefridus Pontificatu potitus, lapsis duobus annis & mensibus decem, cum spontè deponit. *pag. 32.*

- Inno* Meginerus succedens, annis duobus & mensibus fere quatuor præest. *pag. 33.*
127. Meginerum excipiens Albero, annis viginti & uno egregium Pontificem agit. *ibidem.*
129. Conradus III. in Principum huc conscriptis Comitiis Imperator renuntiatur. *pag. 116.*
139. S. Bernardus hoc sub tempus hinc diversatus, claudi cujusdam plantas miraculosè consolidat. *pag. 132.*
147. Conradus III. pompâ regiâ Pentecosten hinc agit. *pag. 127.*
150. Albero conventum hinc agens, dissidia Nobilium & Dynastarum componit. *pag. 117.*
152. Hillinus Alberonem excipiens septendecim annis principatum tenet, interimque cisternâ, turri, nonnullisque ædificiis Ehrenbreitsteinium auget. *pag. 33. 179.*
153. Publicum hinc certamen cum hæretico Berengarii sectatore initur: in quo is errorem edoctus, amplectitur Catholicam fidem. *pag. 21.*
169. Arnoldus I. Ecclesiæ Trevirensis Principatu potitus, in eo annos bis septem insumit. *pag. 33.*
179. Interimque assidet Concilio, quod Alexander III. Romam ad Ecclesiam Lateranensem conscripserat. *ibidem.*
182. Componit quoque dissidia, causâ telonii inter Collegium S. Simeonis, & Magistratum Confluentinum oborta. *pag. 45. 46. 81.*
185. Henricus, Comes Luxemburgicus, dum hujatam Clerum persequitur, civem quoque nostrum seditionibus scindit. *pag. 168.*

Joannes I. à Cæsare ad Archi-Episcopatum promotus, in eo viginti & duos annos laudabiliter agit. *pag. 34.*

Anno
1190.

Valeramus, Luxemburgicus Comes, Confluentiam injectis ignibus, populationibus verò vicinum agrum devastat. *pag. 168.*

1199.

Philippo Rom. Regi faventes Imperii Principes, iteratis hîc juramentis suam illi fidem contra Ottonem IV., itidem Rom. Regem, obstringunt. *pag. 117.*

1205.

Principes Germaniæ, huc ad Comiticia celebranda conscripti, exauthorato Ottone IV. Fredericum II. Imperii moderatorem salutant. *pag. 118. 127.*

1211.

Theodoricus II. Archi-Præsul creatus, annos ter denos in regimine complet. *pag. 34.*

1212.

Albertus Miles, à Confluentia dictus, ut Theodorico suo Principi vitam servaret, suam libens amittit. *pag. 141.*

Equites Teutonici, paucis abhinc annis hîc appulsi, stabili nunc sede, Theodorico curante, donantur. *pag. 84.*

1217.

Hospitale pauperum transfertur in vicum, qui nuncupatur Lôhra. *pag. 84.*

Jurisdicção, quâ Advocatus seu Præfectus Imperialis apud nostros pollebat, exspirat. *pag. 29. 30. 127.*

1220.

Ordo Cisterciensis sacro parthenone Confluentiam auget. *pag. 95.*

Intra quam Dominicana quoque familia loci compos efficitur. *pag. 92.*

1231.

- 170 Sed & Ordo Seraphicus suos hunc in agrum
 33. operarios mittit. *pag. 93.*
 42. Arnoldus II. ad Archi-Pastoratum vocatus,
 eum annis sedecim tenet. *pag. 34.*
 44. Qui & Confluentiam primis mœnibus sepit.
pag. 106.
 65. Confluentini supplicant Papæ, veller, nomen
 B. Rizzæ in Ecclesiasticos fastos referre. *pag.*
99.
 66. Henricus II. à Papa ad Cathedram Archi-
 Episcopalem levatus, in ea annis viginti quin-
 que ac quinque mensibus sedet. *pag. 34.*
 76. Sanctimonialibus, à S. Catharina dictis, ex
 legato pio opportuna hîc domus obtingit. *pag.*
95.
 80. Castrum, ab Henrico hîc erigi cœptum, fô-
 mitem rebellionî ministrat: quam is milite ad-
 ducto compescit. *pag. 52. 53.*
 81. Dissidium Henricum inter & cives inde ena-
 tum, per arbitros, ab utrisque nominatos ac
 acceptatos, componitur. *pag. 53. 169.*
 83. Dùmque rebellionis capita noviter assurgere,
 ac Principem infestare produntur, potior Civi-
 tas omnem iis nervum opponit. *pag. 54. 102.*
 86. Boëmundus I. salutat Antistes, annis decem
 & quatuor Pastorales curas continuat. *pag. 35.*
 100. Dieterus per Papam Archi-Episcopatu pro-
 visus, octavum in eo annum plurimis inaccep-
 tus attingit. *ibidem.*
 104. Nostri nimis gravati tributis, excutiunt Die-
 teri jugum; quos is adductis militaribus copiis
 parere ac acquiescere cogit. *pag. 55. 169.*

Balduinus postulante Metropolitano Capitulo Ecclesiæ Trevirensi Præfectus, eam ultra quadraginta & septem annos multâ laude gubernat. *pag. 35.*

Henricus VII. Imp. in comitatu regio Confluentiam veniens, jus constituendi ibidem telonii eidem Balduino impertit. *pag. 127.*

Cui & Ludovicus IV. Imp. facultatem concedit, in eodem telonio supra solitum exigendi quatuor grossos. *pag. 47.*

Archi-Diœcesi in superiorem & inferiorem partitâ, præter Curiam Ecclesiasticam, quæ Treviris erat, altera apud Confluentes erigitur: apud quos etiam hoc à tempore Archi-Præsules nostri semel quotannis sacros Ordines conferre solebant. *pag. 67.*

Ad Montem S. Beati, amotis ab eo Canonicis, Carthusiani vocantur, eumque possident usque in hodiernum diem. *pag. 87.*

Ludovicus IV. Imp. Eduardus Rex Angliæ, aliique Germaniæ Principes in Confluentina Curia conventus crebriores instituunt. *pag. 118.*

In pegmate supra Confluentiam sito, & Sedes Regia dicto, confidentes Septemviri, literis ad Papam datis, pro Imperii Romani juribus, & in favores Ludovici mox dicti, graviter multumque perorant. *pag. 123.*

Pons, qui Mosellam hîc jungit, fundamentis initiatur. *pag. 109.*

Carolus IV. in Sede Regia, vulgò *Rönigsstuhl* / ad Imperii clavum evehitur. *pag. 123.*

Confluentini contra Westenburgicum Comi-

- no rem prehendentes arma, infeliciter in campum procedunt. *pag. 60. 170.*
54. Boëmundus II. ad regimen Archi-Episcopale assumptus, duodecim in eo annos traducit. *pag. 35. 36.*
56. Confluentes facultate donantur, nundinas annuas à Dominica *jubilate* usque ad vigiliam Pentecostes agendi. *pag. 62.*
52. Cuno Cathedrâ Trevirensi potitus, viginti sex annis & tribus mensibus feliciter, & magnis in ea animis sedet. *pag. 36.*
70. Joannes Schadland, plurium Episcopatum successivè Rector, tumulum apud Nostros in Ecclesia Dominicanorum sortitur. *pag. 138.*
76. Wenceslaus, Caroli IV. degener filius, in Sede Regia Rex Romanorum eligitur. *pag. 123.*
87. Bertramus Episcopus Thefilicensis, & Suffraganeus Metensis, sepulturam, quam in Ecclesia Dominicanorum elegerat, sub congrua pompâ reportat. *pag. 138.*
88. Cuno Trevirorum Antistes in Arce Welmichia mortuus, in Basilica S. Castoris honorario sepulchro mandatur. *pag. 134.*
- Wernerus Cunoni succedens, ter decem annis gubernacula tenet. *pag. 36. 135.*
90. Rupertus Bavarus Imp. Wenceslao, in Sede Regia exauthorato, sufficitur. *pag. 123.*
- Ad hæc circiter tempora Petrus à Confluentia vitæ sanctimoniâ floret. *pag. 141. 142.*
18. Wernerus Archi-Episcopus extra Treviratum defunctus, & ad Nostros delatus, in Castorensi nunc Æde quiescit. *pag. 135.*

Otto Weneri successor, annis duodecim, & mensibus quatuor gregi suo religiosissimè præest. *pag.* 36.

Hic Judæos ex toto Treviratu proscrubit. *pag.* 50. 141

Rabanus Episcopus Spirensis, per Papam Ecclesiæ Trevirensi præfectus, acto in ejus cura novennio, licetâ Treviri, Spiram revertitur. *pag.* 36. 143

Archi-Diœcesis ob suscitatos contra Rabanum motus interdicto generali supponitur: sub quo Confluentia morem Pontifici Romano gerens, præ Trevirorum Augusta bonam notam promeruit. *pag.* 22. 23. 143

Confluentia parva per Comitem Virnenburgicum incendio rapinisque fœdatur. *pag.* 177. 143

Jacobus I. Principatu potitur, eumque singulari prudentiâ in annum septimum supra decimum ornat. *pag.* 37. 143

Annuus Nostrorum mercatus, quem tempore Paschali celebrare consueverant, in Septembrem reponitur. *pag.* 62. 144

Joannes à Monte, Episcopus Azotensis, & Suffraganeus Trevirensis, in Ecclesia Domincanorum sepulchro honorifico conditur. *pag.* 138. 144

Canonici Regulares S. Augustini, è Belgio huc evocati, abhinc in Insulam inferiorem mittuntur; quam subinde sacris suis Institutis iniant. *pag.* 93. 145

Castorense Collegium Jacobi Archi-Præsulis zelo ad vitam observantiorē reducitur. *pag.* 78. 145

110

Qui & in Cœnobium, quod usque huc Conventualium fuerat, Minores Observantes immittit. *pag.* 93.

S. Joannes Capistranus verbo hîc & opere claret. *pag.* 133.

56.

Joannes II. votis postulantibus Pastor creatus, gregi suo quadraginta sex annis & octo penè mensibus sollicitè ac utiliter præest. *pag.* 37.

57.

Westerburgicus Comes, quia prædo, prædonumque receptor compertus, in conventu à Septemviris hic acto, ad promeritas pœnas damnatur. *pag.* 119.

62.

Mercibus huc allatis, hîcque divenditis accisa, ut vocant, imponitur. *pag.* 58.

Jus Stapulæ, à quibusdam Trevericis locis ablatum, Confluentiam transferendum decernitur. *pag.* 63.

65.

Henricus Kalteysen Confluentinus, Archiepiscopus Nidrosiensis & Cæsarensis, sepulturam, quam in Ecclesia Dominicanorum elegerat, honorificâ pompâ reportat. *pag.* 139. 143.

77.

Andreas Kettwig Confluentinus, præstantis vir ingenii, vitam cum morte commutat. *pag.* 143.

81.

Ex Ehrenbreitsteiniana rupe improbo per tres annos labore fontana probata elicitur. *pag.* 181.

Kerlichianæ etiam arcis initia cum profectibus dantur. *pag.* 184.

83.

Ob injurias Florinenſi Collegio à civibus nonnullis illatas, hi flexis genibus veniam ab Archi-Episcopo petere, ac damna resarcire jubentur. *pag.* 74. 170.

- Maximilianus I. Imp. cum quatuor Septem-
viris, aliisque Imperii Statibus conventum hîc
agit. *pag.* 120. 128. *Anno* 1492
- Henricus à Rivenaco, Episcopus Venicom-
ponensis & Suffraganeus Colonienſis, in Do-
minicanorum Ecclesia monumento potitur. *pag.*
139. 1493
- Observantia regularis in hujate parthenone
Cisterciensi collapsa, Archi-Episcopo opitulante,
resurgit. *pag.* 95. 1496
- Sacræ Virgines, tertiam Regulam Francisca-
nam professæ, ex Valle Ehrenbreitsteiniana
transferuntur in Besslich, in earumque locum
Augustiniani substituuntur. *pag.* 185.
- Universitatis Trevericæ reditus augentur dua-
bus Præbendis, unâ nimirum ex Florinenſi, &
alterâ ex Castorensi Ecclesia. *pag.* 74. 79. 1499
- Jacobus II. Principatum adit, tenetque in
annum nonum. *pag.* 37. 1503
- Qui suas extra terras defunctus, in Æde Flo-
rinenſi tumulo honorario conditur. *pag.* 136. 1511
- Richardus Jacobo succedens, in Pontificatu
trigesimum annum attingit. *pag.* 38. 51.
- Judæi per Ottonem Confluentiâ pulsi, Ri-
chardo jubente, in eam reintroducuntur. *pag.* 23. 1518
- Eidem Richardo, à Francisco de Sickingen
presso & obſeſſo, Confluentia suppetias mittit.
pag. 60. 1523
- Obortum in Magistratu dissidium autoritate
ac decretis ejusdem Richardi componitur. *pag.*
57. 1527
- Joannes III. Ecclesiæ Trevirenſi præfectus, 1531

- Anno* novem ipsam annis, & quatuor penè mensibus regit. *pag. 38.*
534. Conventus ab Imperii Principibus hìc actus, Episcopo Monasteriensi contra rebelles auxilia ferenda decernit. *pag. 120.*
540. Joannes Ludovicus cooptatus in Præsulem, in annum septimum gubernacula tenet. *pag. 38.*
543. Carolus V. Imp. ab Africana expeditione re-
dux, per quosdam hìc dies respirat. *pag. 128.*
547. Joannes IV. Pontificatu potitur, & post actos in eo bis quatuor annos, ac menses decem, tumulatur in Æde S. Florini. *pag. 38. 137.*
556. Succedit Joannes V. qui post regiminis annos decem, ac totidem menses, suum similiter tumulum in eadem Æde sortitur. *ibidem.*
- Ferdinandus I. cum Anna, prægante Con-
juge sua, quosdam hìc per dies moratur. *pag. 130.*
560. Cives se liberos rati, Principi obtemperare detrectant. *pag. 56. 171.*
561. Obtemperant autem, ùt Is contra ipsos copias militares adducit. *pag. 56.*
567. Jacobus III. in Ecclesia S. Florini à Capitulo Metropolitano ad Cathedram Archi-Episcopalem evectus, magnâ eam laude quatuordecim annis, ac mensibus duobus tenet. *pag. 39. 75.*
- Sanctimoniales Augustinianæ Vallendariâ mi-
grant, atque inter Nostros domicilium figunt. *pag. 96.*
572. Quisquis diebus his adlegebatur in civem, juramento prævio Catholicum se tenebatur probare. *pag. 59.*
- Severus à Confluentia Carthusianus ex odio

catholicæ fidei ab hæreticis interimitur. *pag.* 144. 145. *Anno*

Sanctimonialibus Cisterciensibus ad Insulam inferiorem descendere, eamque incolere iussis, earundem Cœnobium Patribus Societatis confertur. *pag.* 94. 104. *1580*

Per quos in Gymnasio, per Magistratum erecto, scholæ publicæ aperiuntur. *pag.* 104.

Joannes VI. renuntiatus Antistes, pastorale regimen in annum decimum octavum producit. *pag.* 39. *1581*

Sacræ Virgines, quæ Martinianæ dicuntur, Andernaco huc convolantes, Franciscanis Monialibus in platea Georgiana junguntur. *pag.* 96. *1587*

Lotharius Ecclesiæ Trevirensi Rector datus, annis quatuor & viginti suas ei curas impendit. *pag.* 39. 40. *1599*

Electores Ecclesiastici semel hîc, iterumque convenientes in unum, inito fœdere contra Protestantium molimina suæ, suorumque salutis prospiciunt. *pag.* 121. *1609*

Eâdem de causa iidem Principes tertium conventum hîc agunt. *pag.* 122. *1616*

Philippus Christophorus Episcopus Spirensis, honoribus Archi-Episcopalibus apud Treviros auctus, vitam inter eos supra viginti & octo annos ad quinque fere menses sub syderibus infaustis producit. *pag.* 40. *1623*

Institutum Minoritano-Capucinicum in Vallem Ehrenbreitsteinianam invehitur. *pag.* 186. *1627*

Electoralis ibidem palatio fundamenta ponuntur. *pag.* 183. *1628*

- ^{anno}
532. Ehrenbreitsteinium, avvocato Treverico milite, gallico præsidio traditur. *pag.* 172. 182.
Confluentia ob id, aliisque de causis in motus prorumpens, adducto per Principem milite, se subdere ac obtemperare compellitur. *pag.* 172.
637. Vallis Ehrenbreitsteiniana incendio à Gallis vastatur. *pag.* 187.
Cæsareani Arcem Ehrenbreitsteinianam Gallis eripiunt, ac in Imperii sinum reponunt. *pag.* 183.
650. Ex qua ut iidem Cæsareani migrant, Trevericus in eam miles immittitur. *pag.* 183.
652. Carolus Casparus ad sacram Trevitorum Sedem provehitur; in qua annos viginti quatuor, & tres ferè menses magnâ sui nominis famâ, suorumque luculentis profectibus agit. *pag.* 40.
657. Carmelitæ Discalceati ad plures suas, aliorumque instantias, stabilem hîc locum evincunt. *pag.* 94.
670. Munimenta, quæ nunc Urbem contra hostes tuentur, per Carolum Casparum ponuntur. *pag.* 108.
676. Joannes Hugo, Spirensium Præsul, ad Cathedram Trevirensensem evehitur; qui, quia per annos triginta quatuor & septem menses bene factis eam semper ornavit, perenniter inde in Trevitorum memoria vivit. *pag.* 40. 41.
680. Marcus ab Aviano, Capucinæ Religionis professor, signis hîc & concionibus claret. *pag.* 133.
Pons trajectitius imponitur Rheno; cui Comes Wedanus pontem alium opponit. *pag.* 111.
688. Confluentia minor à Nostreis per ignes injectos subvertitur: major à Gallis obsessâ pyrotechnicis

chnicis globis fœdatur. *pag. 78. 83. 173. 178.*

Gymnasium, quod nunc est, munificentia Joannis Hugonis ad Urbis perpetua emolumenta surrexit. *pag. 104.*

Dominicani suum intra Conventum scholas publicas Philosophiæ ac Theologiæ candidatis aperiunt. *ibid.*

Moniales Augustinianæ collocantur in platea Lôhrana : Hospitale verò hinc ad spatia, à quibus illæ recesserant, transfertur. *pag. 96.*

Ecclesia S. Crucis, quæ nuper juxta Vallem Ehrenbreitsteinianam surrexerat, Ecclesiæ Parochialis titulo jurêque potitur. *pag. 185.*

Carolus Episcopus Osnabrugensis, ad regimen Archi-Episcopale assumptus, quatuor annis & undecim id mensibus tenet. *pag. 41.*

Cui Franciscus Ludovicus postulantibus votis suffectus, undecim annis omnes numeros boni Principis implet. *Ibidem.*

Clausis hoc anno Dominicanorum scholis, Patres Societatis Philosophiam & Theologiam incipiunt, ac usque modo in Hugoneo Gymnasio prælegere pergunt. *pag. 104.*

Seminario Archi-Episcopali fundamenta locantur. *pag. 85.*

Franciscus Georgius, Francisci Ludovici Successor, usque nunc præest, ac prodest, utpote continua sedulâque studia Deo, Patriæ & Imperio dicans. *pag. 42.*

Qui & Nundinas annuas, per quatuordecim dies in Martio & in Augusto hic agendas, instituit. *pag. 62.*

- Inno
749. Quatuor Confluentini, in diversis Regula-
rium Sodalitijis ad regimen Provinciarum as-
sumpti Patres, diebus his cum Rhenum & Mo-
sellam, tum & Mœnum cum Niccaro visitare
cernuntur. pag. 159. 161.
750. Castrum, deliciae Schönbornianæ dictum,
authore Francisco Georgio in campis Marianis
assurgit. pag. 184.
752. A quo & Ecclesia Aulica in formam augu-
stiolem redigitur, ac contra rupis tam humo-
res, tum lapsus munitur: Nobis interim hæc
nostra munientibus & obliquantibus hoc D.
Ignatii voto.

OMNIA AD MAJOREM
DEI GLORIAM.





PERMISSIO ORDINARI.


Permittimus Manipulum Con-
fluentinarum memorabilium
rerum imprimi Luxemburgi. Tre-
viris die 14. Aprilis. 1753.



J. N. AB HONTHEIM,
Episcopus Myriophitanus ,
Suffraganeus Trevirensis.
M. Ppria.

ERRATA:

P Ag. 6. lin. 10. *facilius. leg. felicius. pag. 13.*
lin. 4. *sib. leg. sibi. pag. 14. lin. 14. quin*
Confluentium. leg. quin in Confluentium. pag.
36. lin. 26. *Spiriensis. leg. Spirensis. pag. 52. lin.*
2. *perquem versutus. leg. perquamversutus. pag.*
69. lin. 25. *Gremam. leg. Graman. pag. 78. lin.*
9. *Castornenses. leg. Castorenses. pag. 80. lin.*
23. *post Florinensis. addatur instruimur. pag. 92*
lin. 9. *spirituali anequitiæ. leg. spiritualia nequi-*
tiæ. pag. 102. lin. 1. ad. leg. ab. pag. 118. lin.
30. *instans. leg. intrans. pag. 144. lin. 6. splen-*
dorsequæ. leg. splendorésquæ.





ak



